

O LE EKALESIA A IESU KERISO O LE AU PAIA O ASO E GATA AI • TESEMA 2016

OLE Liahona

**O Tala ia lesu: Mea
taua mai le Tauvaga o
Faatufugaga Faavaomalo
Lona 10, i. 22**

Saunia o Lou Loto ma le Aiga mo le
Toe Afio Mai o le Faaola, i. 10

O Elder Ballard i le Aotauina o le
Ekalesia i le Seneturi Lona 21, i. 28

O Le Faatuatua a Ou Matua: Tagata
Sulufai mai Siekislovakia, i. 36





"O le mea lea, soo se tasi e talitonu i le Atua e mafai moni lava ona faamoemoe mo se lalolagi sili atu ona lelei, ioe, se nofoaga lava i le aao taumatau o le Atua, o le faamoemoe lea e sau mai le faatuatua, e fai ma taua i agaga o tagata, lea o le a latou mautinoa ma mausali ai, ma faatumulia ai pe a galuega lelei e le aunoa, ma taitaiina ai e vaa le Atua."



O SAVALI

4 Savali a le Au Peresitene Sili:

Manuia i Lenei Olaga

Saunia e Peresitene Henry B. Eyring

7 Savali a Faiaoga Asiasi:

O Le Olioli Faaleaiga e

Maua i le Amiontonu



I LE FAAVAA

I luma: Faamatalaga mai le, *O Mai Tatou Vīta o Ia*, na saunia e Dana Mario Wood, faaolologa a le Falemataaga o Talafaasolopito a le Ekalesia, e le mafai ona kopiina. Faavaa pito i totonu: Ata na pueina e iStock/Thinkstock.

TALA FAAALIA

10 Sauniaina o se Nofoaga mo le Alii

Saunia e Epikopo Gérald Caussé
Ua ia i tatou taitoatasī se tiute e saunia mo le afio mai o lo tatou Faaola.

14 O Le Mana Paia o le Alofa Tunoa

Saunia e James J. Hamula
Tatou te manaomia uma le alofa tunoa a le Alii. O ni auala nei e ono e mafai ai ona tatou mauaina lenei mana gafatia.

22 O Le Tauvaga o Faatufugaga Faavaomalo Lona 10: Tau Mai Tala ia lesu

Ia fiafia i nei faaaliga e 16 ua filifilia a le Faaola.

28 E Ala i le Suesue ma le Faatuatua

Saunia e Elder M. Russell Ballard
E manaomia uma le suesue ma le faatuatua mo le aoaoina mataalia o le talalelei, ma e taua tele le matafaioi a faiaoga e fesoasoani ai i tamaiti aoga i le tuufaatasiga o ia mea e lua.

36 Sosola Ese mo le Faatuatua ma le Saolotoga

Saunia e Eva Walburger
I lo latou sosola ese mo le saolotoga, sa maua ai e ou matua faamanuiaga o le talalelei i le tele o auala nai lo le auala e tasi.

MATAGALUEGA

8 Aoao Atu i le Ala a le Faaola: Saunia e Feiloai ma le Atua

Saunia e Devin G. Durrant

40 O Leo o Le Au Paia o Aso e Gata Ai

80 Seia Tatou Toe Feiloai: O Le Natura Moni o le Atua

Saunia e Elder Jeffrey R. Holland



48

44 Faatuatua, Faamoemoe, ma le Alofa Mama: O Amioga Mama e Lalagaina Faatasi

Saunia e Elder Chi Hong (Sam) Wong

48 Fatuina o Lo Maua Taunuuga Fafia

Saunia e Yuri Kutegov

Sa ou naunau e faaipoipo i le malumalu, ae sa taitai au e le Alii i lau soa e faavavau i se auala e lei faamoemoeina.



50 Malosi e Filifili Ai

Saunia e Michael Pickett

O lau miti—o le avea ma se tagataino lelei faapolofoesa—sa avanoa mo au. Ae faafafea pepa o le misiona lea faatoa ou auina atu?

52 Avea ma se Toa Manumanu Moi

Saunia e Charlotte Larcabal

O le fetaomi atu i luma o lona uiga o le faia o le faatinoga, e tusa pe foliga faigata ma le mautinoa.

56 Fesili ma Tali

O loo ou tauivi e suesue tusitusiga paia. Aisea e matuai taua ai le suesueina o i latou?

58 Tuuina Atu o Nisi Mea Nai Lo Meaalofa

Saunia e Emmaline R. Wilson

O a ni meaalofa o le a e tuuina atu i lenei vaitau o le Kerisimasi? Suesue pe o le a le ituiga o tagata foai e i ai oe i lenei suega puupuu.

61 O Le Auaunaga Faafaifeatalai sa Ou Manaomiaina

Saunia e Gabriel Costa Silva

Sa ou lagona le tuuatoasi ma sa manaomia se uo, ae ou te lei vaai faalemafaufau lava o faafeatalai o le a tali i lau tatalo.

62 Pepa Lautele o I Ai se Savali: Aua le Tolopoina

63 O Tali mai Taitai o le Ekalesia: Auala e Onosai Ai

Saunia e Peresitene Dieter F. Uchtdorf



64

64 O Se Kerisimasi Ese

Saunia e Jane McBride Choate

Sa suia mea uma talu le tatalaina o le faaipoipoga. Mata e mafai pea ona lelei le Kerisimasi?

66 O Tamaiti e Tutu Maualuga: Faamanuiaga mai ia Blessy

68 Toa o le Tusi a Mamona: Lu'i a Moronae

69 E Mafai Ona ou Faitauina le Tusi a Mamona

70 O Tali mai se Apostolo: E mafai faapefea ona ou latalata atili i le Faaola?

Saunia e Elder Dale G. Renlund

71 Kata o Molima Faapitoa

75 O La Tatou Itulau

76 Tala o le Tusi a Mamona: Folafolaga Taua a Moronae

79 Itulau e Valivali: Ou Te Alofa i Lou Aiga

O Lemoga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: James B. Martino, Carol F. McConkie

Fautua: Brian K. Ashton, Randall K. Bennett, Craig A.
Cardon, Cheryl A. Esplin, Christoffel Golden, Douglas D.
Holmes, Larry R. Lawrence, Carole M. Stephens

Pule Faatonusili: Peter F. Evans

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinihi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Megan Seitz

Au Tusitusi ma Faatonutonu: Brittany Beattie, David Dickson, David A. Edwards, Matthew D. Flitton, Lori Fuller, Garrett H. Garff, LaRene Porter Gaunt, Jill Hacking, Charlotte Larcabal, Michael R. Morris, Eric B. Murdock, Sally Johnson Odekirk, Joshua J. Perkey, Jan Pinborough, Richard M. Romney, Mindy Anne Selu, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Thomas Child, David Green, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaoisiga: Jane Ann Peters

Au Gaosi: Glen Adair, Connie Bowthorpe Bridge, Julie Burdett, Bryan W. Gygi, Ginny J. Nilson, Gayle Tate Rafferty, Derek Richardson

Tailolomi: Ammon Harris

Faatonusili Lolumiga: Steven T. Lewis

Faatonusili o le Tuafutufaga: Stephen R. Christiansen

Mo le okaina o mekasini, alu i le store.lds.org po o le
Faletuso Tutotonu i Pesega. Telefoni 64127. Totogi o le
Mekasini: \$0.55 (Samoa) ī le kopī. Totogi mo le Tausaga
Atoa \$6.60 (Samoa).

Auina atu tusitusiga ma faafesili i lugu o le

initoneti i le liahona.lds.org; pe meli mai i le Liahona,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa"
po o se "faatonu") ē lomia i le faa-Alepania, Aminia
(Sasa), Pisilama, Palekeria, Kemupotia, Sepuanio, Saina,
Kalaotia, Siekisolovakia, Tenimaka, Take, Igilisi, Esitonua,
Fit, Finelani, Farani, Siamani, Eleni, Hanikeri, Initu, Iselani,
Initoniesia, Italia, Japani, Kiripati, Korea, Latvia, Litunia,
Malakasa, Māselā, Monokolia, Nouei, Polani, Potukale,
Romania, Rusia, Samoa, Saina (ua faafagofieina), Silovenia,
Sipaniolo, Suetena, Swahili, Tagaloka, Tahiti, Tai, Toga,
Iukureini, Urutu, ma Viatename. (E esese lava gagana.)

© 2016 Puletaofia e le Intellectual Reserve, Inc. Ua taofia
aia tatau ura. Lomia i le lunaitē Setete o Amerika.

E mafai ona kopī tala ma ata o le Liahona mo le toe
faaaogaina i lotu po o le aiga ae ia le faia ai ni pisinisi. E le
tatau ona kopī nī tala po o ni ata pe afai o faasa mai i le
laiā o loa tāua ī le a e ona lea faatuifugaga. Auina atu fesili
e uiga i le puletaofia e le Intellectual Property Office, 50 East
North Temple Street, Salt Lake City, UT 84150, USA; i-meli:
cor-intellectualproperty@ldschurch.org.

For Readers in the United States and Canada:

December 2016 Vol. 40 No. 12. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address must be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo afiafi
faaleaiga. O ni faataitaiga nei se lua.



"Saunia se Nofoaga mo le Faaola,"

itulau 10: Ua faamanatu mai e Epikopo
Caussé ia i tatou lo tatou tiutetauave e
saunia mo le afio mai o le Faaola. O se tasi
o auala e saunia ai se nofoaga mo le Alii
o le fesoasoani i tagata o e manaomia se
fale. Mafaufau e volenitia atu i se nofoaga
mo tagata ua leai ni fale, aoina ni sapali
mo tagata sulufai, saili ni tupe e foai atu i
le tupe o le fesoasoani alofa a le Ekalesia,
po o le faaaofia i gaoioiga auauna atu i
lou nuu. Atonu tou te talanoaina ni auala
mo se taimi umi e auaua atu ai i tagata
na tuua faamalosi o latou aiga, e pei o le
atinaeina o faauoga.

"E mafai faapefea ona ou lagona le

latalata atu i le Faaola?" itulau 70: O
lesu Keriso o le mafuaaga moni o le vaitau
o le Kerisimasi, ae e mafai ona e mafaufau
i ni auala e te manatua ai le faataitaiga a
le Faaola i le tausaga atoa. E mafai ona
tou mafaufau vave i ni auala e fatu ai se
aiga e sili ona totonugalemu ia Keriso, e
pei o le faaaalia o se ata o le Faaola i le tou
fale, tauloto mau i vaiaso taitasi e uiga i
le Faaola, po o le sili atu ona faaeteete e
saunia mo le aso Sapati. Fatu ni fuafuaga e
faatino ai ou manatu ma tusi i totonu o lau
api talaaga pe faapefea ona fesoasoani au
taumafaiga e te latalata atili ai ia Keriso.

FAAOPOOPOGA O LOO MAUA I LE INITONETI

O loo maua le Liahona ma isi punaoa a le Ekalesia i le tele o gagana i le languages.lds.org.
Asiasi i le facebook.com/liahona.magazine (e maua i le gagana Peretania, Potukale, ma
le Sipaniolo) e sue ai savali musuia, manatu mo afiafi faaleaiga, ma anomea e mafai ona e
faasoaa atu i au uo ma aiga.

AUTU I LE LOMIGA LENEI

O numera e faasino i le itulau muamua o le tusiga.

Afio Mai Faalua, 10

Agaga Paia, 4

Aiga, 7, 40, 64, 79

Alofa Mama, 44

Alofa tunoa, 14

Amiotonu, 7

Aoao atu, 7, 28

Aoga Sa, 8, 28

Apostolo, 71

Auauna atu, 10, 58, 61,

64, 80

Faaipoipoga, 28, 48

Faamanatuga, 4

Faamoemoe, 36, 44

Faatuatua, 14, 28, 36, 44,

48, 50, 52

Filemu, 4

Galuega faafafeautalai,

36, 41, 50, 61, 66

Iesu Keriso, 14, 22, 42, 44,

58, 62, 69, 70, 80

Kerisimasi, 10, 40, 41, 42,

43, 58, 62, 64, 66, 69,

70, 75

Malumalu, 10, 36, 48

Mea e faamuamua, 8, 50

Molimau, 28

Onosai, 48, 63

Paionia, 36

Perofeta, 71, 76

Suesue i tusitusiga paia,

28, 56, 69

Tagata sulufai, 10, 36

Tamaiti, 42, 64, 66, 75

Tatalaina o le

Faaipoipoga, 64

Tatalo, 48, 61

Tofotofoga, 4, 40, 43, 61

Tusi a Mamona, 41, 52,

68, 76



**Peresitene
Henry B. Eyring**

Fesoasoani
Muamua i le Au
Peresitene Sili

Manuia ILENEIOLAGA

Ia i tatou uma o e ua o mai i lenei olaga faaletino, sa fetalai mai le Faaola, "E maua foi outou e le puapuaga i le lalolagi" (Ioane 16:33). Peitai, na Ia tuuina atu lenei folafolaga matagofie i Ana au soo i le taimi o Lana galuega faaletino: "Ou te tuuina atu ia te outou le manuia, o lou manuia ou te avatu ai ia te outou: ou te le avatu ia te outou faapei ona avatu e le lalolagi" (Ioane 14:27). E toafimalie le iloaina, o lenei folafolaga o le filemu faaletagata lava ia e faaauau pea mo Ana soo uma o le aso.

O nisi o i tatou o loo nonofo i ni siosiomaga matagofie ma toafilemu, ae o loo tatou aafia i lagona faaletagata lava ia o le faigata ma le tauiviga. O isi e lagona le filemu ma le toafimalie atoatoa a o aafia ai i le toesea tele faaletagata lava ia, o faalavelave, ma tofotofoga o loo faaauau pea.

Atonu ua e vaa'i le vavega o le filemu ua faaalia i fofoga o se soo a Iesu Keriso pe faalogo ai i ana saunoaga. Ua ou vaaia le filemu i le tele o taimi. O nisi taimi sa i ai i totonus o se potu o le falemai lea e potopoto ai se aiga i autafa o se auauna a le Atua ua lata ona maliu.

Ou te manatua le asiiasi atu i se tamaitai i le falemai i ni nai aso ao lei maliu o ia i le kanesa. Sa ou aumaia ou afafine laiti e toalua faatasi ma au aua sa avea lenei tuafafine lelei ma o laua faiaoga Peraimeri i se tasi o taimi.

Sa potopoto faataamilo tagata o lona aiga i lona moega, e mananao e faatasi ma ia i ona taimi mulimuli i le lalolagi. Sa faateia au a o ia saofai ae i luga o le moega. Sa ia aapa mai i ou afafine ma faailoa atu i laua uma, taitoatasi, i tagata taitoatasi o lona aiga. Sa ia saunoa e pei o ou afafine

e taualoa o loo faalauiola atu i le maota o se masiofo. Sa ia maua se auala e fai atu ai se mea e uiga i le avea ai o tagata taitoatasi i totonus o le potu ma se soo a le Faaola. Ou te manatua pea le malosi, le agamalu, ma le alofa i lona leo. Ma ou te manatua ai le faateia i lona ataata fiafia e ui sa ia iloa e le toe umi ae maliu.

Sa ia mauaina faamanuiaga faaleperisitua o le toafimalie, peitai sa ia tuuina mai ia i matou uma se molimau ola i le moni o le filemu o folafolaga a le Alii: "Ua ou fai atu nei mea ia te outou, ina ia outou maua le manuia ia te au. E maua foi outou e le puapuaga i le lalolagi: a ia outou loto tetele; ua ou manumalo i le lalolagi" (Ioane 16:33).

Sa ia taliaina Lana valaaulia, ma e mafai ona tatou taliaina Lana valaaulia, e ui i o tatou tofotofoga ma faigata:

"Ia outou o mai ia te au, o outou uma o e tigaina ma mafatia i avega, o a'u foi e malolo ai outou.

"Ia outou amoina la'u amo, ma ia outou faaaaoao ia te a'u; aua o a'u le agamalu ma le loto maulalo: ona maua lea e outou o le malologa mo outou agaga" (Mataio 11:28-29).

E na o le mulimuli i le Faaola e mafai ai e soo se tasi o i tatou ona maua le filemu ma le toafimalie i tofotofoga o le a oo mai ia i tatou uma.

E fesoasoani tatalo o le faamanatuga ia i tatou e iloa le auala e maua ai le filemu i le lotolotoi o faafitaui o le olaga. Pe a tatou aai ma feinu i le faamanatuga, e mafai ona tatou filifili e faamaoni i a tatou feagaiga e mulimuli atu ia te Ia.

Ua tatou folafola atu taitoatasi e manatua le Faaola. E mafai ona e filifili e manatua o Ia i le auala sili e latalata atu



ai lou loto ia te Ia. O nisi taimi mo au, o le vaai faalemafaufau ia te Ia o loo tootuli i le Faatoaga o Kete semane pe vaai o loo Ia valaau atu ia Lasalo e sau i fafo mai le tuugamau. Ao ou vaai faalemafaufau i lea tulaga, ou te lagona se latalata atu ia te Ia ma se loto faafetai e aumaia le toofilemu i lou loto.

E te folafola atu foi e tausi i Ana poloai ga. E te folafola atu e ave i ou luga Lona suafa ma ia avea o Lana molimau. Ua ia folafola mai a o e tausia au feagaiga faatasi ma Ia, o le a faatasi le Agaga Paia ia te oe. (Tagai i le MF&F 20:77, 79.)

E aumaia e lenei mea le filemu i ni auala se lua. E faamamaina e le Agaga Paia i tatou mai le agasala ona o le Togiola a Iesu Keriso. Ma e mafai e le Agaga Paia ona tuuina mai ia i tatou le filemu e oo mai mai le mauaina o le faamaoniga a le Atua ma le faamoe-moe o le ola e faavavau.

Sa tautalagia e le Apostolo o Paulo lenei faamanuiaga matagofie: “A o le fua o le Agaga o le alofa, o le olioli, o le filemu, o le onosai, o le mata-alofa, o le agalelei, o le faamaoni” (Kalatia 5:22).

Ina ua faailoa atu e avefeau o le lagi le soifua mai o le Faaola, sa latou tautino atu, “O le viiga i le Atua i mea

aupitoaluga, ma le *manuia* i le lalo-lagi” (Luka 2:14; faaopoopo le faama-mafa). Ou te tuuina atu lau molimau o se molimau ia Iesu Keriso faapea e mafai e le Tama ma Lona Alo Pele ona auina mai le Agaga ina ia tatou maua ai le filemu i lenei olaga, i soo se tofotofoga e ono oo mai ia i tatou ma i latou tatou te alolofa i ai. ■

AOAO ATU MAI LENEI SAVALI

Ua aoao mai Peresitene Eyring, e mafai e tatalo o le faamanatuga ona fesoasoani ia i tatou e iloa ai le auala e maua ai le filemu i taimi o o tatou tofotofoga. Latou te faamanatu mai ia i tatou a o tatou tausia a tatou feagai-ga, tatou te maua le folafolaga a le Atua e faatasi le Agaga Paia ma i tatou. Mafaufau e fesili atu ia i latou o loo e aoaoina pe faapefēa e le i ai o le Agaga Paia ma i tatou ona fesoasoani tatou te maua ai le filemu. E mafai foi ona e faasoa atu ou manatu po o se aafiaga o le auala na fesoasoani ai le Agaga Paia e te lagona ai le filemu i se tofotofoga. Atonu e te uunaia i latou e te aoaoina e mafaufau loloto i lenei savali i le taimi o le faamanatuga i lenei vaiaso.

E Faapefea ona E Manatua le Faaola i Lenei Vaiaso?

Ua uunaia i tatou e Peresitene Eyring e "filifili e manatua [le Faaola] i le auala e sili atu ona latalata lou loto ia te la."

E faapefea ona e "manatua pea o la" i le vaiaso atoa (tagai MF&F 20:77, 79)?

Mata e i ai ni au mau e sili ona e fafia i ai e uiga i le Faaola? E mafai ona e makaina se mau e ese mai ai i vaiaso taitasi o lenei vaiaso ma faasoa atu i se tasi.

E te peseina se viiga po o se isi pese musuia i lou mafaufau pe a e lagona le faanoanoa? Atonu e te filifilia se pese faapitoa se tasi e uiga i le Faaola i lenei vaiaso.

E te mafaufau loloto i le olaga o le Faaola ma le taulaga togiola i le taimi o le faamanatuga i vaiaso taitasi? E mafai ona e saunia mo le faamanatuga e ala i le toe mafaufau i au filifiliga i le vaiaso atoa e manatua ai pea le Faaola ma salamo i taimi sa e taumafai ai e faia lena mea.

E te tatalo mo avanoa e faasoa atu ai le talalelei i aso



taitasi? Taumafai e faia se talanoaga o le talalelei i lenei vaiaso e tauilai i le Faaola. E mafai ona e tuuina atu lau molimau e uiga i le Faaola i le taimi o le afiafi faaleaiga pe talanoa i se ue i le aoga e uiga i se aafiaga sa e maua i le lotu.

Faia se sini e manatua le Faaola i se auala faapitoa i lenei vaiaso. Tau atu i se matua, se tei, se taitai, po o se ue e uiga i lau sini. I le faaiuga o le vaiaso, tau atu ia i latou le mea na tupu. O le a oulua maua uma le lagona o le filemu ma le fiafia sa talanoa i ai Peresitene Eyring.

TAMAITI

O Mai ia Keriso

Ua folafola mai e le Faaola ia i tatou le filemu pe a tatou "o mai ia te [la]" (Mataio 11:28). O le uiga o lenei mea o le mulimuli i Ana faataitaiga ma taumafai ia latalata ia te la. Tipi ese lenei kata ma faatautau i se mea e te vaai soo i ai. O a nisi auala e mafai ai ona e sau ia Keriso?

- la faaaloalo i le taimi o le faamanatuga.
- Filifili ia agalelei ma ia le faamasino atu i isi.
- Faitau e uiga i le Faaola i tusitusiga paia.
- _____
- _____
- _____
- _____




Ia suesue ma le agaga tatalo lenei savali ma saili ia iloa mea e faasoa atu. O le a faapefea ona faateleina e le malamalama i le “O Le Aiga: O Se Folafolaga i le Lalolagi” lou faatuatua i le Atua ma manuia ai i latou e te vaavaaia e ala i asiasiga a faiaoga asiasi? Mo nisi faamatalaga, alu i le reliefsoociety.lds.org.

O Le Olioli Faaleaiga E Maua i le Amiontonu

O le Atua “na faavaeina ia aiga ia tatou maua ai le fafia, e fesoasoani ia i tatou e aoaoina mataupu faavae sa’o i se siosiomaga alofa, ma ia sauniuni ai i tatou mo le ola e faavau.”¹ O le talanoa e uiga i le “fuafuaga tele o le fafia” a le Atua (Alema 42:8), ua saunoa mai ai Peresitene Russell M. Nelson, Peresitene o le Korama a Apostolo e Toasefululua: “Ua tautino mai i Lana fuafuaga e faapea ua i ai alii ma tamaitai ‘ina ia latou maua le olioli’ [2 Nifae 2:25]. E maua lena olioli pe a tatou filifili e ola e tusa ai ma le fuafuaga e faavavau a le Atua.”²

O se aiga e faatotonugalemu ia Keriso e mauaina avanoa silisili mo le manuia. Ua faamatalaina e Elder Richard G. Scott (1928–2015) o le Korama a Apostolo e Toasefululua o se nofoaga “lea e aoaoina ai le talalelei, tausia ai feagaiga, ma ola lauusiusi ai le alofa,” lea e mafai ai e aiga ona ola ai “i ni olaga usiusitai” ma “mausali le mauaa i le talalelei a Iesu Keriso.”³

Na saunoa mai Peresitene Henry B. Eyring, Fesoasoani Muamua i le Au



Peresitene Sili: “E mafai ona tatou filifili o le a tatou faia mea uma tatou te mafaia ina ia aumaia mana o le lag i totolu o o [tatou] aiga.” Ma o le a tatou faalauiloa atu le alofa, auaunaga, usiusitai, ma le fafia i o tatou aiga e ala i le “faalogo a [o tatou fanau] i le afioga a le Atua ona faatino lea i le faatuatua. Afai latou te faia, o le a suaia o latou natura i se auala o le a maua ai le fafia o loo latou sailia.”⁴

Mau Faaopoopo

3 Ioane 1:4; 1 Nifae 8:12; 2 Nifae 5:27

Faatuatua, Aiga,
Toomaga



Aiga e Totonugalemu ia Keriso

Ua tatou maua ni faataitaiga o aiga e faatotonugalemu ia Keriso i tusitusiga paia. I le mavae ai o le maliu o lona tama, o Liae, sa ave ese mai e Nifae lona aiga ma isi tagata o e na talitonu i lapa-taiga ma faaliga a le Atua ma e na usiusitai i upu a Nifae mai le nuu o sa Lamana. I lenei nofoaga fou, e mafai ai e sa Nifae ona tausi faamasinoga, tulafono, ma poloiga a le Atua i mea uma, e tusa ma le tulafono a Mose (tagai 2 Nifae 5:6–10). Peitai, e o lava i totolu o sa Nifae, na iu ina amata ona le usiusitai isi tagata.

Ma ao mafai ai e o tatou aiga ona o ese i nisi taimi mai le amiontonu e pei ona faia e sa Nifae, ua saunoa mai Elder Scott, o se aiga e totonugalemu ia Keriso e “tuuina mai [pea] le faamautino-agia aupito sili mo le filemu ma le sulufaiga i totolu o o tatou aiga.” O le a tele pea luitau po o lototiga e i ai, ae e tusa lava pe o le totonugalemu o faigata, e mafai ona tatou olioli i le filemu i le loto ma le fafia loloto.”⁵

Mafaufau I Lenei Mea

O le a le mea e mafai ona tatou faia ina ia ola atili ai i le amiontonu i totolu o o tatou aiga?

FAAMATALAGA

1. *Tusitalima 2: Taitaiina o le Ekalesia* (2010), 1.1.4.
2. Russell M. Nelson, “Faaipoipoga Faaselesitila,” *Liahona*, Nov. 2008, 92.
3. Richard G. Scott, “Mo Le Filemu i le Aiga,” *Liahona*, Me 2013, 30.
4. Henry B. Eyring, “The Teachings of The Family: A Proclamation to the World,” *New Era*, Sept. 2015, 5, 6.
5. Richard G. Scott, “Mo Le Filemu i le Aiga,” 31.



**Saunia e
Devin G. Durrant**

Fesoasoani
Muamua, o le Au
Peresitene Aoao
o le Aoga Sa

SAUNIA E FEILOAI MA LE ATUA

O le Aoga Sa o se vaega taua e fesoasoani ia i tatou uma e saunia ai e feiloai ma le Atua. O e faia [le Aoga Sa] ma se faamuamua?

I le Tusi a Mamona, sa talai atu e Amoleka se lauga mamana e uiga i le Togiola a Iesu Keriso (tagai Alema 34). Mai i fuaiupu matagofie i totonus o lenei mataupu, o se tasi o fuaiupu e taua ia te au o le taimi na taua ai e Amoleka, “Aua faauta, o le olaga lenei o le taimi lea mo tagata e saunia ai e feiloai ma le Atua” (Alema 34:32).

O le talitonu o le faamoemoega o lenei olaga ia “saunia e feiloai ma le Atua,” e mafai ona tatou fesili ifo ia i tatou lava fesili nei: O le a le mea o ou faia i aso taitasi, ma masina taitasi e saunia ai mo lena faatasiga matagofie ma lo tatou Tama Faalelagi? E faapefea ona ou filifili e faaalu le taimi taua ua tuuina mai ia te au?

E Faapefea ona Tatou Saunia?

E tele auala e mafai ai ona tatou faaalu lo tatou taimi e saunia ai e feiloai ma le Atua. Mai lea vaiaso i lea vaiaso, ou te talitonu e mafai ona tatou malilie o le itula aupito sili ona taua o le vaiaso o le taimi e faaalu i le aai ma feinu i le faamanatuga, faafouina o a tatou feagaiga ma le Tama Faalelagi, ma mafaufau e uiga i le alofa mai ia te Ia ma le faamoemoe e mafai ona tatou

maua uma se taunuuga o le Togiola a Lona Alo, o Iesu Keriso.

Ou te talitonu foi o le itula tatou te faaluina i a tatou vasega o le Aoga Sa e mafai ona i ai se aafiaga sili atu i la tatou tapenaga i lo le mea ua tatou iloaina. Ae ina ia tatou faaaoga lena avanoa, atonu tatou te manaomia le suesue pe faapefea ona tatou o atu i le Aoga Sa.

O le faamoemoega o le Aoga Sa o le “faamalosia lea o le faatuatua o tagata taitoatasi’ ma aiga’ i le Tama Faalelagi ma Iesu Keriso e ala i le aoao atu, aoao mai, ma le faaaumeaina.”¹ O nei elemene taua o le liuaina e taua i la tatou taumafaiga e saunia e feiloai ma le Atua. Matou te fiafia i le galulue ai o faiaoga i le Ekalesia atoa e faaleleia o latou tomai e aoao atu e faaaoga ai le *Aoao Atu i le Ala a le Faaola* ma fonotaga a aufono a faiaoga.

Ae o le faaleleia o le aoao atu lava ia e le lava. E tatau ona fetau mai o tatou taumafaiga e aoao atu i le ala a le Faaola. Sa ia fetalai e tatau ona tatou aoao “e ala lava i le suesue ma le faatuatua foi” (MF&F 109:7)? O le faatuatua o se mataupu faavae o le

faatino. E tatau ona tatou *faiā* pe afai tatou te manano ia *iloā* (tagai Ioane 7:17).


E mafai e a tatou vasega o le Aoga Sa ona uunaia lenei ituiga aoao atu ma le aoao mai pe afai o ni nofoaga saogalemu e faasoa ai aafiaga sa ia i tatou ma uunaiga sa tatou lagonaina i le aluga o le vaiaso ao aoao ma faaaoga tusitusiga paia e saunia ai mo le vasega. Ao tatou “aoao i le tasi mataupu faavae o le malo . . . ona faagaeetia ai o tagata uma” (MF&F 88:77, 122).

Ta'ua le Sapati o se Aso Fiafia

Sa valaaulia e le Au Peresitene Sili talu ai nei i tatou taitoatasi ia “ta’ua le sapati, o se aso fiafia” (Isaia 58:13) i o tatou olaga. O le aafiaga o le tolu itula o sauniga o le aso Sa e fesoasoani ia i tatou e ausia ai lena sini.

Ma lena amioga, sei ou fai atu se isi fesili: Aisea i nisi taimi tatou te le filifili ai e taliaina atoa le avanoa e tuuina mai e le Aoga Sa?

I tausaga lata mai nei, ua ou molimauina ai le tele o “filifilia” o le Aoga Sa i le taimi o le Aoga Sa, e aofia ai le asiiasi atu i ala savali, faatautaia



e taitai o le uarota o faatalanoaga, aoaoina e taitai o le siteki o o latou tagata i le uarota, ma le tuuina atu e taitai o le autalavou o atugaluga o le polokalama.

Faatasi ai ma le tele o le pisi o o latou taimi, ou te malamalamā i le aisea e mafai ai ona faaaoga le taimi o le Aoga Sa e faia ai isi mea. Ae oka se faamanuiaga mo tagata uma pe a tuuese e taitai o le uarota se itula e auai ai i talanoaga o le talalelei faatasi ma tagata o o latou lafu!

Ou te talitonu ua e oo i nisi o faataitaiga o le "le amanaia o le Aoga Sa." Mo se tasi mafuaaga po o se isi, ua lagona e le toatele o i tatou i nisi o taimi e le tele so tatou manuia mai i vasega o le Aoga Sa e pei ona tatou mananao ai. Ua ou aoaoina, o le oa o lou aafiaga o le Aoga Sa e iloiloina i le tele o lou tapenaga ma auai e pei o lou faiaoga. Sa tusia e Brother Tad R.


Callister, Peresitene Aoao o le Aoga Sa, "O taimi uma lava tatou te suesue ai i tusitusiga paia, o mai i le vasega ia sili laitiiti atu le saunia, auai i talanoaga i le vasega, fai fesili, ma tusia uunaiga mamana, ua amata ona avea atili i tatou faapei o le Atua, ma ua faateleina ai lo tatou malosi e maua ai le olioli o Ia lagonaina."²

Saunia mo ma Puipua le Itula o le Aoga Sa

Ou te valaaulia oe e faia le mea sili e saunia ai mo ma puipua le itula o le Aoga Sa. O tagata taitoatasi o le uarota ma le paranesi, e aofia ai o tatou taitai, e tatau ona i ai le faamanuiaga matagofie e faafeiloi le Atua i lenei itula taua i vaiaso taitasi. ■

FAAMATALAGA

1. *Tusitalima 2: Taitatina o le Ekalesia* (2010), 12.1.
2. Tad R. Callister, "The Joy of Learning," *Liahona*, Oke. 2016, 14.



Aao atili e uiga i le Aoao Atu i le Ala a le Faaola ma fonotaga a aufono a faiaoga i le Aoaoatu.lds.org.



Saunia e Epikopo
Gérald Caussé
Epikopo
Pulefaamalumalu

SAUNIAINA O SE NOFOAGA MO LE **ALII**

*O taimi uma ou te
faalogo ai i le tala o le
soifua mai ma le galuega
i le lalolagi a le Faaola,
ou te mafaufau i o tatou
tiutetauave faaletagata
lava ia e saunia nofoaga
e faafeiloai ai mo Ia mo le
aso e toe afio mai ai o Ia.*

Ile tausaga ua tea a o lei oo i le Kerisimasi, sa ou auai i se taumafataga o le afiafi na saunia e faamamalu ai se taitai maualuga a Farani e le o se tagata o le Ekalesia. Sa faia le taumafataga i le Fale a Joseph Smith Memorial i le Aai o Sate Leki, Iuta.

Ae ou te lei nofo i lalo i la matou meaai, sa matou aveina la matou malo faaaloalogia i le faamalama e matamata ai i le fogafale 10, lea e maua ai e tagata asiasi se vaaiga matagofie o le Lotoa o le Malumalu. Sa toetoe lava a faamaneta le vaaiga, ma le Malumalu o Sate Leki o loo tu matilatila i moli feemoemoai. Sa matou tutu ai iina mo ni nai minute, toetoe lava a lemagagana.

I le matou toe foi atu i le fale o le taumafataga, sa fesili-gia i matou e le taitai i se fesili sa lei faamoemoeina: “Mata tou te talitonu i le iuga o le lalolagi?” Sa taitai atu lenei fesili i se talanoaga musuia e uiga i le Afio Mai Faalua o le Alii ma le taua mo i tatou uma ina ia saunia e talia o Ia i le aso o Lona toe afio mai.

Ao ou mafaufau e uiga i le malumalu faatoa matou faamemelo i ai, sa oo mai se manatu matagofie i lou mafau-fau: “I Lona afio mai, o le a *iu* ina maua e Iesu se nofoaga matagofie e aumau ai!”

Ua tusia e le Taiala i Tusitusiga Paia e faapea o se malumalu o le “*mea moni lava*” o le maota lea o le Alii.”¹ I nisi upu, e le na o se nofoaga o le faatusa. O malumalu o lo tatou tisipenisione o ni maota ua saunia ma faapaiaina lea e mafai ona Ia afio mai ai faaletino. Sa fetalai mai le Alii e tatau ona atiina ae Lana Ekalesia ina ia “faapotopotoina o lou nuu o le feagaiga i se tino e tasi i lena aso *pe a Ou alu atu i lou malumalu*” (MF&F 42:36; faaopoopo le faamamafa).

Oka se eseesege maoae ma le amataga faatauvaa a le Faaola i le olaga faaletino. O Ia, le Tupu o tupu ma le Alii o alii, sa soifua mai i se fale o manu faatauvaa ma faataoto ai i se faatanoa vao “aua latou te le ofi i le fale . . . e tali ai malo” (Luka 2:7). I le taimi o Lona laitiiti, sa lei fiafia pea Iesu i le mafanafana o se fale tumau, e pei o le taimi na sosola atu ai Lona aiga i Aikupito e sola ese mai le leaga o se pule sau (tagai Mataio 2:13–14).

Tatou te le mailoa faamatalaga o le taimi a Lona aiga i Aikupito, ae e mautinoa sa soifua o Ia ma Ona matua i le olaga malolosi o tagata sulufai—o se olaga e faatusa i na olaga o le toatele o tagata sulufai i o tatou taimi o e sa



sosola ese mai i nofoaga o le taua ma feteenaiga faalemalo i Aferika ma Sasa Tutotonu.

E oo lava i Lona olaga matua, sa faailoa mai e Iesu e Na te lei mauaina se fale e masani. I se tasi o aso, sa alu atu ai se tagata ia te Ia ma faapea atu, “Le Alii e, ou te mulimuli atu ia te oe i mea uma e te maliu atu i ai.” Sa tali atu le Faaola, “E fai lua o alope, e fai foi mea e momoe ai manu felelei; a o le Atalii o le tagata, e leai se mea e moe ai o ia” (Luka 9:57, 58).

Ou uso e ma tuafafine, o taimi uma ou te faalogo ai i le tala o le soifua mai ma le galuega a le Faaola i le lalolagi, ou te mafaufau i o tatou tiutetauave faaletagata lava ia e saunia nofoaga e faafeiloai ai mo Ia i le aso e toe afio mai ai o Ia. O le a se mea e mafai ona tatou faia?

Alu i le Malumalu

Muamua, ia tatou sauni e talia o Ia i Lona lava matoa—le malumalu. O ai o i tatou e lei moemiti e asiiasi i nofoaga sa fanau mai ai le Faaola, soifua ai, ma faia ai Lana galuega i le lalolagi? E toatele, faatasi ai ma osigataulaga e tele, ua faimalaga i le Nuu Paia. Ae e taua tele ona tatou asiiasi atu i nofoaga lea atonu o le a Ia afio mai ai i se aso. O se tasi o auala sili, e mafai e i tatou, o ni Ana soo, ona saunia mo Lona Afio Mai Faalua o le o atu soo i Lona maota paia ma noatia i tatou lava ia te Ia e ala i feagaiga paia.

Saunia Lou Fale

Lona lua, e mafai ona tatou faia a tatou fale o nofoaga lea e finagalo le Alii e aumau ai. I tusitusiga paia, tatou te fiaitau ai i tala e tele o ituaiga o tagata sa faafeiloai ma talimalo i le Faaola i o latou fale. Sei o tatou fesili ifo ia i tatou lava fesili nei: E taliaina ea e le Alii lou fale? Mata o se nofoaga e saogalemu, filemu, ma faatumulia i le Agaga lea Na te lagona ai le toafimalie? E le manaomia ona tetele pe taugata o tatou fale. O se nofoaga e ola ai, e tutotonu i le talalelei ma tumu i aiga ma uo agalelei, o le a fiafia ai o Ia.

Faapotopoto E ua Filifilia

Lona tolu, e mafai ona tatou fesoasoani e faapotopoto Lana au filifilia mai le lalolagi atoa—e tusa poo lona uiga o le tuua o o tatou fale mo se taimi ae fesoasoani e fausia Lona malo i le lalolagi. O le talafaasolopito o le nuu o

le Atua o se talafaasolopito o Au Paia sa saunia pea ma naunau e o atu i le mea e finagalo le Alii latou te o ai. Ou te mafaufau i perofeta anamua, e pei o Aperaamo, Isaako, Iakopo, Iosefa, Mose, Liae, ma le toatele o isi. Ou te mafaufau i Aposetolo a le Alii i le meritiana o taimi o e sa faasalalau atu pea le talalelei i le salafa o le Meititirane.

Ua avatu ma o loo avatu pea e perofeta ma aposetolo o aso e gata ai, faatasi ai ma le fiaitau afe o faifeautalai, le savali a Keriso i le itu uma o le lalolagi. Ua latou naunau e tuua le mafanafana o o latou fale ina ia ofo atu lo latou auaunaga i le tovine a le Alii.


Fesoasoani ia i Latou e Manaomia le Fesoasoani

Mulimuli, o se auala matagofie e saunia ai se nofoaga mo le Alii o le fesoasoani lea i o tatou tuaoi e le o i ai se fale. O aso anamua o le Toefuataiga sa aofia ai taimi lea na le maua ai e le Au Paia ni fale. I lo latou sailiga mo Siona, o le le taliaina ma le amioleaga a o latou fili na masani ai ona faamalosia i latou e tuua o latou fale.

Sa faaaoga e Peresitene Polika Iaga (1801–77) faaupuga musuia nei e faamatala ai lo latou tulaga faigata: “Sa toe aveesea i matou i lea taimi, ma lea taimi mai i o matou fale filemu, ma sa manaomia ai e o matou fafine ma fanau ona ola i laufanua valevalenoa, i le togavao, i luga o auala, ma i faleie, i le ogatotonu o le tau malulu, ma mafatia ai i soo se vaega o faigata, e oo lava i le otu lava ia.”²

O se tasi o aafiai sili ona faamomoiloto mai lenei vaitau o loo faamamafa ai le tamai nuu o Quincy, Illinois, i le taimi o le tau malulu o le 1839. I lena taimi, o lenei nuu o tagata paionia ma fai faatoaga, sa i ai i le auvai o le Vaitafe o Misissipi, e aofia ai pe tusa e 1,500 tagata o loo soifua i ni tulaga faigata. I le ogatotonu o le taumalulu matautia, sa faafusei ona latou feagai ma le taunu ai pe tusa o le 5,000 o tagata o le Ekalesia sa sosola ese mai le poloaiga sa tuuina atu e le kovana o Misuri. Sa i ai le au paia i se tulaga o le faigata ma le pagatia, ma le savivali ai e sopoia vai ua aisa o le Misissipi. Faatasi ai ma le maoae o le agalelei, sa faafeiloai e tagata nuu o Quincy i latou i aao mafola, ma tatala o latou fale ma faasoa atu a latou meaai itiiti.

Sa faamatala e se tasi o tagata nuu o Quincy le taunu ai o nei tagata sulufai: “O le toatele o le Au Paia sa fiafia



ina ua maua le malutaga i lou fale mai afa, seia latou maua se nofoaga e nonofo ai. O le tele o po i luga o fola, i le falealuga ma le falealalo, sa uftia i moega sa tuuafaatasi sa le mafai ona tu i soo se mea e aunoa ma le tu i luga o se moega.”³

Mo i tatou o e ua faamanuiaina e nonofo i ni tulaga sili atu ona filemu ma manuia, o nei tala o loo i ai se taula ofoofogia. Latou te aoao i tatou ia avea o ni tagata e saunia pea e aapa atu i tagata sulufai ma le tagolima. Tusa lava pe o tatou nonofo i eria o loo feagai ma se poloaiga o le aveesea o tagata sulufai poo i nuu laiti, pe maotua, o loo i ai le tele o auala e mafai ai ona tatou auauna atu ia i latou o loo tauivi ia maua ni mea itiiti e manaomia o le olaga. E mafai ona tatou saofaga i le tupo o le fesoasoani alofa a le Ekalesia. E mafai ona tatou galulue ma isi o loo i o tatou nuu o e tuuina atu le auaunaga agaalofa ia i latou o e le tagolima. E mafai ona tatou tuuina atu la tatou faauoga ia i latou ua faamalosia e tuua o latou aiga pe a latou o mai i o tatou nuu. E mafai ona tatou faafeiloai ma le faamaoni ni tagata ese o e asiiasi mai i o tatou uarota ma paranesi.

O se tasi o a tatou viiga sili ona matagofie e toe faamatala ai le tala o se tagata ese sa mauaina le malutaga i se tagata o alofa mama maoae.

*'Ua po; ua lolo
Ua to mai se afa o le tau malulu.
Sa ou lagona lana tagi
Ma ou aumai o Ia i lou fale.
Sa ou tausi Ia ma faalavalava
Ma teu lou moega mona tofaga;
Ae ou moe i lalo, a e pei
Sa ou miti i Etena le faatoaga. . . .*

*Ona faailoa mai lea
O lenei tagata ese ia te au.
Tulaga o fao sa i ona aao;
Ua tu mai ou luma le Faaola.
Sa Ia fetalai lou igoa ma tau, fai mai
“Sa e le ma ia te au.
Ia fai lea ma mea e te ola ai;
Aua o au na e fai i ai.”⁴*

Ou te mitamita i le auai i se Ekalesia e le taofia lava le aapa atu i e matitiva ma le tagolima o le lalolagi. Ua faalotomaualaloina au e le anoanoai o galuega o le alofa ma le alofa mama, laiti ma tetele, na faatinoina i aso taitasi e le Ekalesia ma ona tagata. O nei galuega o le a avea pea ma se vaega taua o le misiona a le Ekalesia aua o Le Ekalesia a Iesu Keriso ma o loo tatou taumafai e mulimuli i Lana faataitaiga.

O Iesu o lo tatou Faaola ma le Togiola. Ou te molimau atu sa ia soifua mai i le meritiana o taimi, o loo soifua o Ia, ma o le a i ai se aso o le Ia toe afio mai ai i le mamalu e pule ma nofotupu i Lona malo i le lalolagi.

E ala i le sauniuni, ou te valaaulia outou e o atu soo i Lona maota paia; fatu se siosiomaga saogalemu, alofa, ma filemu i lou aiga; ma auai i le faapotopotoina o Lana au filifilia mai i tulimanu uma o le lalolagi. Ou te tatalo foi o le a tou lagona se manao faapitoa e aapa atu i le alofa ia i latou o ia te i tatou o e leai ni aiga ma e le tagolima. I le faia o lea mea, o le a e saunia se nofoaga i lou loto ma le aiga e faafeiloai ai le Faaola, ma e moni o Lona toe afio mai o le a avea o se aso matagofie ma ofoofogia. ■

FAAMATALAGA

1. Taiala i Tusitusiga Paia, “Malumalu”; faaopoopo le faamamafa.
2. Brigham Young, i le B. H. Roberts, *A Comprehensive History of the Church*, 2:509.
3. Wandle Mace, i le Ora H. Barlow, *The Israel Barlow Story and Mormon Mores* (1968), 156; tagai foi 154–55.
4. “Se Tagata Mativa Faanoanoa,” *Viiga*, nu. 16.





Saunia e
James J. Hamula
O Le Fitugafulu

O LE MANA PAIA O LE Alofa Tunoa

O le alofa tunoa ua faamoemoe e mafai ai e i tatou ona tausia atoatoa atili ia poloaiga ma ola atili faapei o Keriso, seia tatou atiina ae ai le tino o Keriso.

Mai i uiga uma o Iesu Keriso, atonu o le uiga aupito sili ona taua, o Ia e “tumu i le alofa tunoa” (Ioane 1:14). I tusitusiga paia o le faaupuga *alofa tunoa* e tele ina faasino i le natura paia ma le mana e faamanuia ai, tuuina atu o meaalofa, po o le isi itu ia lelei le amio i tagata. Ua tuu e le Lomifefiloi a le Tusi Paia i le itu lenei: “O le manatu autu o le upu [*alofa tunoa*] o uiga paia o le fesoasoani po o le malosi. . . . O le alofa tunoa o le mana gafatia” (“Alofa Tunoa”). E na te faatagaina le tagata e faia ma avea ai ma mea e le mafai ona ia faia ma le mafai ona avea ai pe a tuu na o ia.

Tatou te manaomia uma lea mana gafatia. O i tatou o atalii ma afafine o le Atua. Ona o lenei mea, ua tatou maua le gafatia e avea ai e pei o Ia.

Lo Tatou Tulaga Le Gafatia i le Agaga ma le Tino

A o mafai ai ona faamoemoe tatou te ausiaina le “tumu o Keriso” (Efeso 4:13), tatou te le mafai ona faia na o i tatou lava. Ua foafoaina i tatou taitoatasi i ni mea se lua—o se agaga e faavavau ma se tino faaletino (tagai Aperaamo 3:18). E oo mai lo tatou agaga e faavavau i le lalolagi ua i ai ni filifiliga sa faia i le muai olaga. O nei filifiliga i le amataga o ni vaega o a tatou amio, uiga, ma le atamai faaleagaga. Ae taua ai, e leai ni agaga se lua e tutusa (tagai Aperaamo 3:19). E i ai i agaga taitoatasi se aofaiga o le atamai faaleagaga, po o le malamalama ma le upumoni (tagai MF&F 93:36), e tusa ai ma ana filifiliga i le amataga. Ao mafai ai e o tatou agaga taitoatasi ona taunu i lona tino faitino i le fanau mai ma le mama ma mama aiai, ma e oo lava i le tamalii ma le tautaua, e leai se tasi o o tatou agaga ua atoatoa le atinaeina i le faatumuina ia Keriso. E mafai ona tulitulimatagauina le atoaga o le agaga i le taimi o le aoaoina i le olaga faitino ma aafiaga faaopoopo o le lalolagi o

Ina ua taulai atu Peteru i le Alii ma faatino le faatuatua, sa ia te ia le mana e faia ai mea sa le mafai ona faia e ia lava—o le savali i luga o le vai. O lenei aafiaga e faatino ai le mauaina o le alofa tunoa a le Alii i o tatou taimi e manaomia ai.

agaga, ae o le atoaga o le agaga e le iu ina faataunuina sia oo i le Toetutu.

E faaopoopo i le le atoatoa o i ai nei a o tatou agaga, o o tatou tino faitino e le atoatoa foi. E ui e matagofie i lau, o o tatou tino faitino e tatau ona pala, faaleagaina, ma oti ma i manaoga, fia galala, ma manaoga tatou te lei fetaiiai muamua. I lea tulaga e matua faigata ai ona faalagolago

atoa le tino i le finagalo o le agaga. E tele ina gauai atu le agaga i mea e fiafia i ai le tino. O nisi o agaga maoae sa o mai i le lalolagi sa tauivi e faatoafimalie o latou tino faaletino. “Ua faanoanoa lou loto ona o lou tino,” na alaga ai Nifae. “Ua siosiomia au, ona o faaosoosoga ma agasala ua faigofie ona lavelavea ai au” (2 Nifae 4:17, 18; tagai foi fuaiupu 27).

O le taua i le va o le agaga ma le tino ua matua faigata ona o se isi mea moni o le olaga faitino. O o tatou tino faaletino ua foafoaina i anomea o se lalolagi “pau”, lea e tuuina atu ia Satani se “mana [faapitoa] e faatagataotaua [ai]” (2 Nifae 2:29). Sa faia e Peresitene Polika Iaga (1801–77) le faamatalaga lenei: “Aua nei tou faapea o le a tatou saoloto pea i le tino mai i faaosoosoga e agasala,” o lana tala lea. “O nisi ua faapea e mafai i le tino ona latou avea ma tino ma agaga faapaiaina ma mama ai lea latou le toe lagonaina ai aafiaga o le mana o le fili o le mea moni. Pe ana faapea e mafai ona ausia e se tagata lenei tikeri o le atoatoa i la le tino e le mafai ona oti o ia, pe tumau ai i le lalolagi lea o loo i ai le agasala. . . . Ou te manatu e tatau ona tatou lagonaina i se tulaga fesuisuiia ia aafiaga o le agasala i le umi tatou te feola ai, ma tatau ai ona pasia le tofotofoga o le maliu mulimuli ane.”¹

O Le Mana Paia o le Alofa Tunoa

Tatou te manaomia se mana paia lea e mafai ona liua o tatou agaga ma o tatou vaivaiga ma le atoatoa i le lelei faatasi ai ma malosiaga, amio mama, ma gafatia e i ai faatasi. Ma le faafetai ai, o loo i ai sea mana paia; o le alofa tunoa a le Atua. Ua na o le meaalofa o le alofa tunoa a le Atua tatou te “faaopoopo i luga” (Aperaamo 3:26), i lena taimi, tatou te ausia ai le faatumuina ia Keriso. E moni, o le auala lenei sa ausia ai e Keriso Lona atoaga.

E pei ona fetalai le Alii ia Iosefa Samita, “O ia o le e mauaina le malamalama, ma tumau pea i le Atua, e mauaina le malamalama atili; ma o lena malamalama o le a tupu susulu malamalama tele pea lava pea seia oo i le aso e atoatoa ai” (MF&F 50:24). Ae pe a tatou taulimaina ma le faasamasamanoa, tuu ese, e oo ina le amanaiaina ia faamanuiaga mutimutivale tatou te maua mai le Alii, ona “[ua] taofia lea o mea e silisili” mai ia i tatou (3 Nifae 26:10). I ia tulaga, tatou te maua le “tali fua o le alofa tunoa o le Atua” (2 Korinito 6:1) ma iu ai ina “pau o le tagata mai le alofa tunoa” (MF&F 20:32) faatasi.



Ua fautua mai e nei vaega uma, e tatau ona tatou aoao ia onosai ia i tatou lava ma isi i o tatou vaivaiga ma le atoatoa o i ai, ma e tatau ona tatou aoao e tumau i le faagasologa faifai pea e lemafaafitia o le tuputupu ae i le atoatoa.

Faatuatua ia Iesu Keriso

O le malamalama i le auala e tuuina mai ai le alofa tunoa e fesoasoani ia i tatou e malamalama ai pe faapefea e nisi o mataupu faavae ona mafaia atoa ai e le alofa tunoa ona faatumulia i tatou. O le faatuatua ia Iesu Keriso o le mataupu faavae muamua lea e taitaia i tatou ia maua le alofa tunoa (tagai Roma 5:1–2). O le upumoni, faamoemoe, faatinoga, ma molimau mautinoa o vaega taua ia o le faatuatua ma o le auala i le mauaina o le alofa tunoa a le Alii.

Mafaufau, mo se faataitaiga, i le aafiaga a Peteru i le savali i luga o le vai i le Alii. E pei o i tatou i nisi o taimi, sa i ai Peteru ma au aposetolo i le lotolotoi o se vasa sousou.

Sa afio ifo Iesu ia i latou, a o savali i luga o le vai ma talosagaina i latou e o atu ia te Ia. Ma le faamoemoe, sa sau ai Peteru i fafo o le vaa i totonu o le vasa sousou ma savali atu i le Alii. O lona faamoemoe ia Keriso, faatasi ai ma le faatinoga naunautai, sa faatagaina ai o ia e maua le mana o le savali i luga o le vai. Peitai, i le vaai atu i le afa ua siomia ai o ia, sa masalosalo ai Peteru ma amata ai ona magoto. “Le Alii e, ia e faaola mai ia te au,” na alaga atu ai. I le tali ai, ua faamaumau e tusitusa paia sa “aapa atu loa lea e Iesu o lona aao, ua tago ia te ia” (Mataio 14:30–31). Ina ua gauai atu le vaai a Peteru i le Alii ma galue i le faatuatua, sa ia te ia le mana e faia ai le mea sa le mafai ona ia faia na o ia lava—o le savali i luga o le vai.

Ina ua aveese le gauai atu o le vaai a Peteru i le Alii ma masalosalo, sa faamamao e Peteru o ia lava mai lena mana, sa tuua ai na o ia lava, ma amata ai ona magoto. Ia manatua lelei le tali a le Alii i le alaga

a Peteru mo se fesoasoani. Sa “[aapa atu] loa lea” e le Alii Lona aao e faasaoina mai o ia. O lenei aafiaga e faatino ai le mauaina o le alofa tunoa a le Alii i o tatou taimi e manaomia ai.

Salamo

O le salamo o le mataupu faavae lona lua e mafai ai e le alofa tunoa ona faatumulia i tatou. Sa aoao mai Mamona: “O lea, amuia lava i latou o e o le a salamo ma faalogo i le siufogoa o le Alii lo latou Atua; ona o i latou ia o e o le a faaolaina. Ma ia tuuina mai e le Atua . . . , i lona atoatoa silisili, ina ia mafai ona aumai o tagata i le salamo ma galuega lelei, ina ia mafai ona toefuataiina ia i latou le alofa tunoa mo le alofa tunoa, e tusa ma a latou galuega” (Helamana

*O le faatuatua ia Iesu Keriso o
le mataupu faavae muamua lea
e taliaina le alofa tunoa. O le
salamo, o le mataupu faavae lona
lua lea e mafai ai e le alofa tunoa
ona faatumulia i tatou.*

12:23–24). Mai lenei mau, e manino lava o se loto salamo ma galuega lelei e tusa ai ma le alofa tunoa.

Mafaufau i le faataitaiga a Alema le Itiiti. O ia, faatasi ai ma atalii o Mosaea, “sa avea i latou ma tagata agasala sili ona leaga” (Mosaea 28:4). Ina ua faaali mai le agelu

a le Atua ia Alema, sa fetaiai o ia ma agasala uma ma faigata o lona olaga. I lena taimi sa “tigaina [o ia] i le mafatia faavavau” (Alema 36:12). “O le mafaufau ifo i lou alu atu i luma o lou Atua,” na saunoa ai, “sa matua falo tigaina ai lou agaga i le matau tele” (Alema 36:14). Ae sa manatua e Alema sa tautalagia e lona tama e tusa ai ma le afio mai o Iesu Keriso e togiola mo le agasala a le lalolagi. O lenei manatuaga sa musuia ai o ia e alaga atu i lona loto, “E, Iesu e, oe le Alo o le Atua, ia e alofa mutimutivale mai ia te au” (Alema 36:18). Sa vave, ona ia “[mafai] ona le toe manatuaina [ona] tiga” ma “atu-atuvaleina i le manatuaina o [ona] agasala” (Alema 36:19).

Sa faafeiloai e le agaga salamo a Alema se mana e faamamaina ma liua ai o ia i se tagata fou. Sa lei toe saili o ia e faaleaga le Ekalesia a le Atua. Ae, mo aso na totoe o lona olaga, sa galue Alema e atiae i luga le Ekalesia e ala i le galue e fesoasoani i isi ia salamo ma maua le Agaga Paia. O le liua a Alema le Itiiti mai le avea ma tagata agasala sili ona leaga i le perofeta a le Atua o se faataitaiga mamana o le mana o le alofa tunoa a le Alii e faamsino tonu ai ma faamamaina ai i tatou uma taitoatas.

Lotomaualalo

O le mataupu faavae lona tolu o le lotomaualalo. Sa aoao e le Alii Moronae, “Ua lava lo’u alofa tunoa i tagata uma o e faamaulaloina i latou lava i o’u luma; aua afai latou te faamaulaloina i latou lava i ou luma, ma faatuatua ia te au, ona ou faia lea o mea vaivai ma mea malolosi ia te i latou” (Eteru 12:27). O le faia o mea vaivai e avea ma mea malolosi o le galuega a le alofa tunoa.

Afai e manaomia le lotomaualalo, e tatau la ona tatou fesili po o le a le lotomaualalo. I se faaupuga puupuu, o le lotomaualalo o le gauai atu o le loto o se tasi i le finagalo a le Atua ma tuuina atu ia te Ia le mamalu mo mea ua ausiaina. I lenei tulaga, o Iesu Keriso

o lo tatou faataitaiga sili. O Lona lotomaualalo ma le usiusitai sa atoatoa le tuuina atu i le taimi o Lana taulaga togiola. Sa tatalo Iesu, "Lo'u Tama e, afai e mafai, ia ave ese lenei ipu ia te au; ae aua le faia lo'u loto, ao lou finagalo" (Mataio 26:39). Ua faatumulia le atoatoa o le alofa tunoa a le Atua i lenei tulaga.

Filogā

O le mataupu faavae lona fa o le filiga. E pei ona aoao e Nifae lona nuu, "E faaolaina i tatou i le alofa tunoa, pe a uma mea uma e mafai ona tatou faia" (2 Nifae 25:23). O nisi atonu e faitaunia lenei mau e faapea o le a taofia le alofa tunoa a le Atua seia oo ina tatou tuuina atu la tatou taumafaiga sili. Ou te le talitonu o lona uiga lena. O loo i ai lava le tele o faataitaiga o le alofa tunoa a le Atua ua tuuina atu i le tagata e aunoa ma lona faia o se mea. O le mana o le Toetu, mo se faataitaiga, ua tuuina atu i tagata uma e le alofa tunoa a le Atua, e tusa lava po a taumafaiga a tagata taitoatasi. Ou te malamalama i le gagana a Nifae o "mea uma e mafai ona tatou faia" o lona uiga ua tuuina mai le alofa tunoa a le Atua ia i tatou pe a tatou filiga. E pei ona tusia e Elder Bruce C. Hafen, sa avea muamua ma sui o le Fitugafulu, "O le meaalofa o le alofa tunoa a le Faaola ia i tatou e le tapulaa i le 'maea' ai o mea uma e mafai ona tatou faia. Atonu tatou te maua lona alofa tunoa ao lei, i le aluga o le taimi, ma le maea ai o le taimi pe a tatou faalautele o tatou lava taumafaiga."²

Mafaufau i le faataitaiga a le uso o Iareto. Sa faatonuina o ia e fausia ni vaa ma faaaoga i latou e sopoia ai le vasa. I lea laasaga i lea laasaga, sa filiga ai le uso o Iareto e mulimuli i le faatonuga a le Alii. Ao ia faamaeaina [le fauina] o vaa, sa amata ona popole le uso o Iareto i le pogisa i totonu o vaa ma ole atu i le Alii e tuuina mai le malamalama. Ao faigofie ai ona vave ona mafai e le Alii ona tuuina atu i le uso o Iareto le vaifofo, sa la fesili atu





ai, “O le a se mea tou te mananao ia ou faia ina ia outou maua se malamalama i totonu o o outou vaa?” ((Eteru 2:23). I le tali atu, sa saunia ma le filiga e le uso o Iareto ni maa e 16, ma tuuina atu i le Alii, ma ole atu ina ia pai o Ia ia i latou ia “latou susulu atu i le pogisa” (tagai Eteru 3:1–4).

Sa lei faataunuina uma e le uso o Iareto mea uma sa tuuina atu e le Alii ia faia e ia, e ui i lea, sa tuuina atu e le Alii Lona mana e fai ma sui o le uso o Iareto, ma le pai atu i maa taitasi ma mafai ai ona latou mauaina le malamalama na manaomia mo le faigamalaga sa faamoemoeina. I le faia o lea mea, sa faaali atu e le Alii Lona ia naunautai ma le saunia e tuuina atu Lona mana paia ia i tatou a o tatou faia ma le naunautai le mea sili e mafai ona tatou faia.

Usiusitai

O le matapu faavae lona lima o le usiusitai. “Afaiai tou te tausi i au poloaiga,” na

fetalai ai le Alii, “ o le a outou maua le alofa tunoa mo le alofa tunoa” (MF&F 93:20). Ua tuu e Moronae i le auala lenei: “Ma afai tou te faafiti outou lava mai mea e le faaleatua uma, ma alolofa i le Atua ma o outou manatu atoa, mafaufau, ma le malosi atoa, ona lava lea o lona alofa tunoa mo outou, ma o lona alofa tunoa e mafai ai ona outou atoatoa ia Keriso” (Moronae 10:32).

E aunoa ma le tuuitiitia o le poloaiga a le Alii e tausi poloaiga po o le poloaiga a Moronae e faafiti outou lava mai mea uma e le faaleatua, e tatou ona tatou malamalama e le faalagolago le alofa tunoa i lo tatou usiusitai atoatoa. Afai e faalagolago le alofa tunoa i lo tatou tausia ma le atoatoa o poloaiga po le faafitia atoatoa o i tatou lava mai i mea uma e faaleatua, o lo tatou le atoatoa faatauanau i le olaga faaletino o le a faavavau ona taofia i tatou mai le mauaina o le alofa tunoa. O le alofa tunoa ua faamoemoe e mafai ai e

i tatou ona atoatoa ona lelei le tausiaina atili o poloaiga ma ola atili i se olaga faaKeriso ma e pei o Keriso, seja tatou atiina ae ai le tino o Keriso.

O le poloaiga a le Alii e tausi poloaiga ma le poloaiga a Moronae ia faafiti i tatou lava mai mea uma e le faaleatua e tatau ona tatou faia nei mea i le mea sili tatou te mafaia. E ui e taua o tatou amioga, ae sili ai ona taua ia faamoemoega o o tatou loto.

Mauaina o le Agaga Paia ma le

Sailia o Meaalofa o le Agaga

O le mataupu faavae mulimuli o le mauaina o le Agaga Paia ma le sailia o meaalofa o le Agaga (tagai Mosaea 18:16). E moni, ua faatumulia i tatou i le alofa tunoa a le Atua pe a tatou maua le Agaga Paia, aua o le Agaga Paia e tuuina atu ma auina mai ia i tatou mana faa-paiaina, gafatia, ma faaatoatoaina.

I lenei tulaga, sa aoao mai e Elder Parley P. Pratt (1807–57) o le Korama a Aposetolo e Toasefululua le mea lenei: “O le meaalofa o le Agaga Paia . . . e faatelevaveina ia tomai uma, faateleina, faalauteleina, faalapoaina, ma faamamaina ia lagona lelei uma ma faanoanoaga, ma liua i latou e ala i le meaalofa o le atamai, i lo latou faaaogaina tatau. Na te musuia, atinaeina, seleseleina ma faatauaina ia lagona faanoanoa, fiafia, malu, agalelei, ma alofa. Na te musuia le amio mama, lelei, agaalofa, alofa, agalelei, ma le alofa mama. Na te atinaeina uiga lelei o se tagata, o ona foliga ma amioga. Na te faaleleia soifua maloloina, malosi, fiafia, ma lagona lelei. Na te faaolaolaina le malamalamama le faaletino o le tagata. Na te faamalosia ma tuuina atu le malosi i neura. E le gata i lea, o le sua i ivi, o le fiafia i le loto, o le malamalamama i mata, o pese i taliga, ma le ola i le tino atoa.”³

O na faamanuiaga e oo mai ia i tatou ao tatou mauaina le Agaga Paia pe a maea lo tatou papatisoga ma le faamauga. Sa aoao mai Elder Orson Pratt (1811–81) o le Korama a Aposetolo e Toasefululua e faapea “soo se taimi e nofo ai le Agaga Paia i se tagata, e le gata ona ia faamama, faapaia, ma faaatoatoa o ia, e tusa ai ma lona gauai atu i ana uunaiga, ae e tuuina atu ai foi ia te ia ni meaalofa, ua fuafuaina mo le manuia o ia lava ma isi. . . . Ua tuuina atu nei meaalofa faaleagaga i tagata o le Ekalesia, e tusa ai ma lo latou faatuatua, tulaga, gafatia masani, tiute, ma valaauga; ina ia aoaoina ma le tatau tagata uma, faamauina, faaatoatoaina, ma laveaiina.”⁴

O Le Lava o le Alofa Tunoa a le Atua

Ua faatumulia Iesu Keriso i le alofa tunoa. Sa mauaina e Keriso oa o Lona alofa tunoa mai Lona Tama ma faia “mo le alofa tunoa” (MF&F 93:12). I se auala faapea tatou te mauaina le alofa tunoa mo le alofa tunoa. O le a faaeeina mai ia i tatou uiga ma amioga uma a le Atua. Mea mulimuli, o lenei mana gafatia ma atoatoa o le alofa tunoa e maua e ala i mataupu faavae o le faatuatua, salamo, lotomaualalo, filiga, usiusitai, ma le sailia o le Agaga ma ana meaalofa.

Ua lava le alofa tunoa a le Alii e siitia ai oe mai le oti ma le agasala ma faaeaina oe i le ola e faavavau. Ua lava e suaia ai oe, liua ai oe, ma faaatoatoa ai oe. Ua lava e mafai ai e oe ona faataunuu lou gafatia paia o se atalii po o se afafine o le Atua. ■

Mai se saunoaga o le Faigalotu o Aoga a le Ekalesia, “His Grace Is Sufficient for You,” na tuuina atu i le Iunivesite o Poloka Iaga-Hawaii i le aso 3 o Iuni, 2014. Mo le saunoaga atoa, alu i le broadcast.lds.org.

*Ua lava le alofa tunoa a le Alii e
siitia ai oe mai le oti ma le agasala
ma faaeaina oe i le ola e faavavau.*

*E lava ina ia suaia ai oe, liua ai
oe, ma faaatoatoa ai oe.*

FAAMATALAGA

1. Brigham Young, i le *Deseret News*, June 3, 1863.
2. Bruce C. Hafen, *The Broken Heart: Applying the Atonement to Life's Experiences* (1989), 155–56.
3. Parley P. Pratt, *Key to the Science of Theology: A Voice of Warning* (1978), 61.
4. Orson Pratt, i le *Masterful Discourses and Writings of Orson Pratt*, comp. N. Lundwall (1962), 570, 571.



Jorge Cocco Santangelo 15

Jorge Orlando Cocco Santangelo,
O Le Valaua (tagai Mataio 4:19–20),
Atenitina, Manumalo i le
Taui o Faatauga

O LE TAUVAGA O
FAATUFUGAGA
FAAVAOMALO
LONA 10:

tau mai
tala ia

Esa

*Sabrina Jill Squires,
O Le Talisuaga
Mulimuli (tagai
Ioane 13:1–35),
Iunaite Setete*

O mea nei o se faataitaiga o faatufugaga mai le Tauvaga o Faatufugaga Faavaomalo Lona 10 sa faaali lata mai nei i le Fale Mataaga o le Talafaasolopito a le Ekalesia i le Aai o Sate Leki, Iuta. E iva sefulu valu vaega o faatufugaga sa filifilia mai le 944 o faatufugaga na auina mai mai atunuu e 40 i le lalolagi atoa. Sa mafai e le au faatufugaga ona filifili soo se tala mai le soifua o lo tatou Faaoala o Iesu Keriso o se autu o lo latou mamanu. O faamatalaga o nei tala sa faaalia i ata vali, ata, faatagata, maamora, ata na pueina, tuufatasiga o mea eseese, suisuiga, tioata teuteu, ma masini omiomni.

E mafai ona e maimoa i le faaaliga i le initonet i le lds.org/go/10art.



*Meagan Ruth Getz,
Ua Matou O Mai
ai e Ifo Atu ia te Ia
(tagai Mataio 2:1–2),
Iunaite Setete*



*Michael Malm, Ia
Faatasi ma le Atua
(tagai i le Faaliliuga
a Josefa Samita,
Mataio 4:1 fi le
Mataio 4:1, vaefaa-
matalaga e]), Iunaite
Setete, Manumalo i
le Taui o Faatauga*



*Robin Birrell, Sa Ia Taoina
Areto ma Faamatutu Ia (tagai
Ioane 6:9–14), Iunaite Setete;
Rob Adamson, Mauga o Liua
(tagai Mataio 17:2),
Iunaite Setete*





Elspeth Young, Ua ia te Au foi Isi Mamoe (tagai Ioane 10:16), Iunaite Setete


Caitlin Maxfield Connolly, O Se Fafine e Talitonu (tagai Mataio 9:22), Iunaite Setete, Manumalo i le Tau i o Faatauga



Erin Meads, O Ana Mea Uma e Ola Ai: Tupe Iti a le Fafine ua Oti Lana Tane (tagai Mareko 12:44), Iunaite Setete



Matthew Hyrum Dell, O Le Fuafuaga o le Faaolataga (tagai Ioane 3:16), Ausetalia




*Michal Diane Onyon,
O Le Leoleo
Mamoe Lelei
(tagai Luka 15:4),
Iunaite Setete*



*Kathleen Peterson,
Iesu ma le
Fafine na Molia
(tagai Ioane 8:11),
Iunaite Setete*





*Kazuko Covington,
Lalolagi e leai se Mutaaga
(tagai Mose 2), Iapani*



Saunia e Elder
M. Russell Ballard

O Le Korama
a Apostolo e
Toasefululua

E ALAILE SUESUE MALE FAATUATUA

*Tau ina ia outou maua le olioli ma le filemu lea
e oo mai i le iloaina e ala atu i au aoaoga, ua e pai
atu ai i se olaga ma siitaina se tasi o fanau a le Tama
Faalelagi i le malaga e toe foi atu ai i Lona afioaga.*

I se fonotaga faaleaoaoga mo Pulega Aoao, sa saunoa ai Peresitene Gordon B. Hinckley (1910-2008) e faatatau i le aoao atu o le aoaoga faavae a le Ekalesia: “E le tatau ona tatou matua faaeteete. E tatau ona tatou mataala ia aua nei o tatou se ese mai i le [ala]. I a tatou taumafaiga ina ia tulaga ese, atonu tatou te aoao atu ai ni mea e matua le ogatusa lava ma aoaoga faavae autu o lenei Ekalesia toefuataiina a Iesu Keriso. . . . E tatau ona tatou matua mataalia. . . . E tatau ona avea i tatou ma tagata vaai i luga o le olo.”¹

Ao agai atu i luma ia aoaoga a le Ekalesia i le seneturi lona 21, ua tatau ia tatou faiaoga ona mafaufau i soo se suiga e manaomia ona faia i le ala latou te saunia ai e aoao atu, le ala o latou aoao atu ai, ma mea o latou aoao atu pe afai o le a latou fausia se faatuatua le maluelue i olaga o a tatou talavou faapelepele.

Ua mou atu na aso lea pe a fai mai ai e se tamaitiiti aoga se fesili faamaoni ae tali atu se faiaoga, “Aua le popole!” Ua mou atu na aso lea pe a tuu mai ai e se tamaitiiti aoga se popolega faamaoni ae tuu atu e se faiaoga lana molimau o se tali ua fuafuaina e taofia ai le faafitalui. Ua mou atu na aso lea e puipuia ai tamaiti aoga mai tagata o e osofaia le Ekalesia.

I nei finagalo faaalua i faiaoga faalelotu a le Ofisa o Aoga a le Ekalesia, na faasoa atu ai e Elder Ballard ni mataupu faavae ma se fautuaga lea e faatatau i tagata uma o e o faiaoga i le Ekalesia.



O le mea e lelei ai, ua tuuina mai e le Alii lenei faatuaga taua ma le faatapulaaina i faiaoga "Ma talu ai ona ua le maua e tagata uma le faatuatua, ia outou saili ma le filiga ma aoao i le tasi upu o le poto; ioe, ia outou saili mai totonu o tusi sili ona lelei upu o le poto; saili i le aoaoina, e ala lava lea i le suesue ma le faatuatua foi." (MF&F 88:118)

E matuai faatatau lava lenei mea i lenei vaitaimi aua e le o a tatou tamaiti aoga uma ua maua le faatuatua lea e manaomia e fetaiai ai ma luitau o i luma atu atu ma ona o le toatele o i latou ua leva ona aafia e ala i le initoneti i malosiaga leaga o se lalolagi ua faateleina tulaga faalelalolagi lea e tetee atu ai i le faatuatua, aiga, ma tulaga faatonuina o le talalelei. Ua faateleina le oo atu o le initoneti i le salafa o le lalolagi i le toeitiiti lava i totonu o aiga uma ma i lima ma mafaufau o a tatou tamaiti aoga.

E mafai ona e fesoasoani i tamaiti aoga e ala i le aoaoina o i latou i le uiga o le tuufaatasia o le suesue ma le faatuatua ao latou aoao. Aoao atu i latou e ala i le faataitaia o lenei tomai ma faiga i totonu o le vasega.

Na matauina e Peresitene Harold B. Lee (1899–1973) faapea:

"Matou te faamanatu atu ia te outou o le mauaina o le poto e ala i le faatuatua e le o se tulaga faigofie e oo atu ai i le aoaoina. E manaomia ai taumafaiga malolosi ma le tauivi faifaipea e ala i le faatuatua. . . .

"O le aoaoina e ala i le faatuatua e le o se galuega mo se alii [po o se fafine] paie. Sa fai mai se tagata, o le mea moni, o lea ituaiga faiga e manaomia ai le gagauina o le agaga atoa, le valaau atu mai le loloto o le mafaufau o le tagata ma fesootai ma le Atua—e tatau ona fatuina ai le fesooataiga sao. Ona oo mai ai lea o le 'malamalamama e ala i le faatuatua.'"²

O le malamalamama e ala i le faatuatua o le a fatuina ai se molimau mama, ma ua i ai i se molimau mama le mana e suia ai olaga, e pei ona faailoa mai i tala pupuu nei.

Tala e Tolu

Sa tuua e Fipe Kata lona aiga i Maine, ISA, ina ia faatasi ma le Au Paia i Ohaio i le vaitausaga o le 1830. Sa ia toe manatua: "Sa ofo au uo i le mea na ou faia, e pei foi o au, ae na i ai se mea na uunaia ai au. Sa tau le mafai

ona ou onosaia le faanoanoa o lou tina i lou tuua o le aiga; ma pe ana leai le agaga i totonus manou ou te faavaivai.³

Na mulimuli Fipe i le Perofeta o Josefa Samita ma faapopotopoto faatasi ma le Au Paia i Ohaio ma mulimuli ane ai i Iuta, lea sa ia maliu ai o se Au Paia faamaoni o Aso e Gata Ai ma na tauamo tutusa le avega o se faletua o le Peresitene o le Ekalesia o Uilifoti Utilafi (1807-98).

Ao avea ai ma se tamaititi aoga o le kolisi, sa filifili ai Marion G. Romney (1897-1988) e le mafai ona ia faia se misiona ona o tulaga tautupe a lona aiga. Ae, i se tasi mea na tupu, sa ia faalogo ai o saunoa Elder Melvin J. Ballard (1873-1939). O se faamatalaga mai le talaaga, "E lei iloaina e [Marion] o le a matua sua lava lona olaga, i se taimi puupuu lava."

Na faaaauau pea le tala: "Mo le taimi muamua lava . . . sa matua malamalamo Marion i le i ai i lalo o se faatosinaga a se uunaiga. Na tumu lona loto i lagona maatiati maaleale. Na te lei lagonaina lava muamua . . . le ootia tele e pei ona ia lagona i le taimi nei, i le faalogo atu i upu a lenei Apostolo sili ona fou. . . .

" . . . O le susulu o foliga a le Apostolo ma le moni o [lana] molimau na faatumulia ai o ia ma se manao le mateteeina

O le toatele o a tatou tagata talavou ua matua masani lava i le Google nai lo le talalelei, ua sili ona gauai atu i le Initoneti nai lo musumusuga, ma sili atu ona aafia i le Tusifoliga [Facebook] nai lo le faatuatua.

e alu i se misiona. . . . Sa iloa ua tatau ona tolopo ana fuafuaga mo le faalauteleina o lana aoga."⁴

E lei umi, ae ua agai atu Marion i Ausetalia, lea na ia auauna atu ai ma le faamaoni. Mulimuli ane sa avea o ia ma se Apostolo malosi ma se tasi o le Au Peresitene Sili.

O le tala mulimuli e mai ia Peresitene Boyd K. Packer (1924-2015), o le Peresitene o le Korama a le Toasefululu, e uiga i le aafiaga o se faiaoga matua ia Viliamu E. Berret. O le faiaoga, o se tagata liliu mai mai Nouei, e le lelei sona malamalamaga i le gagana Peretania. E ui i tulaga tapulaa o le faiaoga, sa taua e Peresitene Packer, sa molimau

Brother Berret e uiga i lana faiaoga, "Na mafai ona faamafanaina o matou lima i le afi o lona faatuatua."⁵

Mulimuli ane, sa avea Viliamu ma taitai o seminare, inisitituti, ma aoga a le Ekalesia.

Mo Fipe, Marion, ma Viliamu, o le faalogo atu i se molimau mama atoatoa na avea ma mafuaaga na suaia ai o latou olaga e faavavau. E moni foi lena mea mo i latou o e aoaoina. Ae, o le iloaina o tulaga moni o i ai le lalolagi i le taimi nei, atonu o le a le lava se molimau mama atoatoa. Sa mama atoatoa ma saoloto mai Fipe, Marion, ma Viliamu mai ponokalafi ma amioga faaleelalolagi ao latou saofafai ai i vae o faifeautalai, faiaoga, ma taitai musuia. Sa faigofie lava ona uunaia e le Agaga o latou loto vaivai ma mama.

Ua matua tele lava se eseesege o le tala i lenei vaitaimi. O le toatele o a outou tamaiti aoga ua leva ona aafia i ponokalafi ma amioga faaleelalolagi ao lei taitai oo atu i a outou vasega.

Sa na o se tupulaga ua mavae atu lea sa faatapulaa ai le faaaogaina e a tatou tagata talavou o faamatalaga e uiga i la tatou talafaasolopito, aoaoga faavae, ma faatinoga i anomea ia na lolomiina e le Ekalesia. Sa fesootai ni nai tamaiti aoga ma ni faaliliuga e ese mai ai. O le toatele o a tatou tagata talavou na ola i ni olaga malupuipuia.

O a tatou mataupu aoaoina i lena taimi, e ui sa lelei, ae sa lei saunia tamaiti aoga mo lenei vaitaimi—o se vaitaimi e toetoe lava a maua faafuasei mea uma e uiga i le Ekalesia mai soo se tulaga e mafai ai. Ua tatou vaaia i le asō ia latou masini feaveai ia mea e foliga mai e le gata ina luitauina ai le faatuatua ae e uunaia ai foi le faatuatua. O le toatele o a tatou tagata talavou ua matua masani lava i le Google nai lo le talalelei, ua sili ona gauai atu i le Initoneti nai lo musumusuga, ma sili atu ona aafia i le Tusifoliga [Facebook] nai lo le faatuatua.

Atamai i Aoaoga Faavae

E tusa ai ma nei luitau, ua faamaonia ai talu ai nei e le au Faatonu o Aoga a le Ekalesia se fuafuaga taulamua i le seminare ua taua o le Atamai i Aoaoga Faavae. E faaaauai mai ai i le mea ua uma ona faia i Mau Tauloto, o lenei fuafuaga taulamua e taulai atu i le atinaeina ma le faamalosia o le faatuatua o a tatou tamaiti aoga ia Iesu Keriso ma faamalosia i latou ma faateleina le tomai ia ola ma faaaoga le talalelei i o latou olaga. O le mafaufau ai i mau ma upu a perofeta, o le a latou aoao ai i le ala e faatino ai le faatuatua

ia Keriso ina ia maua le malamalama faaleagaga ma le malamalamaaga e uiga i Lana talalelei. Ma o le a latou maua ni avanoa e aoao ai i le auala e faaaoga ai le aoaoga faavae a Keriso ma mataupu faavae o le talalelei i fesili ma luitau latou te faalogo ma vaai i ai i aso uma i a latou uo faapea i luga o ala faasalalau faaagafesootai.

O lenei fuafuaga taulamua e musuia ma ua talafeagai. O le a matagofie se faatosinaga i luga o a tatou tagata talavou. Peitai, o le manuia o le Atamai i Aoaoga Faave, ma isi polokalama uma o suesuega i le Ofisa o Aoga a le Ekalesia, o le a faalagolago le tulaga taua i luga o a tatou faiaoga.

I le feagai ai ma nei luitau, o a avanoa ma tiutetauave o i ai i faiaoga o le talalelei i le seneturi lona 21? E mautinoa lava e tatau ia te outou faiaoga ona alolofa i le Alii, Lana Ekalesia, ma au tamaiti aoga. E tatau foi ona e tuuina soo atu ma le faamaoni sau molimau mama atoatoa. E le gata foi i lea, e sili atu nai lo soo se taimi i la tatou talafaasolopito, e manaomia foi e au tamaiti aoga le faamanuina e ala i le aoaoina o anotusi ma talaaga o aoaoga faavae ma tala faaanamua i le suesue ma le faatuatua lea e o faatasi ma se molimau mama atoatoa ina ia mafai ona latou maua se liua faatagata matua ma tumau i le talalelei ma se talitonuga o le olaga atoa ia Iesu Keriso. O le liua faatagata matua ma tumau o lona uiga o le a latou “nonofo i totonu o le vaa ma pipiimau” i o latou olaga atoa.⁶

Ina ia mafai ona e malamalama i anotusi ma talaaga o aoaoga faavae ma tala faaanamua, e tatau ona e suesue mai i “tusi sili,” e pei aoao mai le Alii (MF&F 88:118). O “tusi sili” e aofia ai tusitusiga paia, o aoaoga a perofeta ma aposetolo o aso nei, ma tusi sili a le AAG o loo maua. E ala atu i au taumafaiga maelega ina ia aoao e ala i le suesue ma le faatuatua, o le a mafai ai ona e fesoasoani i au tamaiti aoga e aoao ia tomai ma uiga e manaomia e iloa ai le va o faamatalaga

faatuatuaaina lea o le a siitiina i latou i luga ma mea e le atoatoa le moni ma faaliliuga le sao o aoaoga faavae, talafaasolopito, ma faiga lea o le a aumaia i latou i lalo.

Aoao atu i latou e uiga i luitau e fetaiai ma i latou pe a latou faalagolago atu i le Initoneti mo tali o fesili e taua faavavau. Faamanatu atu ia i latou e lei fai mai Iakopo, “A e afai ua leai se poto i so outou, fai atu ia te ia e Google!” (tagai Iakopo 1:5).

O tagata atamamai e le faalagolago i le Initoneti e sue pe togaftia ai ni luitau po o ni faigata faalesoifua maloloina faalelagona, faalemafaufau, ma le faaletino, aemaise lava pe afai o aafia ai le soifua. Nai lo lena, latou te saili i tagata atamamai o le soifua maloloina, i latou ua aaooina ma maua faailoga mai le au faatonu aloaia o le soifua maloloina ma le atunu. E tusa lava pe ua oo i lena tulaga, e sue lava e tagata atamamai se manatu lona lua.

Afai o se ala talafeagai lena i le sailia o ni tali mo faafitauli faalesoifua maloloina faalelagona, faalemafaufau, ma faaletino, o le a sili atu la pe afai o loo aafia ai le ola e faavavau. Afai ua i ai i se mea le gafatia e lamatia ai lo tatou ola faaleagaga, a tatou mafutaga faaleaiga sili ona pele, ma lo tatou auai i le malo, ua tatau loa ona tatou saili ni taitai magafagafa lelei ma faamaoni e fesoasoani ia i tatou. Ma, pe afai e talafeagai ai, ua tatau ona tatou talosagaina i latou o i ai ni aoaoga faakatemia, aafiaga, ma tomai faapitoa talafeagai mo se fesoasoani.

O le mea tonu lava lea ou te faia pe a ou manaomia se tali i ni au lava fesili lea e le mafai ona ou taliina e au lava ia. Ou te saili se fesoasoani mai i ou Uso i le Korama a le Toasefululua ma mai isi o i ai se tomai i vaega o le talafaasolopito ma aoaoga faavae o le Ekalesia.

O faiaoga o le talalelei e tatau ona avea ma uluai tagata—i fafo atu o aiga a le tamaiti aoga lava ia—e faalauiloa atu ni punaoa faatuatuaaina i autu ia e ono le tele se iloa i ai pe



MALE FAATUATUA



feteenai foi ina ia mafai ai e tamaiti aoga ona fua i ai soo se mea latou te faalogo pe faitau i ai mulimuli ane i mea ia ua uma ona aoaoina ai i latou.

Puipuiga Faaleagaga

Tatou te tuu atu ni puipuiga faafomai i a tatou faifeautalai pele ao lei auina atu i latou i le misiona ina ia puipuia mai i latou mai faamai lea e mafai ona lamatia ai i latou. I se tulaga lava faapena, ao lei auina atu a tatou tamaiti aoga i le lalolagi, puipui i latou e ala i le tuuina atu o ni faamalamalamaga moni, magafagafa, ma sao e uiga i aoaoga faavae o le talalelei, tusitusiga paia, la tatou talafaasolopito, ma autu ia e tele ina sese le faauigaga.

O le tauina atu o nisi o ia autu lea e le iloa tele pe feteenai, ou te tautala atu ai e uiga i le autaunonofo, maa talifaaliga, faamatalaga eseese o le Uluai Faaaliga, o le faagasologa o le faaliliuga o le Tusi a Mamona po o le Tusi a Aperaamo, tulaga i itupa, ituaiga o tagata ma le perisitua, ma se Tina Faalelagi.

O taumafaiga ina ia puipui o tatou tagata talavou o le a matele ina pau atu i faiaoga o le Ofisa o Aoga a le Ekalesia. O le mafaufau ai faapea, saili se taimi e mafaufau ai e uiga i ou avanoa ma ou tiutetauave.

Ua silafia lelei lava e taitai o le Ekalesia le tapulaa o le mauaina o faamatalaga, ma o loo matou faia ni taumafaiga uigaese e saunia ai ia talaaga ma malamalamaga sao e uiga i aoaoga o le Toefuataiga. O se faataitaiga lelei lava o lenei taumafaiga o faamatalaga tusia o Autu o le Talalelei e 11 i le LDS.org⁷ lea ua saunia ni faamalamalamaga paleni ma faatuatua o mea moni mo mataupu o loo feteenai ma lē masani ai e faatatau i le Ekalesia.

E taua tele lou iloaina o anotusi o nei faamatalaga tusia. Afai e i ai soo sau fesili e uiga i ai, faamolemole fesili ane i se tasi o le na suesue ma malamalamama i ai. I nisi upu, "saili i le aoaoina, e ala lava lea i le suesue ma le faatuatua foi" (MF&F 88:118)

ao e matua malamalamama lelei i anotusi o nei faamatalaga tusia.

Ua tatau foi ona e faamasani i le uepisaite o le Joseph Smith Papers,⁸ o le vaega o talafaasolopito o le Ekalesia i le LDS.org, ma nisi punaoa mai tagata atama-mai faamaoni a le AAG.

O le taumafaiga mo le faamaninoina o le talalelei ma le puipuiga faaleagaga e ala atu i se suesuega magafagafa lelei o aoaoga faavae ma le talafaasolopito, faatasi ai ma se molimau mumu, o se vaifofo sili lea ua tatou maua e fesoasoani ai i tamaiti aoga ina ia aloese ma taulimaina ni fesili, masalosaloga, po o faafitauli o le faatuatua atonu o fetaiai ma i latou i lenei vaitau o faamatalaga.

Ao totogiina e outou faiaoga se tau ina ia malamalamama lelei atili i lo tatou talafaasolopito, aoaoga faavae, ma faatinoga—ia sili atu nai lo le tulaga o e i ai i le taimi nei—o le a tou sau-nia e tuuina atu ni tali magafagafa lelei, faaete-ete, ma musuia i fesili a au tamaiti aoga.

O se tasi o auala e iloa ai po o a fesili o i ai a au tamaiti aoga o le faalogo atu lea ma le totoa ia i latou. O faiaoga lelei uma e tatau ona avea ma tagata faalogo lelei. E le gata i le faalogologo atu i au tamaiti aoga, uunaia i latou i le vasega pe faaliloilo e fai atu ni fesili ia te oe e uiga i soo se autu. O se tasi o fesili sili ona taua atonu e fesili atu ai au tamaiti aoga o le "Aisea?" A fesili atu ma se manao faamaoni ina ia malamalamama, o le a avea le "Aisea?" ma se fesili maoae. O le fesili lea e mananao faifeautalai e fesili mai ai a latou tagata sailiili. Aisea ua tatou i ai iinei? Aisea e tutupu ai mea leaga i tagata lelei? Aisea e tatau ai ona tatou tatalo? Aisea e tatau ai ona tatou mulimuli ia Keriso? E masani lava o fesili "aisea" e taitai atu ai i musumusuga ma faaaliga. O le iloaina o le ata o le faaolataga a lo tatou Tama Faalelagi o le a fesoasoani ia te oe i le taliina o le tele o fesili "aisea".

O se tasi nei o faamatalaga faaiu e uiga i le taliina o fesili. E taua tele le aoao atu o a

tatou tamaiti aoga e ui ua saunia e le talalelei le tele, a le o lena o le tele naua, o tali i fesili sili ona taua o le olaga, o nisi o fesili e le mafai ona taliina i le olaga faaletino ona e le lava faamatalaga e manaomia mo se tali talafeagai. E pei ona tatou aoaoina i le Iakopo: “Faauta, ua silisili ma ofoofogia galuega a le Alii. Ua lē masuesueina lava le loloto o ana mealilo; ma e le mafai e le tagata ona iloa ona ala uma. Ma e leai se tasi na te iloa ona ala vagana ai ua faaalia ia te ia” (Iakopo 4:8; tagai foi MF&F 101:32–34).

O Se Upu Lapatai

Se‘i ou tuuina atu se upu lapatai. Faamolemole ia iloa atonu o le a e talitonu, e pei o le toatele o tamaiti aoga, o

O faamatalaga tusia o Autu o le Talalelei e 11 i le LDS.org ua saunia ni faamalamalamaga paleni ma faatuatuaina o mea moni mo mataupu o loo feteenai ma lē masani ma faataau i le Ekalesia.

oe o se tagata atamai tele i tusitusiga paia, aoaoga faavae, ma le talafaasolopito. Sa faaalia mai e se saililiga lata mai faapea “o le tele o le mafaufau o tagata faapea ua latou malamalama i se autu, o le tele foi lea o lo latou faamaonia o se malamalamaaga i tala atu o mea ua latou iloa, e oo lava i le tulaga o le faafoliga e malamalama . . . ma le faaseinea o faamatalaga.”⁹

O le faapea ua tatau ona *iloaina mea uma*, o se faaosoosoga ua tatau ona aloese mai ai a tatau faiaoga. E leai se mea e leaga ai le faapea atu, “ou te le iloaina.” Ae, o le taimi lava e te fai atu ai lena tala, ua ia te oe se tiutetauave e saili ai ni tali sili ona lelei i ni fesili lelei o tuuina mai e au tamaiti aoga (tagai MF&F 101:32–34).

Ao e aoao atu au tamaiti aoga ma tali atu ia latou fesili,

ou te fia lapatai atu ia te oe ia aua nei tuuina atu ni tala pepelo o le faatupuina o le faatuatua pe le faavaeina po o ni malamalamaaga tuai ma ni faamatalaga e uiga ia tatou aoaoga faavae ma faatinoga mai le taimi ua tuanai. O se tulaga atamai tele le avea ma se faataitaiga masani o le suesue i upu a perofeta ma aposetolo soifua; ia ogatasi pea ma mataupu, aiaiga faavae, ma faamatalaga o i ai nei a le Ekalesia e ala atu i le mormonnewsroom.org ma le LDS.org; ma saili atu i galuega a tagata popoto aloaia, magafagafa lelei, ma faamaoni a le AAG ina ia mautinoa ai e te le o aoaoina atu ni mea e le sao, tuai, pe le talafeagai.

O suesuega a tagata tusitala e uiga i le iloaina o mea uma ia na matauina faapea “o se tulaga o le faapea ua iloa mea uma, aemaise lava i vaaiga a tagata atamamai lava ia, . . . e ono faalotovaivai ai tagata taitoatasai mai le aotauina o i latou lava i na lava eria lea latou te mafaufau ua latou atamamai ai.”¹⁰

E faaopoopo atu ai i le avea ma ni tagata aoao o le olaga atoa, e tatau foi ona e faia na mea i lou lava olaga lea e faataga ai le Agaga Paia ia galue i totonu o oe. O ia mea e aofia ai le tatalo faamaoni i aso taitasi, anapogi faamaoni, suesuega faisoo ma le mafaufau loloto i tusitusiga paia ma upu a perofeta soifua, avea o le aso Sapati ma se aso fiafia, ai ma inu i le faamanatuga ma le agaga lotomaualalo ma manatua pea le Faaola, tapuai i le malumalu pe a mafai ai, ma le, mea mulimuli, aapa atu i e le tagolima, matitiva, ma ua tuua na o i latou—i latou uma o latalata ane ma i le salafa o le lalolagi!

Ina ia faataunuina ma le talafeagai ou avanoa ma tiuteauave, e tatau ona e faataitaia mea o e aoao atua!

Ia e lototoa e ala i le sailia o fautuaga ma faasaoga mai ia i latou e te faatuatuaina: o se toalua, taitai perisitua, po o ni supavaisa. Fesili atu ia i latou po o fea se vaega e mafai ona e faaleleia ai i lou tulaga faalesoo. Aloese mai soo se mea e tuliesea ai le Agaga

E le gata i lea, sei ou fautua atu ina ia faia sou faatalanaga ma oe lava ia i se taimi ma iloilo le 2 Nifae 26:29–32, Alema 5:14–30, ma le Mataupu Faavae ma Feagaiga 121:33–46? O le faia o lenei mea o le a fesoasoani e faailoa atu ai ia te oe ia ituaiga o faaosoosoga e ono fetaiai ma i tatou uma. Afai e i ai se mea e tatau ona suaia i lou olaga, ona mafaufau lea ia faaleleia.

Aloese mai le faaosoosoga o le fesiligia o faamoemoega o au uo faigaluega. Nai lo lena, tagai loloto lava i lou

lava loto ma saili i ou lava manaoga ma faamoemoega. Na o le pau lena o le tulaga e mafai ai e le Faaola ona sua lou loto ma faaogatusa ou manaoga ma faamoemoega faatasi ma Ia.

Ua tatau ona iloa, malamalama, opogi, ma auai le augatupulaga fiaie i le ata o le faaolataga a le Atua. O le malamalama i le fuafuaga o le a avatua ia i latou se malamalamaaga paia lea latou te vaai ai ia i latou lava o ni atalii ma afafine o le Atua, lea e saunia se tioata ia malamalama ai i le toeToe lava o aoaoga faavae uma, faiga, ma aiaiga faavae o le Ekalesia.

E tatau i faiaoga o le talalelei i lenei vaitaimi ona talia le avanoa ma le tiutetauave e aoao atu ia tagata talavou o le seneturi lona 21 i mataupu faavae sao e uiga i le fuafuaga,

e aofia ai le aoaoga faavae paia o le faaipoipoga ma le matafaioi o le aiga e pei ona faamanino mai i le folafolaga i le aiga.¹¹

O Le Aoaoga Faavae o le Faaipoipoga e Faavavau

O le aoaoga faavae o le faaipoipoga ma le aiga e faavavau o se vaega taua o le fuafuaga o le fiafia a le Atua. E aofia o tatou aiga ua faamauina i le malumalu o se vaega o le aiga e faavavau a le Tama Faalelagi lava ia i le malo selesitila. Talu ai e faatatau tonu lava lenei



la lototoa e ala i le sailia o fantuaga ma faasaoga mai ia i latou e te faatuatuaina: o se toalua, taitai perisitua, po o supavaisa. Fesili atu ia i latou po o fea se vaega e mafai ona e faaleleia ai i lou tulaga faalesoo.

aoaoga faavae i Lona lava aiga ma i Ana lava fanau agaga, ua aoaoina i tatou i le Kenese “na ia faia o i laua o le tane ma le fafine” ma na Ia poloaiina Tama Atamu ma Tina Eva ina ia “fanafanau ia, ma ia uluola, ma ia tumu ai le lalolagi” (tagai Kenese 1:27–28).

E i ai se tala faapea o le fuafuaga o le fiafia e amata ma faaiuina i le aiga. Ioe, na amata le aiga i le muai olaga, lea sa tatou nonofo faatasi ai o ni tagata o le aiga a o tatou matua faalelagi. Ma i le iuga, o tautinoga ma mafutaga alofa faaleaiga e le gata o le a faaauau pea ona i ai ae o le a

faateleina e ala i le faagasologa o le foafoaina (tagai MF&F 131:1–4; 132:19).

O le tulaga lea e fesootai uma ai—lea e faamoemoe i ai le fuafuaga a le Atua ma lo tatou taunuuga e faavavau ma faataamilo ai mea uma lava—o lo tatou Faaola lea, o Iesu Keriso. O Lana taulaga togiola ua mafai ai mea uma lava, e aofia ai ae le o faatapulaa ai i se aiga ma se faaipoipoga alofa, popole ma faavavau.

Ua aoao mai i tatou e le Alii e le mafai e se tagata e toatasi, e tusa lava po o le a le tulaga o lona amiontonu, ona mauaina mea uma ua i ai i le Tama Faalelagi mo Ana fanau. O se tagata e toatasi ua na o le afa lea o le fua, e le mafai ona aumau i le tikeri sili ona maualuga o le malo selesitila (tagai 1 Korinito 11:11; MF&F 131:1–4).

E tatau ona malamalamama au tamaiti aoga o le faamoe-moega o le olaga faaletino ina ia avea atili ai faapei o le Atua e ala i le mauaina o ni tino faaletino, faaaoga le faitalia, ma le amataina o ni matafaioi lea sa i ai muamua i na o matua faalelagi—matafaioi o le tane, ava, ma matua.

Ua faamautinoa mai e perofeta faapea o i latou uma o e ua agavaa ma ua faalagolago atu ia Iesu Keriso ae e lei mafai ona faamauina i se soa pe mauaina ni fanau i lenei olaga o le a maua na avanoa i le lalolagi a sau.

Aoao atu ia tagata talavou faapea i le Ekalesia a le Alii e tele naua avanoa mo tagata uma e tapuai ai, auauna atu, ma tuputupu ae ai faatasi o ni uso ma tuafafine i le talalelei. Faamanatu atu ia i latou mea sa aoao mai e Liae—e mafai ona aoteleina ia sini ma faamoemoega a le Atua mo Ana fanau uma faapea: “Na pau Atamu ina ia i ai tagata; ma ua i ai tagata, ina ia latou maua le olioli” (2 Nifae 2:25).

E finagalo le Tama Faalelagi ina ia tatou talia Lana faa-ugaga o le faaipoipoga ma usiusitai i Ana poloaiga ina “ia fanafanau ia, ma ia uluola” (Kenese 1:28)—e le gata ina ia faataunu ai Lana fuafuaga ae ia maua ai le olioli lea na mamanuina ai Lana fuafuaga e tuuina atu i Ona atalii ma afafine.

I le avea ai ma faiaoga o le Ekalesia, fesoasoani atu ia tatou talavou ina ia maua se malamalamaga manino e uiga i le fuafuaga o le fiafia a le Atua lea e oo moni mai ai lava le olioli i Ana fanau. Fesoasoani atu ia i latou ia iloa, talia, ma auai, ma puipuia. Mai ou aafiaga e 40 tausaga o se Pulega Aoao, ou te popole e uiga i le aofaiga toatele o a tatou tagata o le Ekalesia, talavou ma matutua, o e e le malamalama i le fuafuaga mo o latou lava taunuuga e faavavau ma paia.

UA I AII

SE MOLIMAU MAMA ATOATOA

LE MANA E SUIA AI OLAGA

O lea, au uo faiaoga e, e tatau ona tatou vaavaai atu mo ma talisapaia nei avanoa ina ia faamatala atu, aoaoga faavae ma faaleagaga, ma aisea tatou te talitonu ai o le malamalama i le fuafuaga sili o le fiafia a le Atua o le a taliina ai le tele o fesili "aisea" lea atomu e fesiliglia ai i tatou. O le faaalia o tatou talitonuga i se olaga o le muai olaga lea na tatou nonofo ai o ni fanau agaga o se Tama Faalelagi ma se Tina Faalelagi ua mafai ai ona tatou faamatalaina le mafuaaga ua foafoaina ai lenei lalolagi. O se faamoemoega taua se tasi o le olaga faaletino o le mafai lea ona tatou toe fausia lena aafiaga faaleaiga e i tatou lava, i le taimi la lenei o ni matua nai lo le na o ni fanau. Ia faapelepele i lou malamalamaaga autu e uiga i le aoaoga faavae ma le faamoemoega o le fuafuaga a lo tatou Tama Faalelagi mo lo tatou fiafia e faavau. Ma ia faaauau pea ona tatou aoaoina atu.

Faaiuga

Ina ia faaiuina ai la ma ia ototo atu ai matautu sa ou faasoa atu ia te outou o le:

- Aoao atu tamaiti e tuufaatasia le aoaoina e ala i le suesue ma le faatuatua ma se molimau mama atoatoa.
- Aoao atu tamaiti aoga ia nonofo i totonu o le vaa ma pipiimau!"
- Aoao atu tamaiti aoga ia pulea lelei a latou masini feaveai ma taulai atu i le fesoottai atili ma le Agaga Paia nai lo Initoneti.
- Puipui tamaiti aoga i upu moni o le

ata o le faaolataga o loo maua i le talalelei a Iesu Keriso.

- Manatua o le "Aisea?" e mafai ona avea ma se fesili maoae lea e taitai atu ai i le malamalama i le talalelei.
- Ia atamai i anotusi o faamatalaga tusia o Autu o le Talalelei.
- Aua le soona folafola atu ma aua le fefe e fai atu, "Ou te le iloa."
- Ia avea ma tagata aoao mo le olaga ato.
- Saili se fautuaga ma se faasaoga mai ia i latou e te faatuatua.
- Mafaufau e fai se faatalanoaga patino i lea taimi ma lea taimi e iloilo ai au sauniuniga faaleagaga, lou maelega, ma lou tulaga lelei.
- Aoao atu o le fuafuaga o le fiafia e amata ma faai i le aiga. Ia i ai peia i le mafaufau le ata o le faaolataga i taimi uma.
- Aoao atu o le faaipoipoga ma le aiga e aumaia le olioli tumau.

Manatua, o le tuufaatasia o le aoaoina e ala i le suesue, faatuatua, ma le molimau mama atoatoa e aumaia le liua moni ma umi ma tumau. Mai mea uma lava, o le malosi o le faatuatua i le Togiola a le Alii o Iesu Keriso e taua lea mo lo tatou malosiaga ma le tuputupu ae faaleagaga.

Tau ina ia tou maua le olioli ma le filemu lea e oo mai i le iloaina e ala atu i au aoaoga, ua e pai atu i se olaga ma siitiaina se tasi o fanau a le Tama Faalelagi i le malaga e toe foi atu i Lona afioaga. ■



FAAMATALAGA

1. Fonotaga faaleaoaoga a le Pulega Aao, Aai o Sate Leki, 29 Sete., 1992.
2. Harold B. Lee, in Clyde J. Williams, ed., *The Teachings of Harold B. Lee* (1996), 331.
3. Tagai Edward W. Tullidge, *The Women of Mormondom* (1877), 411–14.
4. Tagai F. Burton Howard, *Marion G. Romney: His Life and Faith* (1988), 62–64.
5. Boyd K. Packer, "A Tribute to the

- Rank and File of the Church," *Ensign*, May 1980, 62.
6. Tagai M. Russell Ballard, "Nofo i totono o le Vaa ma Pipiimau!" *Liahona*, Nov. 2014, 89–92.
7. Tagai lds.org/topics/essays.
8. Tagai josephsmithpapers.org.
9. Brent W. Webb, "Quest for Perfection and Eternal Life" (Brigham Young University annual university conference faculty session, Aug. 24, 2015), 10, speeches.byu.edu; see also Stav Atir, Emily Rosenzweig, and David Dunning, "When Knowledge Knows No Bounds: Self-Perceived Expertise Predicts Claims of Impossible Knowledge," *Psychological Science*, Aug. 2015, 1295–1303.
10. In Brent W. Webb, "Quest for Perfection and Eternal Life," 10.
11. Tagai i le "O Le Aiga: O Se Folafolaga i le Lalolagi," *Liahona*, Nov. 2010, 129.

SOSOLA ESE MO LE Faatuatua MA LE SAOLOTOGA

Saunia e Eva Walburger

Sa matou ola ae ma ou tei o faalogo i tala o auala na ositaulaga ai ou matua ina ia ola i le talalelei, ma ua faamanuiaina ai i matou mo o laua taumafaiga. Ua ou atiae se lagona loloto o le loto faafetai mo mea sa laua faia ma isi Au Paia o Aso e Gata Ai anamua o Czech ina ia maua e a latou fanau faamanuiaga o le talalelei.

Sa fanau lou tina i Poprad o le Siekislovakia muamua (ua avea nei o Slovakia). Sa auauna atu lona tama i le ami a Czech i le taimi o le Taua Lona Lua, ma o lona aiga o se tasi o le toatele o aiga sa sosola ese i le togavao mo le saogalemu mai tagata nuu o Siamani. Mo aso e lima, sa faapupuu ai ou matua matutua i lalo o se palanikeke faatasi ai ma lou tina ma lona uso, e tasi ma le lima tausaga, ao aai i poloka suka.

Sa lei avea ou matua matutua ma ni tagata o le Ekalesia i lea taimi, pe sa la tatalo soo. Ae peitai, i le taimi o lenei faigata, sa faamaluluina o la loto. Sa tusia e lou tinamatua i totonu o lana api talaaga, "O lea lava po sa ou lagona ai se manao loloto e tootuli i lalo ma ole atu mo se fesoasoani mai se tasi e i ai se pule maualuga. O lea sa ou alu atu te isi atu ai i le togavao, tootuli i lalo, ma tatalo ma se loto nutimomoia ma se agaga salamo. Sa ou tagi atu mo se fesoasoani."

Sa tali mai lana tatalo. Sa fasiotia nisi o aiga i le togavao ina ua maua, ae sa faavavega le puipuia o ou matua matutua ma o laua fanau teine e toalua. E ala i lenei aafiafa vaivai ma faigata, sa totoina e le Alii se fatu o le faatuatua i loto o ou matua matutua.

A o latou saili le saolotoga faalelotu, sa faamanuiaina ou matua i le agalelei ma le taliaina e le Au Paia o Aso e Gata Ai sa siomia i latou, mai Siekislovakia i Kanata.

Faatuatua ma le Sauaina

Ina ua uma le Taua Lona II i nai tausaga mulimuli ane, sa nonofo pea ou matua matutua i Siekislovakia ina ua tuitui atu ni faifeautalai talavou i lo la faitotoa. I le maea ai o le auai i le paranesi laitiiti ma faalogologo i talanoaga, sa la maua se molimau o le moni aiai o le talalelei ma filifili ai e papatiso. Peitai, o le afiafi o faatalanoaga o le papatisoga, sa lei o atu ai faifeautalai ma taitai o le Ekalesia. I le sauniga a le paranesi na sosoo ai, sa iloa ai e ou matua matutua ona o le faafitali faaupufai, sa manaomia ai e faifeautalai uma ona tuua le atunu. O soo se gaoioiga faalelotu i lea taimi sa taofia foi. Peitai, sa faatumauina e le vaega toaititi o le Au Paia lo latou faatuatua, lea ua taitaia nei e le au taitai o le lotoifale ma ki o le perisitua. Sa papatisoina faalilolilo ou matua matutua ma le uso o lou tina i le 1950.

I isi nai tausaga na sosoo ai, o tagata o le paranesi, e aofia ai ma lou tinamatua ma lou tina (ua talavou nei), sa ave faalilolilo i nisi taimi e leoleo nana mo le fesiligia e uiga

Ia Aokuso 1968, sa faatofa atu ai lou aiga i lo latou fale i Prague ma o ese filemu, e agai atu mo Auseteria.



i o latou gaoioiga faalelotu. I se tasi o taimi, sa fesiligia ai ma le faamalosi lou tinamatua mo le lima itula. Sa tau atu e ona tagata na fesiligia o ia, latou te faafalepuipuia o ia mo le lima tausaga pe afai latou te iloaina o loo ia aoao atu mataupu faalelotu i lana fanau.

Sa ia tusia, "Sa ou nofo ma le filemu ma faapea atu, 'Afafou te manatu ua ou faia se mea sese o le aoao atu o mataupu faalelotu i lana fanau, ona mafai lea ona tou lokaina au.' Latou te lei tali mai. Mai lena taimi sa latou aumaia ma toe aumaia au ina ia fesiligia. Sa latou tetee i le Ekalesia, ma latou taumafai ai e aveese lo matou faatuatua. O le tele o lo latou taumafai, o le tele lena sa ou pipii ai i le Ekalesia, [aua] o le Ekalesia moni e sauaina pea."

Sa tusia e lou tina i totonusi o lana api talaaga, "I nei tausaga sili ona faigata, sa feiloai tagata o le ekalesia i le aso Sa i le fale mautotogi a le peresitene o le paranesi. Sa le mafai ona matou pepese leotetele o lea sa matou musumusu ai. Matou te lei mananao e fafaalepuipui lo matou peresitene o le paranesi. Mo le 18 tausaga, sa matou potopoto faapena ma sa matou moemiti i le taimi o le a mafai ai ona matou o atu i Rocky Mountains [Mauga Papa] ma nonofo ai i le [Aai o Sate Lekil]." Sa ia i latou le faamoemoe e ui lava i lena taimi sa seasea ona maua e aiga ni pepa faigaluega e mafai ai e i latou ona tuua le atunuu.

Ao tuputupu ae lou tina i lona luasefulu tausaga, sa ia tatalo ma se manao malosi ia mafai ona faaipoipo atu i se tagata o le Ekalesia ma i se auala e faamauinai ai i le malumalu.

Mauainai o se Olaga Fou

O lou tama, o le sa tausi ae i se nuu faifaatoaga, sa nofo i le aai ina ia alu ai i le aoga ina ua feiloai i lou tina. Sa amata e lou tina lana galuega o se tagata pese faafafia faapolofesa. Ao la amata ona faamasani, sa ia faailoa atu ia te ia le Ekalesia. E ui e lei papatisona o ia, sa faaipoipo ou matua i le aso 18 o Fepuari, 1967.

I le faaiuga o lena tausaga, sa faamanuiaina i laua i le fanau ai o lou tuagane matua. I le mavae ai o le valu masina o lona fanau mai, sa maua e le peresitene o le paranesi se faaaliga e faapea e tatau i tagata ona sauni e tai-tai atu i fafo o le atunuu i se nofoaga lea e mafai ona latou saoloto e tapuai ai. Ia Aokuso 1968, sa osofaia ai e le au Rusia ia Siekislovakia, ma faatupuina le vevesi i tuaoi ma

i le atunuu atoa. O tagata o le paranesi o e sa saunia ma le usiusitai na sosola atu i Viena, Auseteria.

O lou tinamatua, o le sa tuua le atunuu ma ou matua, sa tusia: "I le po ina ua momoe tagata uma i totonusi o le fale mautotogi, sa matou faatofa atu i la matou fale ma o ese atu a o fefefe ai ina nei amata ona tagi le pepe. Sa tatau ona matou faia mea uma nei i le faalilolilo aua sa i ai i la matou fale ni sipai se toatolu o e na galulue mo leoleo nana. Sa faamanuiaina i matou e le Alii. Sa matou sosola ese atu. Ina ua matou o ese, sa matou iloa [o le a] matou le toe foi, ae sa matou lei iloa foi le mea o le a matou agai i ai mai Viena. I lea taimi, sa le mafai ona matou popole i ai. Sa faaali e le Alii i le peresitene o le paranesi Lana



Sa taunuu ou matua i Calgary ma na o se atopau, se moega pepe, ma ni nai tala. Sa vave ona auauna mai tagata o le ekalesia i Kanata i lou aiga, i femalagaaiga, o faatauga, ma le sueina o se fale e nonofo mautotogi ai.



AUAUNA ATU I TAGATA SULUFAI

"O lo matou faamoemoe o le a e fuafuaina ma le agaga tatalo mea e mafai ona e faia—e faatatau i lou lava taimi ma tulaga—e auauna atu ai i tagata sulufai o loo nonofo i o outou pitonuu ma nuu. O se avanoa lenei e auauna atu ai i tagata taitoatasi, i aiga, ma e ala i faalapotopotoga e ofo atu le faauoga, fautuaga, ma isi auau-naga FaaKeriso."

Linda K. Burton, Peresitene Aoao o le Aualofa, "Sa Fai Au ma Tagata Ese," *Liahona*, Me 2016, 14.

folafolaga ia i matou pe afai matou te tumau i le faatuatua ia te Ia."

Faafeiloaiina i se Laueelele Fou

Sa nonofo lou tinamatua, ou matua, ma isi aiga e toalua i lalo o le fale o le ekalesia Böcklinstrasse i Viena mo le silia ma le masina. I le aluga o lenei masina, sa maua ai e lou tama lesona a faifeautalai ma sa papati-soina. O le toatele o tagata o aiga e toatolu sa mauaina ni galuega, ma sa latou tuufaatasi o latou totogi seja mafai ona latou malaga atu i Calgary, Alberta, Kanata. Ona o le leaga o le tau i Calgary, sa taunu ai lo latou vaalele i Edmonton i le aso 5 o Novema, 1968.

I le tuua ai o aiga, o se aganuu, ma se laueelele sa latou fiafia ai sa avea o se osigataulaga taufaafefe, ae o faigata sa i ai i le tele o auala sa faatoa amataina. Ina ua latou tau-nuu i Calgary ma na o se atopau, o se nofoa pepe, ma se tupe KANATA \$32 tala, sa matua manaomia e ou matua se fesoasoani.

Sa vave ona auauna mai tagata o le ekalesia i Kanata i lou aiga, ma tuuina mai le fesoasoani lima foai i femalagaaiga, o faatauga, ma le sueina o se fale e nonofo mautotogi ai. I totonus o le vaiaso, sa maua e ou matua ma lou tinamatua se fale o i ai ni moega, se laulau ma ni nofoa, se nofoa, se moega pepe, o ie afu, palanikeke, aluga, o ipu, e oo lava i ni meaai i kapoti. Sa tusia e lou tina i lana api talaaga le auala na faateia ma faafiafiaina ai i le vaaia o nei meaafale e lei faamoemoeina ma lona toe faafetai tele mo le auau-naga.

E ui i lea, faatasi ma ni lagona loloto o le faafetai, sa i ai nisi lagona. O le manaomia e faamasani i se aganuu e ese ai sa moni lava ma faigata le taulimaina. O le tausaga muamua o le ola ai i Calgary sa tumu i vasega faaPeretania ma ni savaliga i le malulu i le galuega mo Tama. Sa latou faia mea uma sa mafai a fausia ai se lagona o le aiga, ae

sa faigata lenei taimi ma le tele o le suiga. O le Au Paia i lo latou uarota fou i Calgary sa taumafai e fesootai mai latou e ui e ese-e-gagana e tautatala ai e avea o se vaega lagolago i tagata fou na taunu atu. O aso Sa taitasi sa maua e lou aiga le malosi a o latou auai i le sauniga faamanatuga e faafou a latou feagaiga, ma faalagolago atu i le Agaga e aoao i latou i le faaPeretania.

O Faamanuiaga o le Faavavau

Sa faamauina faatasi lo matou aiga e toalima i le Malumalu o Cardston Alberta ia Oketopa 1976. Sa faamoemoe lou tina i lenei aso mo le silia ma le 20 tausaga na muamua atu ma ua taunu, i se atunu ma se gagana ese o se mea sa lei mafaufau i ai i lona talavou, sa taliina ana tatalo. Sa toeitihi atoa lou valu tausaga i lena taimi, ma o loo ia te au ni manatuaga o foliga matagofie a ou matua ma ataata a o ulufale atu matou le fanau i le potu faamauga.

Sa i ai foi lou tinamatua i le malumalu i lena aso. Ou te manatua lona fiafia i le vaaia o moli o le malumalu a o matou taunu atu i Cardston. E tele tausaga mulimuli ane, i le litaea ai mai lana galuega i Calgary, sa ia masii atu i Cardston ma tuu atu le tele o itula o le auau-naga i le malumalu. Sa ia fiafia e ta le okeni ma fesoasoani e musuia le migao iina. O lana molimau ma le alofa mo le Faaola o se molimau i lona agalelei i tagata uma sa siomia o ia. O ia o se faataitaiga ia te au o se tamaitai malosi o le Au Paia o Aso e Gata Ai.

Ou te lagona le lofituina i le faafetai i ou matua—o ni paonia i lou aiga—mo lo la osi-taulagaina o galuega, aiga lautele, nuu moni, ma mea totino. E foliga mai sa la tuuina atu le tele o mea, ae sa matua faamanuiaina i laua e le Alii—ma o la fanau—mo le ola ai i mata-upu faavae o le talalelei. ■

E alala le tusitala i Idaho, ISA.

MATAUILA LANU MOANA E TASI

Sa i ai se feeseseaiga a lou tina ma lou tama i le auala e teuteu ai lo matou fale i le Kerisimasi. Sa faalelei lou tama i le pikina o lanu, o lea la o le lanu momu, lanu meamata, ma le lanu enaena sa foliga tutusa ma le manaiia ia te ia. Ae peitai, sa foliga susulu ma matagofie le lanu moana. Sa ia lagolago malosi foi i le au futipolo, a le Iunivesite a Polika Iaga e ona lanu a le aoga e aofia ai le lanu moana.

Talu ai o lona lanu e sili ona fiafia i ai o le lanu moana, sa ia manao ai e tuu i luga moli lanu moana. Ae sa fai mai lou tina o le lanu moana e le o se lanu o le Kerisimasi, o lea o tausaga uma lava e tautau faalelei ai e Tama ia moli lanu momu, lanu meamata, ma le lanu paepae o le Kerisimasi i luga o le latou fale. Ina ia taufaalili ia Tina, na te suiina se tasi o matauila i se lanu

moana sesega. A e vaai lelei, e te iloa atu se matauila e tasi lanu moana i moli lanu momu, lanu meamata, ma lanu paepae.

O tausaga taitasi e susulu mai ai le matauila lanu moana mai se nofoaga ese. O nisi taimi sa natia i le tulimanu lea e le iloa atu e se tasi, ae o nisi taimi na te tuuina i luga o le fale taavale po o le faapaologa i luma. Sa avea o se taaloga malie i le va o Tina ma Tama.

I se tasi o tausaga, sa faafuasei lava ona maliu Tama ae toe lua ni aso oo i le Kerisimasi. I lana sauniga, sa faamatala ai le tala o le matauila lanu moana e tasi e na te tautauina i tausaga uma. O le po na sosoo ai, sa autilo atu lou tina i fafo o le faamalamana. I leisi itu o le auala, sa susulu mai ai i moli papae i luga o le faapaologa i luma a lana tuaoi, o se moli lanumoana e tasi. I totonu o

ni nai aso, sa faaopoopo e le toatele o tuaoi ma uo ni matauila lanu moana i a latou moli Kerisimasi. O nisi sa teuteuina foi laau atoa i le lanu moana.

Ou te faafetai sa faaalia e uo ma tuaoi a lou tina lo latou alolofa mo ia e ala i le teuteuina [o o latou fale ma laau] i moli lanu moana. Sa latou fesoasoani mai ia te au e iloa le uiga o le "faanoanoa faatasi ma e e faanoanoa; . . . ma faamafanafana atu ia te i latou o e e manaomia le faamafanafanaga" (Mosaea 18:9). Ou te faafetai sa tuuina mai e le Tama Faalelagi le mea-alofa o Lona Alo. Ona o Iesu Keriso, o le a ou toe vaai i lou tama. ■

Amy Brown, Iuta, ISA

Ae vaai lelei, e te iloa atu se matauila e tasi lanu moana i moli lanu momu, lanu meamata, ma lanu paepae.



Ao ia savali ese atu, sa matou vaaia ai lona uuina o le tusi i lona fatafata.



ATA NA TUSI A STAN FELLOWS

TUUINA ATU O LE OLIOLI

Omaua ma lou toalua sa avea o ni faifeautalai e auauna atu i Tarbes, Farani, i Atu Mauga o Pyrenees. O le Vaeluapo ao lumanai le Kerisimasi, sa matou filifili ai e o i le aai i Verdun Plaza e tuu atu ni kopi o le Tusi a Mamona. Sa leai ni tagata i le auala, ma sa amata ona matou fesili ifo ia i matou lava po o le a le mea o le a matou faia i nei mau tusi e tele. Sa faafuasei lava, ona matou vaaia se alii talavou sa foliga e le iloa le mea e alu i ai.

Sa matou o atu ia te ia ma ofoina atu ia te ia se Tusi a Mamona. Sa amata ona olioli ao ia faalogo ia i

matou o talanoa e uiga i le talalelei. Sa ia faamatala, e na o ia le po o le Kerisimasi ma e na te faitauina le Tusi a Mamona ma ia le lagona ai le tuua nao ia.

Ina ua alu, sa matou toe autilo solo i le auala ma vaaia ai se fafine o loo savali lemu agai mai ia i matou i le po malulu. Sa matou vaaia se sulu o le fiafia i ona foliga ina ua matou tuuina atu ia te ia se Tusi a Mamona. Sa ia tau mai ia i matou sa avea o ia ma se fafine ua oti lana tane lata mai nei ma sa fiafia sa matou popole e uiga ia te ia. Sa ia fai mai sa matua fiafia ia

matou. Ao ia savali ese atu, sa matou vaaia ai lona uuina o le tusi i lona fatafata.

Sa matou tufaina i lena po kopi uma o le Tusi a Mamona sa matou aumaia mai matou. O le toatele o tagata sa matou tuuina atu i ai tusi sa tuuatoatasi, le fiafia, ma manaomia tele le alofa. Sa matou toe foi i le fale i lena po ma se lagona loloto sa matou mauaina le meaalofa silisili o le Kerisimasi ona o le olioli sa mafai ona matou tuuina atu i isi. ■

Jeannine Denise Fabre,
Saint-André-les-Vergers, Farani

FAAFEILOAIINA O IESU

le mavae ai o ni vaiaso o le naunau-tai, sa iu ina oo i le Vaeluapo ao lei oo i le Kerisimasi. Toetoe o tagata uma o lo matou aiga sa i ai faatasi ma matou—o Tinamatua ma Tamamatua Fletcher, o o ma afafine e toatolu ma o latou taitoalua ma fanau. Sa amata ona pogisa ma sa ola moli teuteu o le auala. Sa susulu fale i teuteuga mata-gofie ao mumu fiafia ai moli Kerisima-si i faamalama.

Sa matou sauni e o i le Faaaliga o le Soifua Mai o Iesu, lea sa faia e le Eklesia mo le tele o tausaga i Calgary, Alberta, Kanata. O Vaeluapo ao lei oo i le Kerisimasi uma, sa matou fiafia e o i le faaaliga sa i ai uma asini, mamoe, Au Makoi, leoleo mamoe, fitafita Roma, agelu, ma se masini

faaleotele malosi. Sa aumaia le lagona o le filemu, alofa, ma le uiga moni o le Kerisimasi i la matou faafiafiaga pisi.

Sa matou taunuu atu i le Paka o Heritage, lea sa faia ai le faaaliga, ma e lei umi ae matou fiafia i le musika matagofie a le Aufaipese a le Tapeneko Mamona ma le tala o le soifua mai o le Faaola. Sa tolu tausaga o Lauren, le ulumatua o fanau a le ma fanau i lea taimi. Sa fiafia o ia i le vaaiga, o leo, ma le tala sa faatinoina i luma o i matou. Sa sau mai ia matou manava le ea malulu i lalo o le vanimonimo manino, ma feilafi o fetu. Sa matou matamata ao usiusitai tagata sa faatinoina Iosefa ma Maria i le faatonuga a Kaisara Aokuso e o i Peteleema ina ia totogi lafoga. O le

fafine sa faatinoina Maria sa “to o ia” (tagai Luka 2:5), ma sa na o le pau le nofoaga la te mafai ona nonofo ai o se fale o manu faatauvaa. O iina, “ua fanau e ia lana tama ulumatua, ua ia aui ia te ia i le ie, ma faataoto ia te ia i le fale povī” (tagai Luka 2:7). O sulu o moli sa suluia ai le maupuepue lea sa matou vaai ai tagata o ni leoleo mamoe o loo leoleoina “i lo latou lafu mamoe [i le pol]” (tagai Luka 2:8). Na faafuasei lava, ona faaali mai se tagata iloga o se agelu o loo faaali manino mai i le ea, o loo susulu atu ia te ia se sulu malamalamama. Sa faafuasei ona alaga atu Lauren i le alofa, “Iesu, o au, o Lauren!”

O tagata uma sa siomia i matou sa lagona lona faafeiloai ma sa talie



O SE SAUNIGA FAAMANATUGA A AGELU

lemu, ma fiafia i le faatei a Lauren. Sa manino le faaseseina o ia e uiga ia te ia, ae mo i matou sa faaleleia ai le faa-aliga o lena tausaga. Sa iloa e Lauren e silafia o ia e Iesu, ma sa faamanatu mai ia i matou i lo matou malamalama e Na te silafia lava i tatou uma taitoatasi. Sa matou mafaufau pe na i ai ni manatuaga o Lauren e uiga i lona Faaola lea sa ia tuua i tausaga pupuu e tolu na muamua atu. O le faafeilo-aiga faafuasei a Lauren sa tuuina mai ai matou le faamoemoe o le a matou iloaina foi o Ia pe a matou feiloai ia te Ia. O lona alofa mo le Faaola ma Lona alofa mo Lauren sa mafanafana ai o matou loto i lena Vaeluapo ao lei oo i le Kerisimasi malulu. ■

Greg Prince, Alberta, Kanata

I nai aso ina ua maea le aso Faafetai, sa amata ona mai lau tama tama e tolu tausaga o Drew. Sa ala o ia i taeao taitasi, ai lana meaai o le taeao, sauni mo le aso ma sa foliga na manuia, ae ina ua faagasolo le aso, sa amata ona vaivai ma sa le fia ai.

Sa faaaauau ai lava lenei faiga mo ni nai vайaso. Na iu lava, i le aso Faraile, le aso 18 o Tesema, sa ou siina ai Drew i totonu o le ofisa a le fomai i le 3:00 i le aoauli. Sa le mafai e Drew ona tu pe savali ma o lona pau sa sesega.

Sa ou autilo atu i le fomai ma fai atu, "O le tulaga lenei e oo i ai o ia i aoauli ma afiafi uma mo vайaso e tolu ua tuanai." Sa tasi a le vaai a le fomai ia Drew ma taofia vave loa o ia i le falemai. Sa faia e fomai ni suesuega ae sa le mautinoa le mea sa faaletonu ia te ia.

I le aso na sosoo ai, sa siitia atu ai Drew i le isi falemai. I le taeao o lena aso Sa, sa ou lagona le faavaivai. I le mavae ai o le tele o suesuega mo le lua aso mai i falemai eseese, sa leiloa e se tasi le mea sa faaletonu i lou atalii. E faaopoopo i lena mea, o le aso Sa ao lei oo i le Kerisimasi. O lau sauniga faamanatuga e sili ona fiafia i ai o le tausaga atoa o le polokalama o le Kerisimasi ma o le a ou misia uma pese matagofie ma lauga i lo matou uarota.

Ao matou savavali atu ma lou toalua ma Drew agai i le potu o le

falemai lea o le a faia ai se sauniga faamanatuga, sa ou faanoanoa. Sa ou alu atu i le laulau lea sa i ai ni polokalama, piki se polokalama e tasi, ma savali pea i luma ma autilo i lalo ae ou taia loa i se tasi.

Sa ou autilo i luga ma fai atu, "Faamalie atu," ae sa leai se tasi iina. Ao ou vaai atu i le potu lea e faia ai le faamanatuga, sa pei o se fale mata-mata. I luga o le tulaga sa i ai ni nofoa ma ni masini faaleotele, se piano, ma se laulau sa seti mo le faamanatuga ma ni nai nofoa i tua. Sa lei tumu le potu ae sa i ai fanau sa mamai ma o latou matua, e toatele sa i ai a latou IV e mafai ona feaveai.

Ao ou vaai solo i le potu, sa ou lagona le i ai o ni agelu. Sa matou nonofo i lalo ma sa tafe ifo loimata i lalo o ou foliga a o ou lagona le alofa o le Atua mo Lana fanau o e sa mamai ma mafatia, sa i ai i se falemai soo se ituiga o gasegase i le taimi sili ona matagofie o le tausaga.

Sa avea o se sauniga faamanatuga sili ona matagofie i lou olaga.

Sa lei iloa lava e fomai le mea sa faaletonu ia Drew. Sa ia maua ni vailaua e togafiti ai ona tiga ona tea lea mai le falemai i le aso na sosoo ai. Na te lei toe maua ni faaletonu talu mai lena taimi, ae o lena sauniga faamanatuga o le Kerisimasi o le a tumau ia te au e faavavau. ■

Carrie Ketchum, Nevada, ISA

Na faafuasei lava, ona faaali mai se tagata iloga o se agelu o loo faaali manino mai i le ea, o loo susulu atu ia te ia se sulu malamalama.





Saunia e Elder
Chi Hong (Sam)
Wong

O Le Fitugafulu

Faatuatu, Faamoemoe,
ma le Alofa Mama:

O Amioga Mama e Lalagaina Faatasi

Eui e fai sina puupuu o le tusi a Moronae i le Tusi a Mamona, ma na o le 10 mataupu, e na te tuuina mai le tele o faantuaga matagofie. Ua aoao uma mai e Moronae ma Mamona ni mataupu faavae taua o le talalelei. Ao faamaeaina e Moronae le otootoga a lona tama o le Tusi a Mamona, sa ia taua pea aoaoga a lona tama e uiga i sootaga o le faantuatu, faamoemoe, ma le alofa mama. Sa manino le finagalo o Mamona ma Moronae e faamamafa le taua o nei mataupu faavae e tolu.

I au suesuega muamua o le Tusi a Mamona, e masani ona ou mafau-fau i nei mataupu faavae e tolu o ni poloka fau fale. E mafai ona muamua le faantuatu, ona sosoo ai lea ma le faamoemoe, ma sosoo ai ma le alofa mama. Sa foliga mai o se alualu i luma e talafeagai. Ao tuputupu ae lo tatou faantuatu, tatou te faateleina lo tatou suesue ma le malamalama, ma tatou amata ai ona faaaoga le mataupu faavae o le faamoemoe. O le faantuatu ma le faamoemoe faatasi e uunaia i tatou ma taitai i tatou i auala sa

feafioai ai le Faaola, ma tatou amata ai ona maua ia uiga o le alofa mama.

Ae peitai, i isi suesuega lata mai nei, ua ou malamalama ai i le faantuatu, faamoemoe, ma le alofa mama i se isi auala. Ua sili atu lou mafaufau ia i latou o ni amioga mama e lalagaina faatasi, e faia e vaega taitasi se mea e manaomia i le atinaeina ma le faamainoina o a tatou molimau.

O le ma tama teine, o Joy, e fiafia e fatu ni manu ma ni mea faitino e ala i le lalagaina faatasi o ni paluni. Ao ou matamata o ia faia lea mea i se tasi o aso, sa ou mafaufau i le auala e mamanu ai se manoia e ala i le lalagaina faatasi o ni nai fasi manoia. Sa fesoasoani lenei mea ia te au e vaai faale-mafaufau i lou malamalamaaga fou ua maua o le faantuatu, faamoemoe, ma le alofa mama e pei o ni fasi manoia e tuu-faatasi e mamanu ai se manoia malosi.

Faatuatu: "O Le a Outou Maua le Mana"

O le faantuatu i le Tama Faalelagi ma le Alii o Iesu Keriso o le faavae

Ao tatou lalagaina faatasi le faantuatu, faamoemoe, ma le alofa mama i o tatou olaga i aso uma, tatou te avea ma soo moni o le Faaola o lesu Keriso.

lea e le gata i le mauaina o le ola e faavavau ae i o tatou olaga i le lalagi. "Ma ua fetalai mai Keriso: Afai tou te faantuatu mai ia te au o le a outou maua le mana e fai ai soo se mea e tatau ai ia te au" (Moronae 7:33). Ua ou faaaogaina lenei mana e ala i le faantuatu i le tele o taimi i lou olaga. Ma sa ou faalagolago i le faantuatu e sii atu au i nisi o taimi faigata.



Ao suesue ai i le Iunivesite o Polika Iaga-i Hawaii, sa ou i ai i se siosiomaga fou ma o lau gagana lona lua o le faaPeretania. Sa avea ma luitau, ma sa ou iloa sa ou manaomia le fesoasoani faakatemia pe afai e tatau ona ou tumau i lau sikolasipi. A aunoa ma le sikolasipi, e le mafai ona ou i ai i le aoga. E le gata i lea, sa ou faia le tautinoga ou te le suesue lava i aso Sa.

I se tasi o aso a o ou faitau i le Matapu Faavae ma Feagaiga, sa i ai se fuaiupu faapitoa sa aumaia se uuniga malosi ia te au. A o ou faitau i le vaega e 109, fuaiupu e 7, sa ou oo i le laina lenei: "Ia saili aoaoga e ala lava i le suesue ma le faatuatua foi." Sa avea lena fuaiupu ma mea taua i lou manua faakatemia. Ma le faatuatua ma le suesue filiga mo aso e ono i le vайасо, sa faamanuiaina au i au suesuega. O nisi sa i ai i lau vasega sa mafaufau pe na faapefea ona ou lelei tele e aunoa ma le suesueina i le aso Sa, e pei ona latou faia. O le mea sa ou aoaoina, o le aoaoina e ala i le faatuatua e mafai ona faatoilalo ai le tele o luitau.

O se aafiaga e talitutusa sa tupu a o ou galue e atiina ae lau matata i

le pisinisi. Sa ofoina mai ia te au se avanoa faigaluega lelei tele, ae sa manaomia ai ona ou galue i le aso Sa. Sa ou tautino atu ia le faigaluega i le aso Sapati. Na iu lava, sa ou teena le avanoa faigaluega. Sa le mafai ona ou fetuunaia lau tautinoga e taus le aso Sapati ia paia. Ae o lau tautinoga i le kolisi, sa mulimuli ane faamanuiaina au i le tele o isi avanoa faapisinisi sa lei manaomia ai e au ona fetuunai ma sa mafai ai e au ona tuuto atu aso Sa e tapuai ai i le Alii.

Ao tatou fatuina la tatou manoia faalemafaufau lea e fesootai ai i tatou i faamanuiaga paia, ia tatou amata i se fasi manoia malosi o le faatuatua.

Faamoemoe: "Ia Faatutu Mai Outou i le Ola Faavavau"

Tatou te faamoemoe mo le tele o mea: ia mafai ona tatou siitia i a tatou galuega; ia sologa lelei a tatou fanau; ia tatou ausia faamoemoega a lo tatou auaunaga i le Ekalesia; ia tumau ai lo tatou soifua maloloina; ia tatou maua mea tatou te manaomia e lagolago ai le olaga ma tuuina atu mo o tatou aiga. Ae o fea e sau ai le mamanu

maualuga o le faamoemoe, ma o fea e mafai ona taitai atu ai i tatou?

Na saunoa mai Mamona, "O le mea lea, ou te fia tautala atu ia te outou o e o le ekalesia, outou o soo fifilemu o Keriso, ma outou ua outou maua se faamoemoe ua lava e mafai ai ona outou ulu atu i le malologa o le Alii, mai le taimi nei i luma seia oo ina outou malolo faatasi ma ia i le lagi" (Moronae 7:3).

Ao faaauau e Mamona lana valaulia ia i tatou ia avea ma soo moni o Keriso, sa ia toe alu tasi i le autu o le faamoemoe ina ua ia fai mai, "Ma o le a le mea tou te faamoemoe i ai?" Ona ia tali lea o lenei fesili e sili ona taua: "Faauta ou te fai atu ia te outou, tou te faamoemoe, e ala i le togiola a Keriso ma le mana o lona toetu, ia faatutu mai outou i le ola faavavau, ma o le pogai ona o lo outou faatuatua ia te ia e tusa ma le folafolaga" (Moronae 7:41).

O lenei ituiga o faamoemoe e ese mai le faamoemoe masani. O lenei faamoemoe paia e oo mai e ala i le Togiola a Iesu Keriso. O le faamoemoe e faavavau. A aunoa ma lea faamoemoe semanu tatou te o mai i le lotu i vайасо taitasi ma le le iloaina o nei faamanuiaga matagofie o loo avanoa mo i tatou. E ala ia Keriso e mafai e lo tatou faamoemoe ona taitai i tatou i lo tatou Tama Faalelagi ma i le ola e faavavau.

I se lauga talu ai nei o le konafesi aoao, sa taua ai e Peresitene Henry B. Eyring, Fesoasoani Muamua i le Au Peresitene Sili, "Sa faatagaina e [Le Tama] Lona Alo ina ia saunia, e ala i Lana taulaga togiola, le faamoemoe lea e faamafanafanaina ai i tatou e tusa lava po o le a le faigata e ono



oo ai lo tatou auala e toe foi atu ia te Ia.”¹ E ala i le faamoemoe e mafai ona tatou vaia faamanuiga ma avanoa o loo faatali mai ia i tatou ao tatou tumau faamaoni ai i le talalelei a Iesu Keriso ma auauna atu ia te Ia ma o tatou loto atoa, mafaufau atoa, manatu atoa, ma le malosi atoa.

Faatasi ai ma lena malamalamaga, sei o tatou faaopoopo se isi fasi manoia i la tatou manoia, o le faamoemoe lea.

Alofa Mama: Faaee i luga o Soo Moni

O le amio mama lona tolu e atili ai ona faamalosia la tatou manoia o le alofa mama. Tatou te amata ona atiina ae le meaalofa o le alofa mama e ala i o tatou taumafaiga faamaoni e faataitai i le Faaola. Ae peitai, o le atoaga o lenei meaalofa ua tuuina atu i luga o i tatou e le Atua a o tatou saili ma le faamaoni i ai i le tatalo. Ao tatou mulimuli ia te Ia o Le na tuuina mai ia i tatou le ola, tatou te amata ona aoao i le uiga moni o le alofa mama, o le “alofa le pona lea o Keriso” (Moronae 7:47).

Ua aoao mai Mamona, “Ia outou tatalo atu i le Tama ma le malosi atoa o le loto, ina ia faatumulia outou i lenei alofa, lea ua ia faaee mai i luga o i latou uma o e o soo moni o lona Alo, o Iesu Keriso” (Moronae 7:48). Pe a avea i tatou ma soo *fifilemu*, e mafai ona tatou maua le lava o le faamoemoe, ae ina ia tuuina mai le alofa mama, tatou te manaomia ona avea ma soo moni. Afai o i tatou o soo *moni*, o le a avea atili i tatou e pei o Ia, o le faamoemoega lea o le olaga.

E ala i le atiina ae i o tatou loto o le alofa le pona o Keriso, o le a sili atu



ona tatou taliaina o le uiga faaleatua o le alofa mama—e auauna atu ai i o tatou uso a tagata ma le Atua. “Afai e agamalu ma maualalo se tagata i le loto, ma tautino atu i le mana o le Agaga Paia o Iesu o le Keriso, e ao ina i ai ia te ia le alofa mama; aua afai e le i ai ia te ia le alofa mama, o se mea noa o ia; o le mea lea e ao ai ina i ai ia te ia le alofa mama” (Moronae 7:44).

Ua tatou maua nei ni fasi manoia ttauia e tolu o la tatou manoia. Sei o tatou vaai pe faapefea ona latou galulue faatasi.

E Galulue Faatasi Uma [Amioga Mama] e Tolu

“O le mea lea, e tatau ai ona i ai o le faatuatua; ma afai e tatau ona i ai o le faatuatua e tatau foi ona i ai o le faamoemoe; ma afai e tatau ona i ai o le faamoemoe, e tatau foi ona i ai o le alofa mama.

“Ma e vagana ai ua ia te outou le alofa mama e le mafai lava i se ala ona faaolaina outou i le malo o le Atua; pe mafai foi ona faaolaina outou i le malo o le Atua pe afai e le ia te outou le faatuatua; pe mafai foi e outou pe afai e leai so outou faamoemoe” (Moronae 10:20–21).

Pe a le toe avea le faatuatua, faamoemoe, ma le alofa mama tuufaatasi o ni mataupu faavae e fausia i luga o le tasi ma le isi mo au; ae o loo lalagaina faatasi i latou. Tatou te le faameaina le fausiaina o le faatuatua, ma ona maua lea o le faamoemoe, po o le mavae ai ona mauaina o le faamoemoe, mulimuli ane atiina ae le alofa mama. Latou te galulue faatasi uma. Ma a o lalagaina faatasi i latou, latou te fesoasoani faatasi e mamanuina o tatou tagata ma molimau. ■

FAAMATALAGA

1. Henry B. Eyring, “O Le Faamafanafana,” *Liahona*, Me 2015, 20.

FATUINA O LO MAUA TAUNUUGA FIAFIA

Saunia e Yuri Kutepov

Sa avea au ma se tagata o le Ekalesia mo le 10 tausaga ina ua ou mauaina se faamautinoaga e faapea e manaomia ona ou sailia se soa. Sa ou malamalama i aaooga faavae o le faaipoipoga faaselesitila, ma sa ou tatalo faatauanau ina ia maua sea faaipoipoga ma ia mafai ona fatuina se aiga. Ou te lei iloaina pe faapefea ona ou mauaina se tamaitai o le Au Paia o Aso e Gata Ai i Samara, Rusia, lea sa ou nofo ai, ae sa ou faatuatua o le a fesoasoani mai le Alii ia te au (tagai 1 Nifae 3:7).

I le tausaga 2009, sa valaaulia ai au e auai i se faagasologa o konafesi a le autalavou nofofua matutua e faia i aai e 10 i le Misiona atoa o Rusia Samara. Sa ou faamoemoe o nei gaoi-oiga atonu o ni avanoa lea e mafai ai ona ou feiloai i lau soa e faavavau.

Sa ou fiafia e auai i konafesi, lea sa faamalieina i le tele o auala, ae sa tele ni masina ua mavae ma ou te lei atiina ae lava se sootaga o tafaoga faamasani.

Sa amata ona ou popole ma ole atu i le Alii e fesoasoani mai ia te au. O le tali, sa oo mai ni manatu i lou mafau-fau e lapatai au e faapea, e mafai ona faaosooosina au e atiae ni faigauo ma ni tamaitai e le o ni tagata o le Ekalesia.

Sa ou iloa sa aoao mai perofeta e tatau ona tatou taumafai e faaipoipo i le malumalu, ma sa ou iloa e le mafai ona i ai se atoaga o le olioli pe afai e le faatasia au ma lou toalua e taumafai e mulimuli i le Faaola. Sa faaaauau pea ona ou tatalo ina ia maua le malosi faaleagaga e tetee atu ai i ia faaososoga ma ia maua le fesoasoani a le Alii i le mulimuli ai i Lana fuafuaga mo au.

O lea taimi, sa amata ona ou sauni mo lau malaga masani i le Malumalu o Helsinki Finland, lea ou te faaaluina ai se vaiaso.

Sa ou feiloai i isi tagata malaga se toatolu i luga o le nofoaafi, e aofia ai se tamaitai e suafa ia Mariya, lea sa ou iloaina e lei faia se toalua. Sa tosina o ia ia te au i le faaletino uma ma le faaleagaga, ma sa ou mafaufau pe aisea

Sa ou tatalo ina ia maua lau soa e faavavau, ae ou te lei faamoemoe e mauaina o loo ia nofo i ou talaane i luga o le nofoaafi e agai i le malumalu!

ou te lei feiloai ai i se tamaitai e pei o ia i le taimi muamua. Sa ou mafaufau i tua i lau lapataiga muamua e uiga i le faaososoga e amata se sootaga i fafo atu o le Ekalesia.

“Ia malosi,” sa ou mafaufau ai. “Ia faamaoni i au mataupu faavae. O le a e mauaina se tamaitai agavaa ma matagofie i totonus o le Ekalesia.”

I le mafaufau ai e mafai ona ou tau lava o le avea o se faifeautalai tagata

lelei ma atonu e faasoatatu le tala-lelei ia te ia, ma i le manaomaina o le uunaiga, sa ou toina mai i fafo lau kopi o le Tusi a Mamona e faiatau, ma mafaufau pe na te iloa mai. I lou tei ai, sa fai mai Mariya, "Pei uma a ou te iloa le mea e te alu i ai!"

Sa ou vaai ae i luga ma vaaia o loo ia uuina se kopi o le Tusi a Mamona. O ia foi o se tagata o le Ekalesia ma o loo malaga foi i le malumalu.

I le taeao na sosoo ai sa ma faa-uaua la ma malaga i Helsinki i le pasi. Sa ou iloa o Mariya e sau mai Voronezh, o se aai i le Misiona a Russia Moscow West. Sa vave ona ou fiafia ia te ia ma tatalo faatauanau mo le taitaiga. O le tali, sa ou maua ni lagona lelei i totonusi o lou loto.

"Le Alii e, na o le tasi le ma vaiaso o loo totoe i le malumalu," o lau tatalo lea. "Faamolemole ia fesoasoani mai ia i maua ia sili atu ona iloa e le tasi le isi i lenei taimi."

Ma sa ma faia. I va o sauniga i le malumalu, sa ma savalivali ai, aai faatasi, ma o atu i le faleoloa, ma talatalanoa. I le faaiuga o le vaiaso, sa ma o uma i le fale—o Mariya i Voronezh ma au i Samara. Ae sa ma malaga i aai a le tasi ma le isi ina ia faamasani atili, ma i le aso 14 o Setema, 2010, sa ma faaipoipo ai i le Malumalu fou ua faapaiaina o Kyiv Ukraine.

O loo ma nonofo nei ma Mariya i Voronezh ma o loo maua le fiafia. Tatou te malamalamo o tala faafagogo ia e faaiu i le fuaitau "ma sa la nonofo fiafia ai lea." I le olaga moni tatou te fatuina lo tatou lava fiafia i le faaiuga e ala i le faaauau pea ona tuuina atu lo tatou faamaoni i le Alii e ala i le tausia

o a tatou feagaiga o le malumalu, faaauau pea ona galulue i le faamalosia o o tatou faaipoipoga, ma taumafai ia avea e pei o Iesu Keriso.

Ma te faafetai mo la maua feiloaiga faavavega ma faamoemoe o la maua tala o le a i ai le faamoemoe ma tuu atu le malosi i isi o loo saili pea mo ni soa e faavavau. O tala a isi atonu e le pei o la maua tala, ae ua ma iloa ma Mariya, po o a lava luitau, e faafogfa le Alii i a tatou tatalo faamaoni. E alofa o Ia ia i tatou ma e popole mo i tatou taitoatas. A tatou faataga o Ia, o le a Ia taitai lo tatou ala ma faataga mea uma ia manuia mo lo tatou lelei (tagai MF&F 90:24). ■

E alala le tusitala i Voronezh, Rusia.



O LE FAAFANUA A LE ATUA I LE FIAFIA

"O loo tatou taufai saili uma mo le fiafia, ma o loo tatou taumafai uma e saili lo tatou lava 'ola fiafia ai lea.' O le upumoni o le, ua silafia e le Atua le ala e oo atu ai iina! Ma ua uma ona ia foafoaina se faafanua mo oe; Na te silafia le ala. O la o lou Tama Faalelagi alofa o le o loo sailia lou lelei, lou fiafia. E finagalo o la ina ia e taunu i lou taunuuga faavavau. Ua i ai le faafanua mo tagata uma."

Peresitene Dieter F. Uchtdorf, Fesoasoani Lua i le Au Peresitene Sili, "O Lou Ola Fiafia Ai Lea," *Liahona*, Me 2010, 126–127.





MALOSI E FILIFILI AI

Saunia e Michael Pickett

Sa ou fiafia ina ua valaau mai se tamaloa ia te au i se tasi o aso ma fai mai sa ia vaai i ni au faaaliga o tagata tino lelei ma sa manao e avea ma au tagata lagolago. Na te totogiina ou lavalava ma porotini ma totogi lau pasese i Europa ina ia faia ni faaaliga iina. Sa ia fai mai foi e mafai ona ou i ai i totonu o se mekasini. O le avea ma tagata tino lelei o se mea sa ou fiafia i ai, ma o lou faamoemoe sili lea! Na o le pau le faafitauli, sa ou auina atu i totonu au pepa o le misiona i nai aso na muamua atu. Sa ou fai atu i le tamaloa, sei ou mafaufau e uiga i lana ofo ma toe valaau atu ia te ia.

Sa ou fetaiai ma se faaiuga sili ona faigata o lou olaga. Mo ou matua, o le taliaina o le tagata lagolago [sponsor] sa le o se filifiliga. Sa la fai mai, “Atonu e te maua lenei avanoa pe a maea lau misiona.” Ae sa le mafai ona tuu lou mafaufau i ai. Sa ou iloa e tatau ona ou alu i se misiona ma auauna atu i le Alii, ae o lou miti ua avanoa mo au i le taimi nei.

Sa ou fesili i le toatele o au uo i mea latou te manatu e tatau ona ou faia. Sa fai mai nisi e tatau ona ou taliaina le tagata lagolago, ma o isi sa fai mai o le faiga a Satani e faasagatau mai ia te au aua na te le manao e auauna atu i se misiona.

I se tasi aso, sa faasoa mai e se uo lelei ia te au se upusii mai ia Peresitene Ezra Taft Benson (1899–1994): “O alii ma tamaitai o e liliu atu o latou loto i le Atua o le a iloa e mafai ona Ia faia le tele o mea i o latou olaga nai lo mea latou te mafai ona faia. O le a Ia faalolotoina lo latou olioli, faalau-te la latou vaaiga, faamataala o latou mafaufau, *faamalosia o latou musele*, sii a'e o latou agaga, faatele o latou faamanuiaga, faateleina o latou avanoa, faamafanafana o

latou agaga, faatulai uo, ma liligi mai le filemu.”¹

O lena upusii sa i ai se aafiaga malosi ia te au. Faapena foi se mau sa ou faitau i ai i le Tusi a Mamona: “Ma afai e taus i le fanauga a tagata poloaiga a le Atua, e taus i ia ia te i latou, ma faamalolosi i latou, ma fai ala e mafai ai ona latou faataunuina o le mea ua ia poloaiina ai i latou” (1 Nafe 17:3).

Faatasi ai ma le fesoasoaniga a lenei upusii ma le mau ma le lagolago a au uo ma le aiga, sa ou filifili ai e auauna atu i se misiona ma sa valaauna e auauna atu i le Misiona a Bolivia Cochabamba.

O le auauna atu i se misiona sa avea o se filifiliga aupito sili ona lelei ua ou faia. Sa ou mauaina faamanuiaga e le mafaitauina a o auauna atu, e aofia ai le faamanuiaina e aoao vave le faaSipaniolo.

Sa faamanuiaina foi e le Alii lou aiga. A o ou i ai i le misiona, sa ou mauaina se imeli mai i ou matua e tau mai ia te au sa alu lou uso matua i le lotu mo le taimi muamua i le 12 tausaga. Sa sua mulimuli ane lana taimi o le galuega ina ia mafai ona ia alu i aso Sa uma, ma sa ia faatuina se sini e faitau le Tusi a Mamona.

O lou uso laitiiti foi o le sa tauivi faaleagaga sa faia ni suiga i lona olaga ma faamalosia lona faatuatua. Sa toe toaga lou tausoga ma amata ona toe alu i le malumalui viaiso taitasi e faia papatisoga mo e ua maliliu. Sa faamanuiaina moni lava i matou. ■

E alala le tusitala i Kalefonia, ISA.

FAAMATALAGA

1. *Aoaoga a Peresitene o le Ekalesia: Ezra Taft Benson (2014), 42–43;* faaopoopo le faamamafa.



AVEA MA SE TOA MANUMANU **MOI**

Saunia e Charlotte Larcabal

Mekasini a le Ekalesia

Mafaufau i lau toa manumanu moi e sili ona fiafia i ai. Taimi lenei! Pe sa e mafaufau i ni tagata o toa laulioa o loo taumafai e manumalo i mea faafeagai lofituina? Pe atonu o se tagata malaga fiafia ma se lauulu ua lelei le teuina? Pe na e mafaufau i se tasi mai i tuisutisiga paia?

Ae a Nifae, Noa, Apiso, po o Peteru? Latou te lei tau ina ia manumalo i autau na o o latou lima ma ni faamatalaga atamai, ae o i latou atonu e te faaigoaina o toa manumanu *moi*. Sa latou faatinoina le faatuatua, faalagolago i le Atua, ma galulue pea. Sa latou galulue.

Mata e te aloese mai le amataina aua e te lei mauaina ni faatonuga o laasaga tuusao? Atonu o loo i ai se tasi i lau vasega po o le korama e lei toe sau i le lotu. Mata e te musu e faaaumea ia i latou aua e te le o

O le fetaomi atu i luma e le o se taalogia e molimauina ae ia auai ai. Tu i luga ma fai se mea!

mautinoa le auala e faia ai? E taua musumusuga, ma e tatau lava ona tatou sailia. Ae e le faapea o le nofoai ma faatalitali mo se tesi mai le telefoni mai se agelu ae tatou te le i o atu e faia se lelei. E finagalo le Tama Faalelagi ia tatou faauo atu i lena tagata. E finagalo o ia ia tatou totoa ma faia se faatinoga!

Ae a pe ana faatalitali Nifae, Noa, Apiso, ma Peteru? Sa ia i latou uma ni mea faigata e fai. Ae a pe ana latou filifili e nofonofono ma malolo seia latou maua nisi faatonuga? Semanu e matua ese le taunuuga o mea . . .

Faatali ma Vaai?

“O le a ou faatali e fai mea ua poloaiina e le Alii, aua ua ou iloa e le tuuina mai e le Alii ni poloaiga i le fanauga a tagata, vagana o le a saunia e ia se ala mo i latou, ina ia ou le faia se mea seia ou iloa po o le a le ala” (lomiga e le o i ai nei o le 1 Nifae 3:7).

E lei pine talu ona tuua e le aiga o Liae lo latou fale i Ierusalema, sa poloai e le Alii ia atalii o Liae e toe o atu ma aumai papatusi mai ia Lapana. Ae o le mea ua tatou iloa, Na te lei tuu atu ia i latou ni faatonuga i le ala e faia ai lena mea. Na o le pau le mea na silafia e Nifae ma ona uso, sa poloaiina i latou e aumai ia papatusi. Mata e te lagona le pei e te leiloa se manatu pe faapefea ona fai i mea e tatau ona e faia? (Atonu o se tasi lena o mafuaaga na muimui ai Lamana ma Lemuel!) Sa pule Nifae e mafaufau ma faatino le faatuatua ma alu ma fai. Ae a pe ana ia nofo ma faamaumau le taimi? Ae a pe ana musu Nifae e galue i soo se auala seia avatu e le Atua ia te ia se fuafuaga? O le aumaia o

papatusi sa faigata! Sa taumafai faalua e ia ma ona uso ma sa le manuia! Ae a pe ana faapea e na o le nofo lava o Nifae i lalo o puipui o Ierusalem ma faatalitali mo le Atua e tau atu ia te le mea e fai?


Atonu o loo i ai lava papatusi i oa a Lapana. O le mea e lelei ai e lei faatali Nifae.

Nai lo le faia o lena mea, sa ia mulimuli i le Agaga, “[sa] le muai iloa muamua mea e tatau ona ou faia. E ui i lea sa ou alu atu” (1 Nifae 4:6–7; faaopoopo le faamamafa). E lei tau lava ina faatali o ia; na te lei faataga mea sa lei iloa e ia e taofia ai o ia. Sa ia silafia o le a saunia e le Atua se auala, ma sa sao o ia. O le taimi lava na gaoioi ai Nifae, ma galue, ma fetaomi atu i luma, sa taitaia ma fesoasoani le Alii ia te ia

Ae aisea?

“Ma sa fesiligia e Noa mea uma sa poloaiina ai o ia e le Alii (lomiga e le o i ai i le taimi nei o le Kenese 7:5).

O nisi taimi e tuuina mai e le Atua ni faatonuga faapitoa. O Noa o se faataitaiga lelei. Ina ua poloaiina e le Atua Noa e fau le vaa, sa saunia e le Atua le fua, ma faamatala atu anomea e faaaoga, ma tuuina atu foi ia Noa se lisi o le pasese. Atonu sa e mauaina ni musumusuga faapitoa faapena, ma ua tatou maua uma ni poloaiga faapitoa e pei o mataupu faavae i totonusi o le tamaitusi o le Mo le Malosi o le Autalavou . Ae e tusa lava pe e te silafia lelei le mea e tatau ona fai, mata e faaaauau pea ona e musua? Mata e faaosoosoina oe e fesiligia le Alii nai lo le usiusitai ia te Ia?





Ae a pe afai na faalogo Noa i le Alii ona faapea atu lea, "Ae aisea? Ou te malamalama ai." Ae a pe afai sa ia taoto i luga o le nofoa ma musu e gaoioi seia malamalama lelei o ia i le *mafuaaga* sa auina mai ai e le Alii le lolo, ma mafaufau i le taimi atoa pe o faatonuga na sau moni mai le Atua?

Semanu e i ai se lolo, ae mata e i ai se vaa? Ma ae a le ituiga o tagata? O se mea lelei *tele* le le nofoai ai o Noa ma tuufesili i mea uma.

Nai lo lena, sa ia "faia e tuna ma mea uma na poloai atu ai Ieova ia te ia" (Kenese 7:5). Na te lei tuufesili; sa ia galue i le faatuatua. Afai e fesili i ni faamoemoega sao, o fesili o se mea lelei. E mafai ona latou fesoasoani ia i tatou ia tuputupu ae ma taitai atu i tatou i isi mea moni. Ae pe a tatou mumusu e faia soo se mea seia tatou mauaina tali tatou te mananao ai, e mafai e fesili ona taofia i tatou mai le alualu i luma. Atonu sa i ai ia Noa ni fesili, ae na te lei faatagaina i latou e taofia o ia. E tuna pe na foliga e ese, sa ia fausia le vaa i luga o le lauelele matutu, faapotopoto uma manu ma tuu lona aiga i totonu o le vaa. Ma ina ua amata ona timu, masalo sa ia fiafia tele sa ia faia lea mea. Sa galue Noa i le faatuatua, ma sa faamanuia o Ia e le Atua ma lona aiga atoa.

Tu ma Matamata?

"*Ina ua ia vaai atu ua pauu uma auaua a Lamonae i le eleele, . . . sa ia iloa o le mana lea o le Atua; ma i le manatu o le . . . vaai i lenei vaaiga . . . o le a uunaia ai [isi] e talitonu i le mana o le Atua, o lea na ia tu ai i tua ma faamoemoe o le a alu atu se tasi e faapotopoto mai tagata*" (*Iomiga e le o i ai i le taimi nei o le Alema 19:17*).

O Apiso o se fafine sa Lamana. Sa liua o ia i le Alii mo le tele o tausaga, ae sa ia aumau i totonu o sa Lamana e le talitonu, sa ia tausia faalilolilo lona faatuatua. Ina ua aoao atu e Amona le talalelei i le Tupu o Lamonae, sa lofituina le tupu ma lona aiga i le mana o le Alii. Sa iloa e Apiso o se avanoa lenei mo ana uo ma tuaoi e iu ai ina vaai ma talitonu i le mana o le Atua. Sa ia te ia le faapotopotoina o le nuu e molimauina le vavega.

Ae a pe ana faapea na te lei faia? I le mavae ai o le tele o tausaga o le natiaina o lona faatuatua, o le momoe atu

i lea fale i lea fale masalo o se mea sa fefe e fai! Pe ua uunaia ea oe e faasoa atu ae toe lagona le fefe e uiga i le faia? O le faasoa atu o ou talitonuga e mafai ona avea ma faigata! Ae faapefea pe ana le gaoioi Apiso ma faamoemoe o le a molimauina e tagata le mea na tupu e i latou lava? Pe o le a fai atu e se isi tagata se tala?

Ia, o le a leai se tasi e faapotopoto mai e vaai i le Tupu o Lamonae ma lona aiga o loo taooto solo e pei ua maliliu po o lo latou manuia faavavega. Semanu latou te le i ai iina e faalogo i le Tupu o Lamonae, le masiofo, ma Amona o aoao atu le talalelei.

O le mea e lelei ai, e lei tau lava ina tu o ia. Nai lo lena, sa ia "*momoe atu ai* mai lea fale i lea fale, ma faailoa atu i tagata" (Alema 19:17; faaopoopo le faamamafa). Sa ia te ia se molimau i le Atua, ma na te lei faatagaina le fefe e taofia o ia. Na te lei faatali mo se isi tagata e fai atu se tala. Ina ua maua lana avanoa, na te lei faatali—sa ia momoe! Sa galue Apiso, ma sa faamanuiaina o ia e le Alii e vaai i le liua o le toatele o lona nuu i le talalelei (tagai Alema 19).

Faalogo i le Lalolagi.

"*Ona fetalai atu ai lea o [Iesu], Ina sau ia. Ona alu ifo ai lea o Peteru ma nofo i lalo i totonu o le vaa, na te lei savali i luga o le vai, e alu atu ia Iesu*" (*Iomiga e le o i ai nei i le Mataio 14:29*).

Ona o ia o se tagata faagota, sa silafia e Peteru le tele o mea e uiga i vaa. Mo se faataitaiga, sa silafia e Peteru pe a i ai se afa matautia i le vasa, e te nofo i totonu o le vaa. Sa ia silafia o tagata o e laa atu i luga o le vai o le magoto i lalo. E mafai ona e vaai faalemafaufau i mea sa ia mafaufau ai ina ua ia vaaia Keriso o loo savali i luga o le vai?

Ae a pe ana ia nofo ai i totonu o le vaa? E silafia uma e tagata, e le mafai e le tagata ona savali i luga o le vai. Ae a pe ana taulai atu Peteru i na o mea sa "silafia" e le lalolagi? O nisi taimi e foliga mai o aoaoga a Keriso ma Ana perfeta e faafeagai ma mea o loo tau mai e le lalolagi. Ma o le lalolagi e tauanau gofie ma faigofie ona faalogo i ai. Ae a pe ana fai atu Peteru ia Keriso o le savali i luga o le vai e le faasaienisi pe fetaui? Ae a pe ana fefe tele Peteru e laa atu i fafo ma savali atu ia Keriso?

Semanu na te misia le faasoaina o se aafiaga ofoofogia ma le Matai. Semanu na te misia se avanoa e faamalosia ai lona faatuatua, ma atonu na te manatunatu e uiga i lona faatuatua i le lumanai pe a manaomia e ia le malosi. O le mea e lelei ai e lei nofo Peteru i totonu o le vaa. E ui i galu, le afa, ma lona aafiaga i le vasa, sa manao Peteru e alu i fafo o le vaa ma savali atu ia Keriso. E ui i mea uma sa "silafia" e le lalolagi, sa savali Peteru i luga o le vai. E oo lava ina ua ia magoto, sa i ai lava Keriso iina e laveai o ia (tagai Mataio 14:28–31).

O au? O se Toa Manumanu Moi?

Ua auina mai oe iinei ina ia avea ma se toa manumanu o lou lava olaga fiafia! E le faapea o le oso mai i fafo o fale o le a mu po o le aveina o se taavale ao faia tuliga i aso uma. O lona uiga o le faia o filifiliga, faia o le faatinoga, ma fetaomi atu i luma.

Ua aoao mai le Alii e "tatau ona [tatou] auai ma le naunautai i se faamoemoega lelei." E lei fai mai tonu o ia po o le a le faamoemoega lelei ae nai lo lena Na te finagalo ia tatou e "fai mea e tele i lo [tatou] lava lotomalie, ma aumai le amiotonu tele" (MF&F 58:27). O le uiga o lena mea ua Ia faatuatuaina oe e faia lau oe lava faaiuga ma filifili pe faapefea ona e aumaia le amiotonu. O nisi taimi, tatou te maua le fesoasoani pe a maea ona tatou faatinoina le faatuatua ma faia na laasaga muamua.

O loo i ai lava le Alii iina e taiala i tatou pe a tatou manaomiaina, ae afai e te musu e galue ma fetaomi atu i luma na o oe ma faamoemoe e tau atu e le Atua ia te oe mea laiti uma e fai, o le a avea oe o se "auauna paie ma le poto" (tagai MF&F 58:26). Ma o ai e manao e avea o se auauna paie pe afai e mafai ona e avea ma se toa manumanu? ■



O loo ou tauivi e duesue tusitusiga paia. Aisea e matuai taua ai le suesueina o i latou?

Mai le autu o le Mutuale o lenei tausaga, ua e aoao pe faapefea ona “fetaomi atu i luma ma le tumau ia Keriso” (2 Nifae 31:20). Ua aoao mai e lenei mau o le fetaomi atu i luma e aofia ai le “taumamafa fiafia i le afioga a Keriso.” Aisea e taua tele ai lenei mea? O ni nai auala nei e fesoasoani ai le duesueina o tusitusiga paia ia i tatou ia fetaomi atu i luma:

- Sa aoao mai Peresitene Thomas S. Monson e faapea “afai e te duesueina ma le filiga ia tusitusiga paia, o le a faateleina lou mana e aloese ai mai faaososoga ma maua ai le taitaiga a le Agaga Paia i mea uma e te faia” (“Ia Avea ma Tagata Sili e Mafai ona Avea ai Oe,” *Liahona*, Me 2009, 68).
- E mafai ona e mauaina se molimau ma faamalosia lou faatutua a o e duesue ma le agaga tatalo i tusitusiga paia. Ae maise lava i le duesueina o le Tusi a Mamona ma le mauaina o se molimau i lona moni aiai o le a fesoasoani e te iloa ai o Iesu o le Keriso, o Iosefa Samita o se perofeta, ma o Le Ekelasia a Iesu Keriso o le Au Paia o Aso e Gata Ai e moni. (E mafai ona e aoao atili i nei folafolaga i le faatomuaga i le Tusi a Mamona.)
- E mafai ona e mauaina musumusuga patino ma tali i au fesili e ala i tusitusiga paia. E pei ona fesootai atu le Atua ia te oe e ala i tusitusiga paia ma e ala i Lona Agaga, e mafai ona e mauaina le lototoa ma le malosi e fetaomi ai i luma i soo se faalavefau e feagai ma oe.
- Atonu o le mafuaaga aupito sili ona taua e duesue ai tusitusiga paia aua latou te aoao e uiga ia Iesu Keriso ma le auala e mafai ai ona e mulimuli i Ana faataitaiga ma aoaoga. O le ola i mataupu faavae e te faitau i ai o le a fesoasoani ia te oe ia avea atili e pei o le Faaola.

Tali i A'u Fesili

Afai e i ai sau fesili, ou te iloa e mafai ona ou liliu atu i tusitusiga paia e maua ai ni tali. O afioga na a le Alii, ma o Ana aoaoga faavae e le masuia lava. Ou te iloa e ui i faafeagai o loo fetaiai ma au, o loo i ai lava iina tusitusiga paia mo au faatasi ai ma tali. Latou te taliina foi fesili e uiga i aiaiga faavae o le Ekalesia e uiga i le tele o mataupu. Ou te iloa afai ou te faitau ma le faaeteete i tusitusiga paia, o le a fesoasoani ia te au ia maua le Agaga Paia e faatasi ma au, lea e fesoasoani ia te au e iloa le mea sao mai le mea sese.

Emily A., 17 tausaga, Uosigitone, ISA



E Avegofie Lau Amo

Sa amata ona ou lagona le mamafa o le avega i se tasi o tausaga aoga mai i faigata o le olaga. I le taimi o se tasi o nei aso faigata, sa ou tatalo ai ma faitau le Tusi a Mamona mo le 10 minute. A o ou faitau, sa ou lagona se mafanafana matagofie ua faatumulua lou loto. Sa ou lagona le alofaina, siitiaina, ma le fiafia e ui i au tofotofoga. Sa ou lagona se filemu matagofie ou te lei lagonaina muamua. Mai i lenei aafiaga, sa iu ina ou malamalamai ai i le uiga o le feta-laiga a le Faaola ina ua Ia fetalai, “Ou te tuuina atu ia te outou le manuia, o lou manuia ou te avatu ai ia te outou” (Ioane 14:27). I nai vaiaso na sosoo ai, sa tele ni taimi sa ou oo ai i lenei aafiaga, ma sa musuia au ina ia faaau-aa peia lou olaga e ui i ou faigata.

Chloe K., 18 tausaga, Wisconsin, ISA

Mana e Sui Ai

I le taimi muamua, ou te lei maua moni lava se molimau i le Tusi a Mamona, ae ina ua ou tatalo ma le faamaoni mo le taitaiga mai le Agaga

O tali ua faamoemoe e mo se fesoasoani ma ni manatu ae e le o se faalauliloaga aloaia o aoaoga faavae o le Ekalesia.



Paia, sa ou maua ni lagona sili atu e uiga i le Tusi a Mamona. Ua leva ona ou maua se manao ia iloa e moni le tusi, o lea sa ou amata ai ona ou faitau ma suesue i ai ma le agaga tatalo. O lea fuaiteau i luga o lea fuaiteau, ma lea mataupu i luga o lea mataupu, ou te maua ai faaaliga patino e moni le tusi (tagai 2 Nifae 28:30). Ou te fiafia i le Tusi a Mamona. Ou te teu nei aoaoga ou te mauaina a o ou suesue i ai. E i ai i le Tusi a Mamona se mana lea e mafai ona taitai i tatou ia sui mo le lelei sili atu.

Ariel Candawan T., 18 tausaga, Filipaina



O Le Alofa o le Atua

E ala i le mana, faataitaiga, ma aoaoga i tusitusiga paia, ua mafai ona ou mafaufau i le Agaga Paia. O loo i ai i tusitusiga paia se mana paia lea e mafai e le

Atua ona taitai ma aoao i tatou. O lea, afai e te lagona le tuuatoatasi po o le tuuanoaina, faitau ia tusitusiga paia. Ona manatua lea sa faasaoina faapitoa e lou Tama Faalelagi na tusitusiga paia mo oe ina ia mafai ona e iloa e alofa o Ia ia te oe.

Scott H., 19 tausaga, Wisconsin, ISA

Amio Lelei ma le Malamalama

Sa ou amata faitauina le Tusi a Mamona mo le taimi muamua ina ua avea au o se Ofagapi. Sa ou faitauina mai le amataga i le faaiuga ma mafaufau e leai seisi mea e toe tupu o se taunuuga. Ae sa ou sese. Sa foliga sa misi se mea i lou olaga. O lea sa tonu ai ia te au e toe faitau i ai, o le taimi lea ia sili atu ona gauai i ai. A o ou faia, sa faatumulia lou olaga i le malamalama sa taupulapula talu ona maea ona ou faitauina. Sa sili atu lou malamalama ma oo ai ina fiafia moni

i ai. Faitau i ai i taimi uma, ma e te faa-mautinoa ai ia te oe lava se olaga o le amio lelei ma le malamalama.

Kellie M., 15 tausaga 15, Iuta, ISA



Faatoilaloina o Faaosoosoga

O le suesueina o tusitusiga paia e fesoasoani ia te au ia ola ai e tusa ma mataupu faavae o le talalelei i le aoga. Faatoa ou amata i le aoga maualalo, ma o loo i ai le tele o mea leaga ma faaosoosoga. A ou oo i se taimi faigata o le tetee atu i faaosoosoga, ou te taumafai e faitau i tala o tusitusiga paia e maua ai tali i ou faafitauli. E na te fesoasoani e aveese le faaosoosoga ma liliu atu i le talalelei.

Blake C., 12 tausaga 12, Idaho, ISA

Mana o Tusitusiga Paia

O lou taimi muamua lenei e taumafai ai e faitau le Tusi a Mamona. O au mataupu e sili ona fiafia ai o loo i le 2 Nifae 25–33. I le taimi nei, ua sili ona latou faamalosia au. O le pese a le Peraimeri “Mana o Tusitusiga Paia” e lei i ai se taimi ua sili atu ai ona moni mo au. Ou te molimau atu i le moni aiai o le Tusi a Mamona ma



O SE PUNA O LE MALAMALAMA

“E ao lava ona tatou fiaai ma fiafe-inu i aso uma i le malamalama faale-agaga. O lea faiga patino e faavae i luga o le suesue, mafaufau loloto, ma le tatalo. O nisi taimi atonu e tofo-tofoina i tatou e mafaufau faapea, ‘Ou te le tau suesue i tusitusiga paia i le aso; Ua uma ona ou faitauina uma muamua.’ ...

Ae o le talalelei o se punavai o le malamalama e le mafai lava ona mātūtū. E i ai pea lava se mea fou e aoao ma lagonaina i Aso Sa taitasi ... i fuaiupu taitasi o tusitusiga paia.”

Bishop Gérald Caussé, Epikopo Pulefaama-lumalu, “Pe O Ofoofogia Pea Ea ia te Oe?” Liahona, Me 2015, 99–100.

fautua malosi atu ia te outou ia suesue i ai i aso uma.

Sariah J., 13 tausaga, Arizona, ISA

FESILI O LE A SOSOO MAI

“Sa ou tatalo mo se
mea taua, ae ou te le
iloa pe ua ou mauaina
se tali. E faapefea ona
ou iloaina?”

Autua mai lau tali ma, afai e manaomia, se ata manino lelei ae lei oo i le aso 15 o Setema, 2016, i le liahona.lds.org po o le i-meli i liahona@ldschurch.org.

Faamolemole ia aofia ai faamatatalaga nei:
(1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia fo le i-meli) e lolomiina ai lau tali ma lou atu.

E ono faapupuuina tali mo le uumi po o le manino.





Tuuina Atu o Nisi Mea Nai lo Meaalofa

O le a le ituaiga o tagata foai e te manao e avea ai?

Saunia e Emmaline R. Wilson

Ole vaitau atoa o le Kerisimasi e faatatau i le Faaola, o Iesu Keriso, ma le agaga o le foai atu. Ao mafai ona avea le tuuina atu ma le mauaina mai o ni meaalofa o se mea matagofie, ia manatua e mafai ona sili atu mea e tatou tuuina atu nai lo na o meaalofa faaletino. O aso taitasi e mafai ona tatou tuuina atu o tatou taimi, taleni, ma le agalelei—ma ua na o le pau lena o nisi o auala anoa e mafai ai ona tatou auauna atu. O lea, o le a le lelei o lou taulai atu i le foai atu ma le le manatu faapito? Ia faia lenei suega puupuu e iloa ai.

1



Oloo e sauni mo le aoga. O loo fai atu lou tina ia te oe e sau i le aiga o le taeao, ma sa ia faaluina le taimi e sauni ai lau meaai e fiafia i ai. O le a lau mea e fai?

A. Ee atu, “Ou te lei sauni al” ona faatuai lea o lau sauni, faatuai na ai i le aiga o le taeao, ma misi ai le pasi ina ia aveina e ia oe i le aoga.

E. Vave ona ai le aiga o le taeao ma faavave i fafo o le faitotoa; e na te faia lava faapena—o mea e fiafia tina e fai.

I. Faafetai ia Tina, vave sauni, ma ai lemu ma lou aiga.

2

Ua ta le 10:00 i le taeao, ma o le a tufa mai e lau faiaoga se suega. E te le masani lelei i le tagata o loo nofo i ou autafa, ae ua e matauina o loo ia sueina ma le naunautai lau ato faafafa. O le a lau mea e fai?

A. Aua le amanaaina o ia. O loo e popole foi ma manaomia e vave suesue mo le suega.

E. Fai atu ia te ia ia manua.

I. Fesili atu ia te ia poo ia sueina se mea. A e faalogo o loo ia manaomia se penitala, e te avatu ia te ia se tasi o au penitala. “Tuu ma oe,” e te tau atu ia te ia ma se ataata.

3

Ile maea ai o le aoga, o se tasi o le tou au futipolo o loo feagai ma se taimi faigata i le pasiina sao o le polo—o lau taleni lea. E alu atu o ia ina ua maea le toleniga ma fai atu pe mafai ona e fesoasoani ia te ia. O le a sau tala?

A. Fai atu ia te ia e te pisi tele. Atonu e i ai se isi aso.

E. Taliaina ma le musua ma faia ni nai pasipasiga ma ia, vave tuu atu ia te se auala e manua ai a o lei faatopetope atu e eva ma au uo.

I. Faaalu ni nai minute e tuu atu ia te ia ni auala e manua ai ma faatulaga se isi taimi e toe toleni faatasi ai.

4

Ile 5:30 i le afiafi, e tuu oe e lou tina i le faleoloa e faatau ai se mealofa o le Kerisimasi mo lou uso. O le a le mea e te aumaia?

A. E faigofie. E te faavave atu i lena polo pasiketipolo sa e manao ai mo le tele o masina.... Atonu e fafia ai foi o ia, e sao?

E. Filifili le aitema pito sili ona taugofie i lana lisi—o le a le ita, ma e le taugata tele ia te oe.

I. Sue le tusi sili ona fou na saunia e lana tusitala sili ona fafia i ai. Ua tuai ona e vaai i le fafia i foliga o lou uso pe a ia tatalaina le afifil.



Ua oo i le taimi e moe ai ma ua e vaivai. Ae, e te lei faitauina lava au tusitusiga paia.
O le a lau mea e fai?

A. Faitau le faitauga sa e faia i le aso Sa.

E. Ao saili mo au tusitusiga paia, e te mauaina lau tusi sili ona fiafia i ai. Tolu sefulu minute mulimuli ane e te manatua ia tusitusiga paia ma faitau faatopetope se fuaitau puupuu ao lei tapeina moli.

I. Ua e vaai uma i au tusitusiga paia ma lau tusi sili ona fiafia i ai, ae filifili e tuu atu i le Tama Faalelagi le faamuamua ma faia se tatalo faatopetope ae e te lei amata ona faitau. E te tusia i lalo nisi o ou manatu a o e sue-sue, ma e te toe faatetai atu ia te la i le tatalo ae e te lei moe.

TAUNUUGA!

Afai na tele lou taliina o le (**A**), atonu e te manao ia faatele teisi le liliu atu o lou taulaiga i isi. Ia manatua, o le foai atu ma le auauna atu i isi o le a aumaia le olioli sili i tagata uma o e sa aofia ai (tagai Mataio 25:34–46).

Afai na tele lou taliina o le (**E**), mafaufau e faapea “ua maua fua e outou, ia outou foafuaina atu” (Mataio 10:8). Mafaufau i le pe mafai faapefea e le naunau atili e tuuina atu ona fesoasoani ia te oe e saili le olioli silisili atu.

Afai na tele lou taliina o le (**I**), ia tumau ai! E faaali mai e au amio le agaga moni o le Kerisimasi.

Mafaufau i le auala e mafai ai ona e tuuina atu ni meaalofa ma le loto atoa ia i latou o siomia oe i lenei vaitau o le Kerisimasi. E ui i au taleni, e mafai ona e mauaina se auala e faaali atu ai le alofa ma le talisapaia mo isi e ala uma i meaalofa e te avatu ma le auala e te avatu ai na meaalofa i aso taitasi. O le foai atu e avea o se faamanuiaga ma e le o se galuega pe a tatou malamalama e ala i le auauna atu i isi, o loo tatou auauna moni lava i lo tatou Tama Faalelagi (tagai Mosaea 2:17). ■

E alala le tusitala i Itua, ISA.



FOAI SAOLOTO

“Ou te tatalo o le a tatou ootia i lagona o isi, o le a tatou foai atu e aunoa ma ni lagona o le faamalosia po o le faamoemoega o le manuia, ma o le a tatou iloa o lena taulaga o le a suamalie ia i tatou pe a tatou faatauaina le olioli e aumai i loto o isi.”

Peresitene Henry B. Eyring, Fesoasoani Muamua i le Au Peresitene Sili, “Sauniaina o Meaalofa mo Lou Aiga i le Lumanai,” Liahona, Ian. 2014, 49.

O Le Auaunaga Faafaifeautalai sa OU MANAOMIAINA

O au o se tagata o le Ekalesia, ae sa ou manaomiaina foi ni faafeautalai.

Saunia e Gabriel Costa Silva

Na ua atoa le 17 o ou tausaga, sa leai uma ni au uo. Sa latou masii mamao atu, sa auauna atu i ni misiona, pe sa le toe fia avea ma au uo. E ui lava sa ia te au lou aiga, sa ou lagona pea le tuuatoatasi. Sa ou lagona sa leai se lagolago mai i fafo o lou aiga, ma sa le mafai ona ou fiafia i isi e ui i au taumafaiga.

I se tasi o aso, sa o mai ai ni faifeautalai fou na tofia i la matou uarota i lo matou fale e faailoa mai i laua. Sa la fesili mai pe mafai faapefeta ona laua fesoasoani ia i matou. Ou te lei popole i tala sa latou faia aua sa na o lou faanoaoa ma le tuuatoatasi sa ou mafaufau i ai. Ona fai mai lea o faafeautalai la te fiafia i lau fesoasoani e aoaoa atu nisi o a laua lesona. Sa ou te'i! Aisea o le a la fai mai ai i se fesoasoani mai se tasi e moni e le o tulaga lelei faalelagona?

Sa ou talia pea, ma sa ou alu i nisi o lesona ma i laua. E le gata sa fesoasoani faafeautalai i tagata sa la aoaoina ae sa avea foi ma se uunaiga lelei ia te au.

Ina ua siitia ese se tasi o alii fiafeautalai, sa ou iloa ai sa sili atu ona lelei lou olaga talu ona ou amata faaaluina le taimi ma faafeautalai. Sa tele ni mea sa ma tutusa ai ma le isi alii faafeautalai sa sau i le eria, ma



sa faaaauau pea ona ou faaaluina le taimi ma faafeautalai. Sa laua uunaia, aoao, ma lagolagoina au. Sa la fesoasoani ia te au ia sili atu ona lagona lelei i aso faigata. E ui i le faigata

ona la tautatala i lau gagana ma o laua taimi pisi, sa faia e faafeautalai le taumafaiga e fesoasoani ia te au. Sa fesoasoani faafeauatalai ia te au ia iloa e le o tuuatoatasi au. Sa vaavaai mai le Tama Faalelagi ma Lona Alo, o Iesu Keriso ia te au ma fesoasoani mai ia te au e ala i isi tagata.

Ina ua alu ese lena faafeautalai fou, sa ou faafetai ia te ia mo le avea ma se meafaigaluega i aao o le Alii e laveai au. Ou te faafetai sa ia sau i lena misiona faapitoa aua sa avea o ia ma faamanuiaga ia te au.

Ao lei oo i lenei taimi, sa toeitiiti i ai le manao ia te au e auauna atu i se misiona, ae a o ou vaai i nei faifeautalai, sa faatupulaia lou naunau e auauna atu. Toeitiiti ou alu foi i lau misiona, ma ou te faamoemoe e tuu atu mea uma o ia te au i le Alii e pei ona faia e faifeautalai.

Ao lei o mai lena vaega muamua o faifeautalai i lou aiga, ou te manata le lagonaina o le tuuatoatasi i se tasi o po ma tatalo. Sa ou ole atu i le Atua ma lou loto atoa e auina mai tau lava o se uo e tasi e fesoasoani ma lagolagoina au. Sa tali le Alii i lau tatalo i se auala e lei mafaufauina—e ala i le auina mai o faifeautalai. Ou te iloa o loo soifua Iesu Keriso ma o Ana auauna ia faifeautalai. ■

E alala le tusitala i São Paulo, Pasila.

AUA LE TOLOPOINA

Sa faafogaga le au leoleo mamoe i le feau ma
“faataalise atu” ia lesu. E mafai foi ona e faia.

(Tagai Luka 2:15-16.)





**Saunia e Peresitene
Dieter F. Uchtdorf**

Fesoasoani Lua i le
Au Peresitene Sili

AUALA E ONOSAI AI


O le faatalitali e mafai ona fai-gata. Ua iloa e tamaiti, ma e faapena foi tagata matutua. Ua tatou ola i se lalolagi ua i ai meaai e saunia faavavave, feau tusitusi i telefoni feaveai, ma tifaga e vave maua, ma tali vave i fesili e sili ona leai se taua po o fesili loloto foi. Tatou te le mananao e faatalitali. O nisi foi e lagonaina le vevela o le toto pe a tuai le minoi o le latou laina i le faleoloa, nai lo isi.

O le onosai—**o le mafai lea ona taofiofi ou manaoga mo se taimi**—o se uiga mama e faapele-pele i ai ma e mauagata. Tatou te mananao i le mea tatou te mananao i ai, i le taimi lava lenei. O le mea lea, o le uiga tonu lava o le onosai, e ono foliga mai e le manaia ma, o nisi taimi, e oona.

Ae ui i lea, a leai le onosai, e le mafai ona tatou faafafiaina le Atua; e le mafai ona tatou atoatoa. E moni, o le onosai o se faagasologa o le faamainaina e faaleleia ai le malamalama, faalolotoina ai le fiafia, taulai ai amio-oga, ma ofoina mai ai le faamoemoe mo le filemu.

O le onosai e le na o le faatalitali. O le onosai e le o le taliaina ma le usiusitai, pe o le toilalo foi e galue ona o o tatou atuatuvaluga. O le onosai o lona uiga o le **faatalitali** ma le **tumau**. O lona uiga o le tumau ai i se mea ma le faia o mea uma tatou te mafaia—galue, faamoemoe, ma le faaaogaina o le faatuatua; o le tauaveina o faigata ma le lototele, e tusa lava pe tolopoina manaoga o o tatou loto. O le onosai e le na o le tumau, ae o le **tumau lelei ai!** O le onosai o lona uiga o le tumau i se mea seja oo i le iuga. O lona uiga o le faatuai o le vave faamalieina mo faamanuiaga o le lumanaia. O lona uiga o le taofiofi o le ita ma tolopo le fai atu o le upu faalealofa. O lona uiga o le tetee atu i le amioleaga, e tusa lava pe ua foliga mai ua mauoa ai isi.

O le onosai o lona uiga o le taliaina o le mea e le mafai ona suia ma le faafetaiaia i le lototele, faatamalii ma le faatuatua. O lona uiga o le “fia gauai i mea uma ua silafia e le Atua e tatau ona faatiga ai [tatou], e pei lava ona



gauai le tamaitiiti i lona tama” (Mosaea 3:19). Ma le mea mulimuli, o le onosai o lona uiga o le **“mausali ma le le mafaagaeetia i le tausiga o poloaiga a le Atua”** (1 Nifae 2:10) i itula uma o aso taitasi, e tusa lava pe faigata ona fai.

O le galuega a le onosai e oo mai i le: tausia o poloaiga; faatuatua i le Atua, lo tatou Tama Faalelagi; auauna ma le agamalu ia te Ia ma ia alofa faaKeriso; faaaoga le faatuatua ma le faamoemoe i le Faaola; ma ia aua lava nei fiu. O lesona tatou te aoaoina mai le onosai o le a atina ae ai o tatou uiga, siitia ai o tatou olaga, ma faateleina ai lo tatou fiafia. O le a fesoasoani e avea i tatou ma e agavaa e umia le perisitua ma avea o ni soo faamaoni o lo tatou Alii, o Iesu Keriso. ■

Mai se saunoaga i le konafesi aoao ia Aperila 2010.

O Se Kerisimasi Ese

O le a faigata le le vaai ia Tina, ae e mafai pea ona lelei le Kerisimasi.

"Remember him, as you picture Christmas this year"
(Children's Songbook, 50).

Sa toeitiiti oo i le Kerisimasi, peitai sa tau le fiafia Diego. O le Kerisimasi muamua lenei talu ona tatala le faaipoipoga a ona matua. Ma sa lagona le leai o se mea o toe lelei. O ia foi ma lona uso, o Samuelu, o le a le vaai ia Tina i lenei Kerisimasi.

“Ua ese mea uma,” o le tala a Diego ia Tama.

“Ua ou iloa.” Sa foliga faanoanoa mata o Tama. “O nisi taimi e suia ni mea a o lei oo ina lelei tele.” Sa filemu o ia mo sina taimi, ona atata lea. “O le a ese le


Kerisimasi i lenei tausaga, ae e le faapea ai o le a tatou le maua ni taimi e fiafia ai. O le a tatou faamanatu pea le soifua mai o le Faaola.”

Sa luelue le ulu o Diego. O le a faigata le le vaai ia Tina, ae atonu e *mafai* ona lelei pea le Kerisimasi, e pei o le tala a Tama. Sa manao Diego e fesoasoani e faia lenei Kerisimasi o se Kerisimasi fiafia.

Sa ia alu i lona potu e mafaufau ai. O nisi taimi mo le Kerisimasi sa latou faia se galuega auauna atu o se aiga. O le a le mea e mafai ona latou faia i lenei tausaga?

Sa autilo solo Diego i totonusi o lona potu.

Sa ia vaaia se taavale



Saunia e Jane McBride Choate

E faavae i se tala moni

meataalo e le o toe taalo ai o ia. Sa ia pikina i luga ma faataavili ia pau. Sa lelei lava. Atonu e mafai e ia ma Tama ma Samuelu ona ave nisi o meataalo i tamaiti e le o i ai ni meataalo! Sa ia maua ni nai isi meataalo ma tuu i latou i se ato faatasi ai ma le taavale.

Ina ua uma ona faia e Diego, sa ia ave le ato i le potu a Samuelu. "E mafai ona ou fesoasoani e faamama lou potu?" sa ia fesili ai. "O se mea faatei mo Tama."

Sa utilo i luga Samuelu mai lana ata sa ia tusiaina. "Ioe."

Sa galulue faatasi tama e faamama le potu a Samuelu. Sa tau atu e Diego ia te ia le fuafuaga. Sa la maua ni nai meataalo sa le toe taalo ai Samuelu ma faaopoopo i latou i le ato.

Ina ua uma ona la faia, sa laua saesae le ato i lalo. "Tama," o le tala lea a Diego, "sa ma maua ni meataalo ma te le o toe taaalo ai. E mafai ona tatou aveina i tamaiti e leai ni meataalo?"

Sa foliga tei ma fafia ia Tama. "O se manatu lelei lena! Tatou o e ave i fale mo tagata e leai ni aiga i lenei aoauli."

Sa manai le asiisi atu i le nofoaga. Sa taaalo Diego ma Samuelu ma nisi o tamaiti ao talanoa atu Tama i tagata matutua.

I le agai atu i le fale, sa fesili ai Tama pe o le a seis mea e mafai ona latou faia ia taua ai lenei Kerisimasi.

"Sa tatou faia i le Kerisimasi ua tea ni meaalofa mo a tatou tuaoi," o le tala lea a Diego.

"E mafai ona tatou faia lena mea," fai mai ai Tama. "Tatou o e faatau mai ni mea e fai ai ni kuki."

Sa manatu Samuelu o ni kuki o se *manatu* lelei.



Sa fesoasoani tama ia Tama e faatau ni mea e manao-mia mo le kuki i le faleoloa. Sa latou faia i le fale le paluga ma tipiina ni foliga o fetu ma laau. Sa tuu e Diego ma Samuelu kulimu lanu samasama ma le lanu meamata i kuki. Ona la ave lea o tamai taga o kuki i o latou tuaoi.

I le faaiuga o le aso, sa vaivai Diego ae sa fafia. Sa faia faatasi e ia ma Samuelu ma Tama ni mea o se aiga ma sa fesoasoani i isi. Na sa'o lava Tama. Sa ese le Kerisimasi, ae sa manai pea. ■

E alala le tusitala i Colorado, ISA.



AVEA MA SE FAATAITAIGA

E le alu lou tama i le lotu, ae ou te taumafai e tausi poloaiga pe a ou i ai i lona fale e ala i lou faataitaia o le ala ou te ola ai i le talalelei a Iesu Keriso.
Dashel P., 6 tausaga, Colorado, ISA

FAAMANUIAGA **mai ia** BLESSY

Ou te nofo i Initia ma lou aiga.
Sa ou fuafuaina se gaoioiga faapitoa
o le Kerisimasi mo lau aoga ma
faasoa atu le talalelei i au uo!

2

O SE LUI FAALEAIGA

Ona oo lea i le afiafi faaleaiga, sa
luiina e Tama lo matou aiga e vala-
aulia se tagata e toatasi i le lotu i
masina uma. Sa ou manao e faia, ae
sa faigata! Sa ou fai atu ia Tama mo
se fesoasoani. Sa ia fai mai e mafai
ona ou tatalo. O lea sa ou faia ai.

**TALOFA!
O lo'u igoa
o Blessy!**

1

FAFEAUTALAI FAAMISIONA TALAVOU

*E aoao mai ou
taitai Peraimeri e
tatau ona avea i
tatou ma fafeau-
talai. O nisi taimi
ou te valaaulia
ai au uo i le lotu.
O le tele o taimi,
latou te fai mai e
leai. Sa ou mafau-
fau atonu ou te
laitiiti tele e avea
o se fafeautalai.*





O LE MANATU

O le aso na sosoo ai i le aoga, sa fesili mai ai le puleaoga mo ni manatu mo se gaoioiga o le Kerisimasi a le aoga. Sa ou maua se manatu maoae! Sa ou fai atu ia te ia e mafai e tamaiti uma o le vaitausaga o le Peraimeri ona o mai e asiiasi i lau lotu. Sa ia valaaau i ou matua, ma sa latou talanoa i le epikopo e fuafua ai le gaoioiga. Sa fesoasoani foi a matou taitai o le Peraimeri ma faifeautalai.



O SE ASO FIAFIA

Na vave ona oo mai le aso. Sa ou fefe ma fiafia i le taimi e tasi. Ina ua ave au e Tama i le aoga, sa ou vaai sa i ai iina tagata uma ma sauni e o [i le lotu]. Toeitiiti 500 tamaiti aoga ma faiaoga na o mai!



FAATASI I LE LOTU

I le lotu sa matou matamata i se vitio e uiga i le soifua mai o lesu Keriso. Sa lagiina e talavou matutua ma faifeautalai ni pese Kerisimasi. Sa tuuina mai e le epikopo ma lou tama ni lauga e uiga i le auala e alofa ai lesu i tamaiti ma e uiga i le alofa i le tasi ma le isi. Sa ou tuuina atu se lauga e uiga i le Kerisimasi. Sa maua e tagata uma se taimi lelei! Sa faia foi e lou puleaoga ma lou faiaoga ni fesili i faifeautalai.



O MOTUGAAFA A BLESSY MO LE TU MAUALUGA

- Tatalo mo le fesoasoani.
- Valaaulia tagata e o mai i le lotu e tusa pe e te manatu o le a latou fai mai e leai.
- la manatua o le a fesoasoani mai le Tama Faalelagi ia te oe.


Lu'i a Moronae

Le mavae ai o le maliu a lona tama, o Mamona, sa tusi Moronae i luga o papatusi auro. Sa ia tusia e uiga i le perisitua, le faamanatuga, ma le papatisoga. Sa ia luiina i tatou e faitau le Tusi a Mamona ma ole atu i le Tama Faalelagi pe moni. Afai tatou te tatalo ma faalogo mo le tali, e mafai e le Agaga Paia ona tau mai ia i tatou e moni. Sa tanumia e Moronae ia papatusi i le eleele ina ia sefe ai.



O loo ou faitauina au tutsusiga paia faatasi ma lou tama i aso uma. E fesoasoani ia te au ina ia maua se molimau. O le a ou le faavaivai ai.

**Spencer P., 10 tausaga,
Wisconsin, ISA**



"O Papatusi Auro," Jacob D., 11 tausaga, Nova Scotia, Kanata



Oti, gagau, ma teu lenei kata o le lu'i!

MORONAE



E Mafai ona Ou Taliaina le Lu'i!

- Tauloto le Moronae 10:5.
- Mulimuli i le lu'i a Moronae! Tatalo mo le Agaga Paia ina ia fesoasoani ia te oe e iloa e moni le Tusi a Mamona.
- Asiasi i scripturestories.lds.org e matamata ai i vitio 53–54 o tala o le Tusi a Mamona.
- Ou te luiina au lava ina ia . . .

O Mau o le Masina Lenei


A uma ona e faitauina se fuaitau o mau, ona valivali lea o vaega o fuainumera e tutusa i luga o le soifua mai o le Faaola!

- 1** 1 Nifae 11:14–28
- 2** 2 Nifae 19:6
- 3** Mosaea 15:1–4
- 4** Alema 5:48
- 5** 3 Nifae 9:15
- 6** Mataio 1:19–25
- 7** Mataio 2:7–11
- 8** Luka 1:27–31



Vaai Faalemafaufau i se Fale o Manu

Ina ua malaga atu Maria ma Iosefa i Peteleema, na o le pau le nofoaga na mafai ona la maua e nonofo ai o se fale o manu o i ai ni manu. Sa soifua mai Iesu Keriso i le fale o manu ma taoto i se faatanoa vao. Sa mulimuli Leoleo Mamoe ma le Au Makoi i se fetu e saili ia Iesu. Sa vaaia foi e sa Nifae lenei fetu ma iloa ai ua soifua mai Iesu. Tatou te faamanatu le Kerisimasi ina ia manatua ai Lona soifua mai. ■



Saunia e Elder
Dale G. Renlund

O Le Korama
a Apostolo e
Toasefululua

E mafai faapefea ona ou latalata atili i le Faaola?


E mafai ona tatou manatua
le auala na la puapuagatia
ai mo i tatou ina ia mafai
ona faamagaloina i tatou.

E mafai ona tatou vaai
faalemafafau i le fale o manu i
Peteleema lea na la soifua mai ai.

E mafai ona tatou manatua
o la pe a tatou aai ma
feinu i le faamanatuga.

E mafai ona tatou iloa o loo
latalata mai le Faaola i taimi uma.

Mai le “Ina Ia Mafai Ona Ou Aumai o Tagata
Uma ia te Au,” Liahona, Me 2016, 39–42.



Faaoga kata nei e acaa atili ai e uiga i sui o le Au Peresitene Sili ma
le Korama a Aposetolo e Toasesfuluua. E mafai foi ona e kopiina kata
ma fatu se taaloga faatusatusa. E mafai ona e lolomiina nisi kopi i le
liahona.lds.org.

Kata o Molimau Faapitoa





**Peresitene
Russell M. Nelson**

○ le Korama a Apostetolo e Toasefūluluā

- O se fomai tipiti'i o le fatu
- Sa auauna atu o se fomai i le Amia le IS i Korea ma Japani
- E toa 10 le fanau—9 teine ma le tama e toa 1



**Peresitene
Dieter F. Uchtdorf**

Fesoasani Luai i le Au Peresitene Sili

- Sa sosolaese faatasi ma lona aiga i Samanii Sisifo o ni tagata sulufai o le taua
- O se paliate o le vaalele E fiafia e faasee [i lugua o le aisa] ma lona fanau ma fanau a fanau



**Peresitene
Henry B. Eyring**

Fesoasani Muamua i le Au Peresitene Sili

- Sa taalo pasiketipolo i le aoga mauluga
- Sa aaoaina le fisiki mai lona tama i le laupapa o le latou potu i lalo
- Sa avea ma peresitene o le Kolisi o Ricks, i le taimi nei i le lunivesite-o Idaho



**Peresitene
Thomas S. Monson**

Peresitene ○ Le Eklesia a Jesu Kristo o le Au Daata o Aso e Gata Ai Lona 16

- Na valaaulia i le 22 o ona tausaga e avea ma epikopo o se uarota e tele ni tina ua maliliu a latou tane
- Sa galue i le faasalalau ina ma le lolomiina o le nusipepa
- Sa avea o se peresitene o le misiona i Kanata



**Peresitene
Jeffrey R. Holland**

○ le Korama a Apostetolo e Toasefūluluā

- Sa avea o se soa o le misiona a Elder Cook i Egelani
- Sa galue mo le Ofisa o Aoga o le Eklesia
- Sa avea ma peresitene o le lunivesite o Polika laga



**Peresitene
Robert D. Hales**

○ le Korama a Apostetolo e Toasefūluluā

- Na sofia i Niu Ioka, ISA
- Sa faate'a i le au pesipolo a lana aoga
- Sa avea o se paliate o vaalele tau i le Ea Fosi a le lunaite Setete



**Peresitene
M. Russell Ballard**

○ le Korama a Apostetolo e Toasefūluluā

- Sa tauvaladau o "le epikopo" i le kolisi ona o ona tulaga faotonuina maululuga
- Sa faatautaia se pisinisi faatau taavale
- E wuaia tagata o le ia avea ma ni faifeautalai laga



**Peresitene
Dallin H. Oaks**

○ le Korama a Apostetolo e Toasefūluluā

- Sa faamamaina se fale e lipaina leito o se galuega muamua
- Na avea o se lbia ma se faamasino o le Faamasi-noga Maulugia a luta
- Sa avea ma peresitene o le lunivesite a Polika laga





Ina ia faitau i nisi
tala e uiga i profeta
ma apostolo,
asiasi i

[lds.org/prophets
-and-apostles/
what-are-prophets](https://lds.org/prophets-and-apostles/what-are-prophets)





Elder Neil L. Andersen

○ le Korama a Apostetolo e Toasefūluluā

- Na soifua ae i se faatoaga lafu povi i Idaho, ISA
- Sa avea o se faifeautalai ma le peresitene o le misiona i Farani
- Sa fesoasoani e faatou le faatoa amataina o le Mormon.org



D. Todd Christofferson

○ le Korama a Apostetolo e Toasefūluluā

- Sa taoina falaoa e fai i le fale mo lona aiga ao tuputupu ae
- Sa auai i le Faadiga o le Mauga o Kumora a o talavou
- Sa auaua atu i se misiona i Atentitina factasi ai ma Elder Scott o le peresitene o lana misiona



Elder Quentin L. Cook

○ le Korama a Apostetolo e Toasefūluluā

- Na maua se molimau ina ua uma ona tatalo faatasi ma lona uso matua
- Sa avea ma peresitene o tamaiti aoga i le aoga faaitumalo, ao lona toduai i le lumanai, o Maria, o se sui-peresitene
- Sa avea ma taitai o le Ekalesia Filipaina male Pasefika



Elder David A. Bednar

○ le Korama a Apostetolo e Toasefūluluā

- Sa avea o se taitai i le atu i se misiona, sa ia paptisoina lona tama o se tagata o le Ekalesia
- Sa avea ma peresitene o le Kolisi o Ricks, i le taimi nei i le lunesite-o Idaho



Elder Dale G. Renlund

○ le Korama a Apostetolo e Toasefūluluā

- Olona igoa ogatotonu, o Gunnar, o lona uiga "fitafita toa"
- Sa masii atu i Suitiseleni a o talavou
- Sa galue o se formai o le statu



Elder Gary E. Stevenson

○ le Korama a Apostetolo e Toasefūluluā

- Sa auaua atu o se faifeautalai ma le peresitene o le misiona i Japani



Elder Ronald A. Rasband

○ le Korama a Apostetolo e Toasefūluluā

- Sa avea ma peresitene o le misiona i le Aai o Niuloka
- Olona tautinoga "O tagata e sili ona taua"
- Faapaiaina le fale muamua o le Ekalesia AAG i Czech Republic



O LA TATOU ITULAU



Saunia e Daniela M., 9 tausaga,
Cortés, Honduras



"Ua Fanau mai se Tamaitiiti," saunia e Sophia M., 7 tausaga, Cortés, Honduras



Saunia e Lohan B., 9 tausaga, São Paulo, Pasila



O aso uma, e faalogo ai Paola i se lipine o pese o le Peraimeri ma ua aoaoina ni nai pese. E fiafia o ia i le "Mulimuli i le Perofeta." E fiafia foi o ia e faitau Tala o le Tusi a Mamona faatasi ma lona tina. Talu ai nei sa ia asiasi ai i nisi o ona aiga ma tau atu ia i latou le tala ia Amona ma sa Lamana.
Paola C., 3 tausaga, Oaxaca, Mekisiko



Sa faia e fanau peraimeri i Roma, Italia, se laau Kerisimasi i o latou lima fesoasoani.

Folafolaga Taua a Moronae



Sa ia Mamona se atalii e igoa ia Moronae. I le mavae ai o le maliu a Mamona, sa tusi Moronae i luga o papatusi auro.

Sa tusi i lalo e Moronae tatalo faamanatuga. Sa ia tusia o mea lelei uma e mai le Atua.



Sa tusia e Moronae e
alofa Iesu i tamaiti uma.
Fai mai o ia e mafai ona
tatou tatalo ina ia i ai le
alofa i o tatou loto.




Sa faia e Moronae se
folafolaga taua. Sa ia tusia,
afai tatou te faitauina le
Tusi a Mamona ma ole atu
i le Atua, o le a tau mai
e le Agaga Paia ia i tatou
e moni. Ona tanumia lea
e Moronae papatusi i le
Mauga o Kumora ina ia
sefe ai.



I tausaga e tele mulimuli ane, na sau ai Moronae i le lalolagi o se agelu. Sa ia faaali atu ia Iosefa Samita le mea na tanumia ai papatusi auro. Sa faamanuia e le Atua ia Iosefa ma le mana e faaliliu ai upu i luga o papatusi. I le aso, e mafai ona tatou faitau i upu a Moronae i le Tusi a Mamona! ■

Ou Te Alofa i Lou Aiga





**Saunia e Elder
Jeffrey R. Holland**
O Le Korama a Aposetolo
e Toasefululua

O LE NATURA MONI O LE ATUA

*O lesu Keriso o le faatinoga atoatoa
o le tausiga atoatoa a le Tama.*

Ina ua mavae atu augatupulaga o perofeta sa taumafai e aoao le aiga o le tagata i le finagalo ma le auala o le Tama, sa masani lava ona tau le faamanuiaina, o lea na auina mai ai e le Atua i le lalolagi, i Lana lava taumafaiga silisili ina ia tatou iloa o Ia, Lona Alo Pele e Toatasi ma le atoatoa, na foafoaina i Lona lava faatusa ma uiga, ina ia ola ma auauna atu i tagata i luitau o le olaga i aso taitasi.

O le afio mai i le lalolagi ma se tiutetauve faapena, ina ia faataunuina tiute o Elohimā—fetalai ai pei ona Ia fetalai, faamasino ma auauna atu, alofa ma lapatai, onosai ma faamagalo atu e pei ona Ia fai—o se tiute e matuai lofutuina ai ma e le mafai e outou ma au ona malamalamā i ai. Ae i le faamaoni ma le naunautai lea e aofia ai i uiga o se tamaitiiti paia, na mafai ai e Iesu ona malamalamā i ai ma sa Ia faia. Ae, ina ua amata ona oo mai faaneetaga ma le faamaluga, sa Ia faafoi atu uma lava le viiga i le Tama.

“O le Tama . . . na faia galuega,” na Ia fetalai atu ai ma le faamaoni. “E le mafai e le Atalii ona fai o se mea, na



o ia lava; a o mea na te vaai atu i le Tama o faia: o [mea foi e faia e Ia], o loo faia foi ia lava mea e le Atalii” [Ioane 14:10; Ioane 5:19]. I se tasi taimi na Ia fetalai ai: “O au nei ou te tautala i mea ua ou iloa i lou Tama” [Ioane 8:38]. . . .

. . . Mafatia nisi o le lalolagi i le taimi nei ona o le matua le fiafia i manatu sese e uiga i le [Atua o lo tatou Tama Faavavau]. O loo i ai foi ma se tulaga ua tauau ina falala atu i ai i lagona vavamamao ma le Tama, e oo lava ina matuai motuese mai lava ma Ia, pe afai foi sa latou talitonu ia te Ia. . . . I nisi o tulaga, (ma e mautinoa lava, i nisi o tulaga, o se faaliliuga na misi) o le Tusi Paia, e vaai atu ai nei tagata i le Atua le Tama ma Iesu Keriso Lona Alo ma faapea

e matuai eseese lava, e ui lava ina o loo ttau le mea moni i le Feagaiga Fou, o le Alo o le Atua e tasi ma o ia lava lea, o loo galue e pei ona sa Ia faia i lalo o le taitaiga a le Tama, o Ia lea e le liliu o “ananafi, o le aso, ma le faavavau.”¹ . . .

O le fafagaina la o e sa fia aai, faamalolo i e mamai, aoaiiina tagata pepelo, ole atu mo le faatuatua—o Keriso lena o loo faaali mai ia i tatou le ala o le Tama, o Le e “alofa tunoa ma alofa mutimutivale, e telegese lona toasa, e onosai ma tumu i le agalelei.”² I Lona soifuaga aemaise lava i Lona maliu, na faailoa mai ai e Keriso, “O le alofa lenei o le *Atua* ua ou faaali atu ia te outou, e faapena foi ia te au.” I le faatinoina atoatoa e le Alii o le tausiga atoatoa a le Tama, i lo Laua puapugatia ma le fetufaa i le faanoanoa mo agasala ma lototiga o le toatele o i tatou, tatou te iloa ai le uiga tonu o loo i totonu o le folafolaga: “Aua ua faapea lava ona alofa mai o le Atua i le lalolagi, ua ia aumai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau. E lei auina mai e le Atua lona Atalii i le lalolagi ina ia faasala i le lalolagi; a ia faaolaina le lalolagi ia te ia” (Ioane 3:16–17). ■

Mai le “O Le Silisilise o le Atua,” Liahona, Nov. 2003, 70–73.

FAAMATALAGA

1. Mo se faataitaiga, 1 Nifae 10:18; 2 Nifae 27:23; Moronae 10:19; Mataupu Faavae ma Feagaiga 20:12.
2. *Lectures on Faith* (1985), 42.

MALAMALAMAAGA



O Aiga: O Se Mamanu Faaselesitila

“E le o faamoemoeina aiga ina ia faia na o ni mea ia sologa lelei atili iinei i le lalolagi ona lafoai ese lea pe a tatou oo atu i le lagi. Ae, o na mea o le faatulagaga a le lagi. O le faatusa lena o se mamanu faaselesitila ma se faataitaiga o le aiga e faavavau o le Atua.”

Peresitene Dieter F. Uchtdorf, Fesoasoani Lua i le Au Peresitene Sili, “I Le Viiia Ai o i Latou o E Laveai,” *Liahona*, Me 2016, 77.

E I AI Foi i le Lomiga Lenei

MO TALAVOU MATUTUA


Faaatuatua, Faamoemoe,
ma le Alofa Mama: **Amioga
Mama e Lalaga Faatasi**

i. 44

Tatou te le faaputua le faatuatua i luga o le faamoemoe, i luga
o le amio mama e pei o lae tatou te faaputua ni poloka—o
nei amioga mama taua e tatau ona lalagaina i o tatou olaga
e fesoasoani ia i tatou e avea ai o ni soo moni o le Faaola.



MO LE AUTALAVOU



AVEA MA SE TOA MANUMANU MOI

i. 52

Vaai faalemafaufau mo se minute pe ana le usiusitai
perofeta o anamua. E laki i tatou, latou te lei na ona
nofonofo solo, ae—e pei o toa maoae—sa latou
galulue. E mafai foi ona e faia.

MO TAMAITI

i. 64

O Se
Kerisimasi Ese

E lei iloa e Diego pe o le Kerisimasi e aunoa
ma Tina o le a tutusa, ae sa ia maua se
manatu e fesoasoani e faia le Kerisimasi
ia sili atu mo isi tagata!

